

中國邊疆史志集成

內蒙古史志

28



中國邊疆史志集成

內蒙古史志
28

全國圖書館文獻
縮微復制中心

古
豐
識
畧

秋雨長門珠簾晝卷銀燭宵昏淚零宮草夢斷紅蓀
不妃赤帝願嫁烏孫漢室和親匈奴請后狗監催粧
姪娥折柳擁髻升車光射左右天子拊髀呼韓稽首
生辭金屋遠適玉關蕭條紫塞迢遞青山笳吹忽起
馬鳴不前驚沙匝地哀雁橫天鴨綠江邊漫蘿山下
貂帽狐裘角弓玉弣錦織夫人胡服騎射亂點酴醾
輕飄蘭麝月高圍屋雪滿拂廬琵琶細語垂手鐸綸
關氏一笑醉倒單于左賢色動比妓踟躕朔漠霜寒
帝京雲杳凜凜北風依依南鳥碧顏方驕紅顏易老
旃車晚出毳帷夜踟悲來別鶴慙去聚鹿甯甘仰藥

豈忍抱襦竟埋沙磧敢望玉鉤魂兮歸來歸彼歸州
神遊故鄉形銷絕域墓草青青三年化碧漢使傷心
胡兒嘆息恩怨千秋聲傳玉笛

鄭祖僑費公生祠碑記

鄭祖僑字惠菴右玉人父崇雅為武陵丞

卒於官僑走數千里負骸骨歸家貧苦學中式康熙壬午科舉人官曲沃教諭

曩者噶爾丹遠阻聲教頻年跳梁侵擾各蒙古部落
以致九邊柝起灞上烽然祈連以北俱為鋒鏑之場
矣

天子赫然震怒推轂委大將軍駐劄歸化城凡有外
滿漢官及蒙古部落咸屬調遣時甲戌季春也自大

將軍出鎮邊外雞犬不驚貿易交錯兵無價餉之患
民鮮輸輓之苦且秉雄謀具遠畧威儀外嚴風神內
照謙光下物赤心示人無論官兵軍卒咸被仁風而
遵紀律焉不料渠魁負固屢犯

天朝雖逞螳臂之威恐為尾大之釁

皇上親統六師深入不毛勅命大將軍會合諸路協
力剷除三十五年五月十三日登壇誓眾指揮三軍
於昭磨多地方矢石並集白刃交前殲數年之狡寇
解生民之怨讟積甲如山尸封塞河大將軍復深入
巢穴收合餘燼俾遺孽途窮銜壁軍前皆畏威仰德

共待

皇恩向之窺伺中夏憑陵同盟者莫不一朝底定也
奏捷後

御駕凱旋復以大將軍精忠性成壯武夙具其密謀
碩畫素匡贊於

宸聰者不可枚舉但鷄奔鼠竄之黨匿形山谷遺患
將來

特命留鎮邊庭以防復作封為撫遠大將軍凡滿漢
諸軍既蒙用命之賞復被投醪之惠而將軍則揚旌
瀚海繫馬陰山嚴刁斗而守烽燧朝夕無暇逸焉方

將軍之用兵也三令五申不拘孫吳舊書暗合衛霍
方畧是以拓境邊外懾服遐方且器量深沉知人善
任山藪無棄苞苴不行兵不敢欺盜不敢發於歸化
城駐節數載商賈駢集泉貨流通荒萊既墾黔黎茂
育兵革之餘倏成繁華之地雖古之紀功狼居胥勒
石燕然山者未若斯之盛也三十六年八月十一日
晉為內大臣一等公三十七年二月初一日
皇上眷念封疆大臣久駐塞外特命迎歸勛第朝夕
啟沃凡塞外兵民商賈共深河內之請同念黎陽之
別將軍以

皇命諄諄不遑久滯與故老營弁多方勸諭撫恤相
別凡經過之處無論老幼莫不攀轅迎頌歡聲四起
頌將軍之德皆戴

天子之恩於無疆也至於今塞外屢閉撲地歌吹動
天皆將軍之遺惠所垂雖

朝廷屢頒寵眷之典而草野詎忘涓埃之報於是營
方面吉地選山澤良材命虞衡之匠引堊黝之司建
造祠堂以紀宏勳而慰民望祠成凡軍民商旅仰瞻
其下者無異昔年帷幄鼓吹時也首事人等欲勒諸
貞珉問序於余余僅以管窺之見述其大概云爾至

大將軍平生事業翊贊忠蓋俟諸麟閣之紀焉

袁枚撫遠大將軍費襄壯公傳袁枚字子才號籥齋浙江

錢塘人弱冠試宏博乾隆戊午己未鄉會聯捷改庶常出宰江南三十六歲移病歸奉母

居隨園年八十一以壽終所著有小倉山房詩文等集

費公揚古滿洲正白旗人居董鄂地方以地為氏年

十四襲三等伯爵性樸直而貌雄奇待人以和無疾

言遽色好在

上前自言己短人多笑之康熙十九年以御前侍衛

為火器局總管兼議政大臣二十九年厄魯特噶爾

丹不靖

聖祖命隨裕親王征之破賊於烏闌地方先是厄魯特部落與喀爾喀連界厄魯特之子縱獵喀爾喀地方爭獸被殺厄魯特酋長噶爾丹謀報讐陰令番僧千人詭遊牧在其界內一年而喀爾喀不知也突於除夕率衆鼓譟直入所伏千僧從中接引喀爾喀度歲犇飲醉卧矣變起倉猝父子不相顧向南狂犇噶爾丹追逐所殺士卒無算喀爾喀奔至中國款關求救面目如鬼自言飢餓垂死乞

大皇帝活命

聖祖憐而納之仍與位號賜牛馬撥有水草處俾居

遣人諭噶爾丹曰汝兩小國唇齒相依當各守甌脫何必互相吞噬朕仰體天地好生之心不喜人爭鬥汝可休兵回國毋違朕命噶爾丹奏云喀爾喀殺我子我理當報讐

大皇帝要我罷兵可將我讐人車臣汗哲卜尊二人交出我便回去

聖祖詔答云人窮促來歸朕心哀之豈肯以讐人界汝汝他日窮促來歸朕亦如待車臣者待汝不歧視也噶爾丹恃強不服

聖祖怒下詔親征分三路出塞命公出西路

御駕出中路將軍馬思哈出東路先遣諜者誘其來
噶爾丹疑

聖祖必不親臨果以兵至到克爾倫地方離中里營
四十里其前哨探知

御駕所在精兵悍將萃焉西路費將軍兵已糧盡噶
爾丹遂避中路而直犯西軍公下令曰我兵深入不
毛噶爾丹探知糧盡故直來犯我我當先示弱以驕
之而一鼓作氣以擒之我軍今日視我鳴角然後發
矢礮我角不鳴先發矢礮者斬令畢噶爾丹兵數千
至矣各列隊兩山岡公先遣疲卒四百人挑戰噶爾

丹張兩翼圍之四百人盡歿於陣噶爾丹大喜直薄我師矢石如雨公端坐胡牀手執大角而不吹將軍孫思克跪請曰事急矣賊騎相離二十步我軍張弓引矢張目待將軍若再不戰事恐不支公怒叱之退又稍稍近前公鳴角左右俱鳴角矢礮齊發瞬息間烟塵蔽天賊眾披靡馬散走山凹公仰天大笑指揮眾兵取虜糧物而窮追之其眾大潰酋長頭目或死或降噶爾丹僅以身免奏上

聖祖諭云九月十三日卿奏已到朕甚欣慰現丹濟勒雖降噶爾丹降表未至然知其破壞已極不能支

拒倘其來降卿可善言諭導令至歸化城候旨當籌
一地方安置之亦是古聖人柔遠之義

王師凱旋公以軍功進爵一等仍管撫遠大將軍事
公退而告人曰我兵枵腹不能耐久故鼓其銳氣忘
命一戰竟能勝之如彼持重不鬥環圍一日則我敗
矣或有頌其功者謝曰我有罪無功我恃勇深入至
於絕糧一罪也約會後期致勞

聖慮二罪也倘不仗

聖主如天之福虜不知兵我死有餘辜尚敢言功乎
其謙退如此公在軍中與士卒同甘苦坐帳下事無

大小皆親決之有求見者不待傳宣登時召入好讀
左氏春秋手不釋卷一日立營未久民捉一兵至訴
其闖入渠家調其婦公問成姦乎曰未也公拔一刀
與之曰今立營之初斬之不祥嗣後此兵敢再來汝
家即將此刀斬之民與兵皆叩頭去後作先鋒衝虜
陣者即此兵也朔漠既平

聖祖詣箭亭觀射諸大臣皆彎弓發矢公奏臣臂痛
不可以弓

上許之出而告人曰我曾為大將軍倘一矢不中有
損國家威重毋乃為外夷所笑故不與諸將軍角伎

也人服其雅量薨後賜諡襄壯

魏源

國朝綏服蒙古記

魏源邵陽人官內閣中書人所著有聖武記行世

蒙古諸游牧國之大名也十七行省及東三省地為中國自中國而西回部而南衛藏而東朝鮮而北鄂羅斯其民亦皆土著之人其國亦皆城郭之國若乃不郭郭不宮室不播殖穹帳寄而水草逐者惟瀚海南北部及準部青海諸部則然故史傳外夷皆以居國行國為大界畫若漢匈奴賢王有左右一居東方以接濊貊一居西方以接氐羗而單于庭直代雲中

攘之則還於漠北至後漢為南單于北單于再變為東胡西胡三變為柔然東西奚四變為東突厥西突厥五變為內回紇外回紇上下數千年離合絕續皆以大漠為諸部之綱維於是乎左於是乎右於是乎南於是乎朔其擴入版圖列為郡縣者惟唐初蕩平突厥之地置定襄雲中等郡領於單于瀚海二都護一時稱極盛而控御不久遼金置上京中京西京諸道僅域於東西奚而未及河朔惟元起漠北奄有函夏於漠南置大甯上郡興和大同等路於漠北置和林行中書省以至西域青海皆分建諸王駙馬為古

今戎索之一變明之中葉元裔由漠北入漠南于是
邊防復棘且其根柯盤固支條蔓衍為今蒙古各部
汗王環處大漠故

高宗言三代以後惟元太祖裔至今不絕云按其部
落大分有四曰漠南內蒙古曰漠北外蒙古曰漠西
厄魯特蒙古曰青海蒙古四部中漠南內蒙古接壤
滿洲臣服最先至康熙初而漠北喀爾喀三部內歛
及親征準噶爾而青海諸部來庭於是三大部蒙古
皆混為一家惟漠西厄魯特恃其荒遠抗衡狂妄至
乾隆中始夷其疆域空其部落焉漠南漠北二部大

半由元太祖成吉思汗至今世姻

帝室其西海則元之旁支西域則元之臣僕至今惟
通朝貢與稱外戚甥舅者殊科因而區之以昭戎索
內札薩克蒙古六盟東四盟當盛京黑龍江及直隸
邊外西二盟當山西陝西甘肅邊外并歸化城土默
特則二十有五東抵吉林黑龍江界西至賀蘭山南
界長城北距瀚海絡雍冀幽并營五州北境袤數千
里明初悉攘諸漠北中葉復薦食漠南邊患遂與明
代相終始我

朝龍興首臣科爾沁繼平插漢

哈爾察

於是諸部先後

來庭有大征伐率師以從世其封爵時其朝貢凡二
十五部為五十有一旗其制畧與在京內八旗蒙古
等其朝覲分為三班其會盟則若科爾沁若郭爾羅
斯若杜爾伯特若扎賚特四部為一盟其盟所曰哲
里穆其貢道由山海關若札魯特若喀爾喀左翼若
奈曼若敖漢若翁牛特若阿魯科爾沁若巴林若克
什克騰八部為一盟其盟所曰召烏達其貢道由喜
峰口奈曼即元史所謂乃蠻元太祖既平乃蠻以封
其子故後人因以名部蓋先得漠北後得漠南
若土默特若喀喇沁二部為一盟其盟所曰卓索圖
其貢道亦由喜峰口若烏珠穆沁若浩齊特若阿巴

哈納爾若阿巴噶若蘇尼特五部為一盟其盟所曰錫林郭爾其貢道由獨石口以上為東四盟蒙古若四子部落若喀爾喀右翼若茂明安若烏拉特四部為一盟其盟所曰烏蘭察布其貢道由張家口又鄂爾多斯一部七旗牧河套內自為一盟其盟所曰伊克台其貢道由殺虎口以上為西二盟蒙古每三載盟會之期

欽命大臣賚勅以往設正副盟長各一以簡軍實閱邊防理訟獄審丁冊惟歸化城土默特向隸將軍都統及各廳同知不設札薩克故會盟集于本城不設

盟長聽

簡命大臣莅視其各部每旗事權皆掌于札薩克一人此外皆散秩其親王郡王貝勒貝子鎮國輔國公台吉等或以功晉封或以世襲無定員初元太祖起和林削平西北諸國建王駙馬等世守之為今內外札薩克蒙古所自出而仲弟哈薩爾以射聞季弟勒格圖以勇聞佐命功尤大今之阿巴噶阿巴哈納二部皆勒格圖後也兩科爾沁及札賚特杜爾伯特郭爾羅斯四子部落茂明安烏喇善青海和碩特九部皆哈薩爾後也又有太祖十五世孫達延車臣汗者

建庭和林支裔繁布于漠南北若奈曼巴林敖漢蘇
尼特烏珠穆沁鄂爾多斯克什克騰喀爾喀左右翼
九部皆其後也翁牛特則太祖弟諤楚因之後札魯
特及土默特右旗則太祖十八世孫之後惟喀喇沁
及土默特左翼為太祖功臣濟拉瑪之後餘皆元子
孫皆以插漢部為大宗其歸

本朝也皆以林丹汗不道之故今不悉述述其尤著
者

太宗文皇帝天聰九年得傳國璽于元小王子裔插
漢部于是蒙古四十九貝勒及土默特兩旗合上尊

號改元崇德是為我
大清受命之始前此

太祖天命中臣服諸國除瀋陽遼陽得自明外餘若
黑龍江五部長白山二部東海三部扈倫國四部凡
河東河西之地使犬使鹿之邦明人所稱為南關北
關者皆金代部屬語言相同城郭之國非蒙古行國
也其時已與科爾沁盟好而與插漢構釁插漢部者
元之嫡裔大宗也初順帝北歸和林連易五主始去
國號稱韃靼可汗皆在洪武之世永樂初本雅失里
可汗為阿魯台所立宣德中脫脫不花可汗為瓦剌

酋長脫歡所立景泰中也先篡之不久部下仍立脫
脫不花子號小王子自是世以小王子稱正德中小
王子尤強并青海及烏斯藏控弦十餘萬嘉靖中稍
厭兵徙幕遼東邊外稱土蠻而分諸部落留西北邊
其時邊防皆急河套青海及俺答封西陲莫於是東
部土蠻小王子裔數入寇邊患又中於薊遼故明世
邊寇曰河套部河東部河西部西則今青海蒙古東
則今內札薩克蒙古套則今阿拉善及鄂爾多斯蒙
古也至西厄魯特則瓦剌王脫歡也先之裔明中葉
後罕入寇而北部喀爾喀蒙古隔于大漠終明世不

見于史云萬歷中我

大清兵起明人思用東郭插漢小王子欲以敵
大清而要挾歲賞終無成效末年林丹汗士馬強盛
橫行漠南有宋康武乙之暴天命四年來聘書稱統
領四十萬衆蒙古國主巴圖魯青吉斯汗致書水濱
三萬衆滿洲國主且恃其虜劾憑陵諸部諸部先後
毆歸我

朝請師援救天聰八年六月

太宗統大軍盡徵各部蒙古兵征察哈爾時遼河夏
漲晝夜冒潦出其不意逾內興安嶺千三百里至其

庭林丹漢謀拒戰而所部解體遂徙其人畜十餘萬
眾由歸化城渡河西奔沿途離散十之七八林丹汗
走死于青海之大草灘我大軍至歸化城收其部落
數萬而還明年其子額哲率所部奉傳國璽來降封
親王位冠四十九貝勒之上其眾編旗安置義州額
哲卒其弟襲爵傳至布爾尼當康熙十四年吳三桂
之變徵其兵不至旋煽奈曼等部擁眾同叛

詔以多羅信郡王鄂札為撫遠大將軍以大學士圖
海副之率不附逆各部蒙古兵進討四月師次岐爾
哈台偵賊屯于達祿我軍留輜重以輕騎進布爾尼

設伏山谷間列陣以待我軍先敗其伏兵進擊其大隊敗之布爾尼收潰卒戰復連敗以三千騎遁為科爾沁兵射死凡六閱月平空其故地置牧廠隸內務府太僕寺而移其部眾游牧於宣化大同邊外其八旗分東西兩翼其旗內官地及與漢民互市訟獄治以四旗廳及獨石口張家口豐鎮甯遠各廳其本旗事務轄以都統等官而總隸于理藩院典屬司此八旗在蒙古四十九旗外官不得世襲事不得自專與各札薩克君國子民者不同其故地衰延千餘里在獨石口張家口邊外又歸化城土默特者明順義王

俺答之後也中為察哈爾所滅我

太宗親征察哈爾駐蹕歸化城降其部眾編為二旗以其部長為左右翼都統并還其世所守順義王印而遣將軍貝勒岳託副都統吳巴海駐其城鎮守之土默特酋博碩克圖之子使喀爾喀陰與明通吳巴海邀斬其使崇德元年喀木尼漢部葉雷等叛投漠北吳巴海率兵追之數旬無所見漠中射一雁負矢飛而墮往取之見賊營遺火遂躡及於溫多嶺葉雷注矢引滿將拒戰有狐起於前觸葉雷弓墮遂為我擒始收其順義王印乾隆中並裁都統其旗務則掌

之將軍副都統惟存輔國公世爵一不理事並設同
知通判理旗民賦訟與京師內八旗蒙古相等而與
插漢小殊故新疆各有駐防有察哈爾蒙古兵無土
默特蒙古兵

科爾沁部在喜峰口外從龍佐命世為梯附與

國休戚

孝端文皇后

孝莊文皇后

孝惠章皇后皆科爾沁女故

世祖當草創初冲齡踐阼中外帖然繫蒙古外戚扈

戴之力自天命至乾隆初額駙尚主者八有大征伐
輒屬橐前驅勞在王室非直親懿而已故順治十有
一年

上以諸扎薩克蒙古久不見恐墜上下之情特賜敕
存問令有所欲請隨時奏聞朕世世為天子爾等亦
世世為王屏藩百世而土謝圖親王達爾漢親王卓
理克圖親王札薩克圖郡王四爵俸幣居二十四部
之上

科爾沁部離此間較遠記內事
蹟亦與此無涉因節錄之

鄂爾多斯部在河套中東西北三面皆距河東西袤
二千里南北廣八九百里首尾或五六百里三四百

里秦蒙恬所奪匈奴河南地以陰山為塞而漢唐之朔方郡也前代城堡邊牆故蹟碁布而花馬二池鹽與河東鹽並行地宜馬駝有麥塚山鉄可為兵河柳可為筇赫連元昊屢為霸國形勝可戰可守元太祖十六世孫巴爾蘇始居之為鄂爾多斯濟農有九子分牧而處是為今鄂爾多斯七札薩克之祖明末苦林丹汗之虐糾合喀喇沁阿巴噶諸部敗察哈爾兵四萬於土默特之趙城天聰九年大軍追林丹汗子額哲於黃河西未至鄂爾多斯先邀與盟攘其部眾而獻千戶於我

朝順治初隨英親王剿流賊於陝西康熙中會剿叛賊王輔臣皆有功三十五年

上親征噶爾丹至所龍界諸札薩克渡河朝

御營獻馬請設驛饋運出兵扈蹕

上嘉其俗龐土沃牲物獵嫻周覽形勢謂札薩克等曰明人議河套畏爾蒙古如榻側卧虎亦其時無人耳若今日大軍且逾陰山賀蘭山出爾背後其奈我何諸札薩克稽首曰今天下一家

上奈何出此驚人之語也本六旗至乾隆中滋息增一旗設札薩克七自為一盟

<p>地無涉其第三篇內惟阿拉善王部落此較近且有牽涉歸化城語因摘錄於後</p>	<p>特與右翼為近族<small>綏服蒙古次篇凡三篇此盟蒙古與此</small></p>	<p>分左右翼異姓同牧<small>左翼元臣濟拉瑪右翼元太祖裔</small>歸化城土默</p>	<p>爾伯特同名異族<small>內札薩克有三部</small>默特其二部</p>	<p>名同族<small>一居嫩江為嫩江科爾沁一為阿魯</small>有兩杜</p>	<p>達延車臣汗之裔此外蒙古同名者有兩科爾沁同</p>	<p>札薩克左右翼蒙古也左右翼俱元太祖十五世孫</p>	<p>四部蒙古也曰內喀爾喀即喜峰口張家口外之內</p>	<p>八旗之駐京蒙古也曰外喀爾喀即漠北外札薩克</p>	<p>國朝喀爾喀相繼歸誠名凡三曰舊喀爾喀即編入</p>
--	--	--	---	--	-----------------------------	-----------------------------	-----------------------------	-----------------------------	-----------------------------

賀蘭山厄魯特者俗所稱阿拉山蒙古也阿拉山即
賀蘭山亦譌阿拉善皆語音之轉其地在河套以西
東甯夏西甘州南涼州北瀚海袤延七百餘里至京
師五千里山陽為內地山陰為蒙古游牧漠北地武
威張掖三郡西北境唐吐蕃宋西夏明為邊外地

國初厄魯特種類蕃盛分牧套西者謂之套夷駐牧
青海者謂之西海諸台吉其駐牧天山北路者謂之
北厄魯特各有部長當青海盛時并屬於固始汗元
祖弟哈薩爾其後惟北厄魯特倔強猾夏自取侮亡
十九世孫其部眾先降者在青海則有游牧之綽羅斯特土耳

扈特各旗在喀爾喀之西科布多之東者則有烏闌

烏蘇之厄魯特二旗烏闌烏蘇在鄂拜達里克河之

杜爾伯特十四旗皆北厄魯特之裔拜達里克河在

西河之而青海套西二厄魯特尤密邇內地初固始汗

兄子曰鄂齊圖汗游牧套西而固始汗季子巴延阿

至什生子十六其四人居青海其和羅理等十二人

亦牧套西是為二部分地之始順治初鄂齊圖汗遣

使入貢且請助攻喀爾喀其後康熙十六年準部噶

爾丹娶鄂齊圖女旋以兵襲殺鄂齊圖破其部遣使

獻所俘弓矢甲冑

詔却之于是西套厄魯特潰散或投西藏或被虜歸伊犁而和羅理族避居大草灘廬帳萬餘守汛吏驅之不去并有準噶爾逃人數百從之騷近邊

詔宥其飢困竄掠之罪和羅理等求達賴刺麻表請甘州東北之龍所山蒙古謂之阿拉山即古賀蘭山陰者賜其游牧以距邊六十里為界

詔許之是為阿拉山厄魯特游牧之始二十七年噶爾丹侵喀爾喀和羅理族人前陷準部中者乘準夷與喀爾喀戰挈千眾脫走來降

詔徙之歸化城以避準噶爾和羅理擅留之三十年

懼討分道叛遁先後為官兵擒斬三十一年和羅理
悔罪乞降

詔仍牧阿拉山其族人屢為準噶爾誘唆輒蒙

恩赦宥和羅理以所部數離叛難約束請視四十九
旗例編佐領廷議徙之烏喇界

上以治蒙古貴服其心不在地之遠近其仍游牧阿
拉山地給札薩克印編一旗置佐領封郡王一鎮國
公二自是永為不侵不叛之臣三十五年隨大軍敗
噶爾丹於昭莫多明年

上視師甯夏復請從戎四十二年復有額濟內土爾

扈特人來降

詔編置一旗與阿拉山同牧雍正二年

王師定青海廷議以阿拉山屏蔽甯夏和碩特舊游牧山後近歲或徙山前請

敕札薩克郡王阿寶部眾歸牧山後自後遂與青海分部乾隆中大軍剿準回二部及討蘭州石峯堡送回輒以所部為軍鋒故阿拉山兵稱虢雄晉爵親王初河套有花馬鹽池鄂爾多斯部據之套西有吉蘭鹽池阿拉山王據之其法皆於兩地置官收稅聽蒙古漢人轉運不問所之暗符劉晏之法而套內之鹽

不如套西鹹潔故甘肅民食花馬小池鹽者十之三
食阿拉山池鹽者十之六陝西民食亦居其三駱駝
牛騾運負絡繹官吏恐侵潞鹽引地止許運至皇甫
川云

聖祖親征準噶爾記

厄魯特亦蒙古也元之亡蒙古分為三大部漠南蒙

古漠北喀爾喀蒙古皆成吉斯汗之裔元稱之太祖國曰成吉人

思汗成或作欽或作青皆音之轉惟居西域者非元太祖後出脫歡

太師及也先瓦剌可汗之裔是為厄魯特四衛拉蒙

古衛拉即瓦剌之轉音

國初惟漠南蒙古早結和親而喀爾喀厄魯特兩大部皆雄長西北間通使間入寇順治中

王師方定中原未遑遠畧於是厄魯特吞噬西北日漸強大初厄魯特四衛拉部曰綽羅斯牧伊犁曰都

爾伯特牧額爾齊斯曰土爾扈特牧雅爾即塔爾巴哈台曰

和碩特牧烏魯木齊和碩特固始汗於明末襲據青

海又以兵入藏滅藏巴汗而有其喀木之地綽羅斯

特則據伊犁兼脅旁部與喀爾喀隣勢俱張甚康熙

中綽羅特渾台吉死子僧格立僧格死子索諾木阿

拉布坦立僧格弟噶爾丹殺之自立為準噶爾汗旋

取青海和碩特車臣汗女而襲殺車臣汗齊鄒兼有
四衛拉特復南催回部城郭諸國盡下之威令至衛
藏則又思北并喀爾喀乃自伊犁東徙帳阿爾泰山
并使杜爾伯特部衆屯田且耕且牧以峙其食會喀
爾喀土謝圖汗執殺札薩克圖汗而奪其妻三部內
闕我

朝遣使偕西藏達賴之使和鮮三部噶爾丹使其族
人多爾濟札布隨而覘之故使嫚罵土謝圖汗以激
其怒土謝圖汗果執殺之噶爾丹遂藉詞報復揚言
借俄羅斯兵且至喀爾喀探之無其事守備懈而噶

爾丹言之不已喀爾喀益不信噶爾丹潛遣刺麻千人游牧其地喀爾喀亦不以為意也二十七年夏噶爾丹領勁騎三萬逾杭愛山突襲其帳游牧刺麻從中應之土謝圖汗倉卒潰遁其子噶爾丹台吉拒戰大敗傾國東走途遇我使臣張鵬翮等往俄羅斯經其東部車臣汗地喀爾喀遣使乞援即揚言大國兵來救已於是噶爾丹亦具書來使臣具檄曉諭之噶爾丹知我兵不為喀爾喀也復踐之并擊破其鄰部右翼車臣汗左翼札薩克圖汗又劫其大刺麻哲卜尊丹巴胡圖克圖之帳於是土謝圖等三汗部落數

十萬衆盡棄牲畜帳幙分路東奔於九月投漠南款
關乞降

聖祖命尚書阿爾尼等發歸化城獨石張家二口倉
儲并賜茶布牲畜十餘萬以贍之暫借科爾沁水草
地使游牧噶爾丹亦遣使入貢

上勅其率衆西歸還喀爾喀侵地噶爾丹既兼有回
部青海漠北則益驕蹇不奉命踞喀爾喀王庭徵諸
屬國控弦之士數十萬二十九年以追喀爾喀為名
選銳東犯五月侵及烏爾會河尚書阿爾尼以蒙古
兵擊之而令喀爾喀奪還所掠牲畜喀爾喀貪利爭

取陣遂亂反為厄魯特所敗乘勝東趨內札薩克蒙
古地方是時

朝廷已平三藩定隴蜀收臺灣和鄂羅斯天下無事
聖祖以噶爾丹勢熾既入犯其志不在小且喀爾喀
不可使無故地游牧也六月集大臣於朝下詔

親征命撫遠大將軍裕親王福全為左翼皇子允禔
副之出古北口安北大將軍恭親王常甯為右翼出
喜峰口右翼兵遇賊烏朱穆秦戰復不利收軍準噶

爾遂乘勝長驅而南在盛京西北口九百餘

里秦一深入烏闌布通距京師七百里乃止右翼兵

古豐識畧 人部 卷三十三 藝文上 三十九

命康親王傑書等屯歸化城要其歸路八月朔我撫
遠大將軍遇賊於烏闌布通噶爾丹遣使來言追喀
爾喀警人闌入中國汛界非敢妄行請執土謝圖汗
及其弟哲卜尊丹巴大刺麻昇我即當班師翼日我
軍進擊大戰于烏闌布通賊騎數萬陣山下依林阻
水以萬駝縛足卧地背加箱垛蒙以濕氈環列如柵
士卒於垛隙發矢銃備鉤距謂之駝城我師隔河而
陣以火器為前列遙攻中堅聲震天地自晡至暮駝
斃於礮頽且仆陣斷為二步騎爭先陷陣左翼兵又
遶山橫擊遂破其壘賊乘夜走保高險翼日遣西藏

刺麻濟隆來軍卑詞乞和奏聞

詔速進兵無墮賊計而噶爾丹不俟報即拔營由克什克騰部之什拉穆楞河載木橫渡越大磧山宵遁所過皆燒荒以絕追騎逾數日我師輕騎追之已不及噶爾丹中途遣使獻書頂威靈佛誓不犯邊并具疏謝罪科爾沁土謝圖親王謀羈留之而噶爾丹逸不止且盡失負駝無輜重狂奔絕漠而北沿途飢踣死亡得還科布多者僅數千人時

上偶不豫自博洛河屯回鑾諸將不及奉進止而歸化城西路兵及科爾沁蒙古兵以奉裕親王講和之

令遂不復邀擊信郡王劾裕親王不乘勝追剿反檄
止蘇爾達等進兵致窮寇竄逸

上以功過相兼薄其罰有言科爾沁土謝圖親王通
於噶爾丹陰縱之去者

上亦不之疑也八月班師回鑾三十一年五月噶爾
丹遣使至歸化城聲言入貢男婦接踵至者幾二千
將軍費揚古遣兵迎詰且遏之

詔責還其使三十三年約噶爾丹來會盟不報而遣
兵侵掠喀爾喀益甚屢書索土謝圖汗及哲卜尊丹

巴大刺麻益急且害我使臣

時噶爾丹兄子策妄拉
布坦為噶爾丹所迫遣

遣使入貢故我而陰遣使誘內蒙古各部叛歸己科爾

沁土謝圖王以聞

上以前此烏闌布通之役賊幾可滅我師坐失機會
欲復致其來一戰覆之乃密令復書偽許內應而預
調士馬芻糧以待三十四年噶爾丹果率騎三萬入
寇沿克魯倫河而下侵掠至巴顏烏闌自秋徂冬據
之不去亦不犯漠南遣使往激之賊令使者徒步歸
且大言借俄羅斯烏槍兵六萬將大舉內犯蓋以前
敗由火器不如中國故佯假西洋火器以張其軍其
實俄羅斯并無意助寇且噶爾丹懲前敗亦未敢深

入送死也明年春

上復禡牙親征皇太子留守京師命將軍薩布素率東三省兵出東路遏其衝大將軍費揚古振武將軍孫思克等率陝甘兵出甯夏西路邀其歸

上親統禁旅由獨石口出中路皆赴瀚海而北約期夾攻沙磧不宜車乃留大礮惟駝子母礮以行每駐營

上親拊士卒相水草軍行瀚海泉溢芻生五月遂由科圖進徧賊境而東路軍尚未至西路軍亦奏言賊盡焚草地我軍迂道秣馬糧運阻兩師行七十餘日

士馬餒困乞

上緩軍以待途次復有傳鄂羅斯助兵之信大學士
伊桑阿等力請回鑾

上怒曰朕祭告天地宗廟出征不見賊而返何以對
天下且大軍退則賊盡銳注西路西路軍不其殆乎
遂率兵疾趨克魯倫河手繪陣圖指示方畧從行王
大臣有言宜俟西路兵至而合擊者有言宜出其不
意直前突擊者有言宜遣使告以駕至俟其驚擾而
後乘之者

上命諸皇子議之定計遣使噶爾丹尚不信登北孟

納蘭山望見

御營黃幄龍纛環以幔城又外為網城軍容山立大
驚拔營宵遁翌日大軍至河則北岸已無一帳克魯
倫河者起車臣汗西界東北近黑龍江橫亘瀚海東
北二千里乃內外蒙古之界也

上初意賊必扼河拒戰故兩路出師攻其腹背及是
知賊已喪膽遂命領侍衛內大臣馬思哈搜討已顏
烏蘭近地

上親率前鋒追之三日至拖諾山不及而還命內大
臣明珠盡運中路之糧以濟西師賊奔馳五晝夜中

途欲拒戰於拖諾山而衆奔不能止沿途遺老弱輜
重及漿渾脫無算適我西路兵邀之於昭莫多昭莫
多者蒙古語大樹林也即明祖被阿魯台地在肯特
嶺之南土臘河之北汗山之東平曠饒水草回望大
嶺千仞如屏為自古漠北戰場時敵軍至者僅萬然
皆百戰之賊我師飢疲馬僵其半士多徒步費揚古
等議馬力不能馳擊非反客為主以逸待勞不可距
敵三十里即止營其地有小山三面皆距河林木茂
蒼可設伏先遣前鋒兵四百且戰且却誘賊至昭莫
多費揚古率左右翼步騎先據小山陣於東餘沿土

臘河陣於西兼備林中伏賊導

上所授方畧各兵皆下馬步戰約聞角聲始上馬將軍孫思克以綠旗步兵居中據山頂臨之賊爭山頂

鋒甚銳我兵據險俯擊弩銃迭發籐牌繼之每進輒

以拒馬木列前自固

趙氏記謂以拒馬木木擁於後示必死云云按拒馬木皆列于前

所以制敵騎之衝突即衛青武剛車自環之意先為不可勝以待敵之衝突可勝也兵入敵境不患不致死無

列於後

之理後賊冒矢銃鏖戰至暮不退人人如怒虎林木

皆震費揚古遙望賊陣後人馬不動必其婦女駝畜也乃麾沿河伏騎一橫衝入陣一襲其後輜重山上軍奮呼夾擊賊始潰敗乘夜追北三十餘里天明收

軍斬數千級降三千獲馬駝牛羊廬帳器械無算并
殪其可敦阿奴可敦者準部稱其汗之妃也頗哲敢
戰披銅甲佩弓矢騎異獸似駝非駝精銳悉隸麾下
至是亦斃於礮噉爾丹以數十騎遁捷奏至

御營命費揚古留防科圖護喀爾喀游牧地

上親撰銘勒察罕拖諾山及昭莫多之山而還次歸
化城躬犒勞西路凱旋之師輟膳大饗士獻厄魯特
之俘彈箏笳歌者畢集有老胡工笳口辯有膽氣兼
能漢語

上賜之酒使奏技音調悲壯歌曰雪花如血撲戰

袍奪取黃河為馬槽滅我名王兮虜我使歌我欲走
兮無駱駝嗚呼黃河以北奈若何嗚呼北斗以南奈
若何遂伏地謝

上大笑手書以告皇太子王師之出也分五營

上居中為御營諸皇子分統左右翼每翼各二營

皇四子雍親王統左營及班師也皇長子統後營為

殿六月

駕至京師初準噶爾自破喀爾喀後戀漠北地久不
歸其伊犁舊部落盡為兄子策妄阿布坦所并自阿
爾泰山以西皆非已有又連年與中國戰精銳喪亡

牲畜皆盡回部青海哈薩克皆隔絕叛去至是欲西
歸伊犁則畏策妄那布坦之偪欲南投烏斯藏則道
遠不能至欲北赴鄂羅斯而鄂羅斯拒不受聞翁金
河有我師餘糧運回甯夏翁金河一作甯金河與推
杭愛山之西阿爾泰山之東我西師留儲糧餉以待
回軍者也及戰勝而師由東歸不經舊路故餘糧無
用焚棄乃遣兵數千伏山谷中突出掠之又為我副
都統祖良璧護糧兵前後夾擊所敗欲掠喀爾喀之
出邊游牧者聞有備亦不敢犯其遣赴藏之使又為
我青海副都統所擒所屬部落從者或僅千人或數
百人皆老羸自相盜羊馬

上乘其窮感欲降之九月

駕再幸歸化城駐蹕鄂爾多斯諭青海諸台吉與策
妄拉布坦協擒噶爾丹遣使携其黨與準部諸台吉
絡繹來降噶爾丹盡喪羽翼乃遣使詣鄂爾多斯旗
行在探中國意詔數其犯汛界之罪又許以待喀爾
喀恩例招撫之否即進兵方噶爾丹之遣使也授以
書嘆息曰天下人果不相同中國皇帝神靈奇異聞
其行軍所至泉湧于沙草生於磧冰泮於河是天助
彼也今我所屬之人已皆往屬之是人助彼也爾往
其所觀其侍從大臣行止若何歸日議之因泣下使

者至瞻覲感服密輸情於我大臣

聖祖聞而憐之命理藩院自獨石口至甯夏設譯以待車駕旋京師而噶爾丹倔强卒不至三十六年春二月

駕復渡黃河幸甯夏命馬思哈費揚古兩路進兵噶爾丹使子塞卜騰巴珠徵糧喀密為回人擒獻所獵薩克呼里之地野獸已盡左右親信數台吉亦面懟聞大兵將至先後望風款附密嚮導大兵深入又策妄那布坦擁勁兵伏阿爾泰山將擒以獻功噶爾丹進退無地不知所為計每夕或數驚所至處頻逢怪

異烈風淫雨隨之自知人畔天亡旦夕必就俘遂仰藥死時

上自甯夏循賀蘭山出邊而費揚古以噶爾丹自伏天誅奏其下丹濟臘以其尸及子女來獻好女授侍衛

至阿爾泰山為策妄那布坦奏而獻諸朝所部盡降於是自阿爾泰山以東皆隸版圖拓喀爾喀西境千餘里四月

上復勒銘狼居胥之山而還朔漠平至京師御門受賀

上親撰碑銘勒石太學古帝王武功或命將或親征

惟以告於廟社未有告先師者在泮獻馘復古制自我

聖祖始臣源曰

聖祖三駕親征其出塞一由東路再由中路三由西路東路由博洛河屯僅在盛京西界因準夷已內越烏穆秦而南故未渡漠出邊中路即明成祖北征所

行由獨石口宣化府出邊度瀚海

聖諭言瀚海水草雖乏然脈泉

鑿之甚易一卒可得二三十井又有郁爾草最宜馬駝之食

瀚海亦非平地沙岡

綿亘無寸土惟插漢七老峯長二百里橫亘瀚海之中初出卡倫即逾此嶺

聖祖勒銘其上以後隨地設驛凡二十五日度大漠
至克魯倫河

聖祖曰吾聞噶爾丹練習戎行所向無敵今不扼克
魯倫河知其無能為也遂循河窮追至拖諾山而還
其地距河套二千餘里是為瀚海中路又西自大同
歸化城度漠北至推河亦設三十餘驛

聖祖第三次由此出寧夏循賀蘭山將出邊聞賊伏
天殛故未渡大漠而費揚古西路凱旋之師實由此
還故

聖祖親勞之於歸化城是為西路前代帝王出塞親

征者惟明成祖成祖三犁虜廷皆自開平興和出入

開平即元之上都城皆在宣府北邊故三追阿魯台一

追瓦剌皆飲馬於臚朐河一至土臘河而還一至斡

難斡離河而還臚朐即克魯倫河我

聖祖之所駐軍少西為土臘河即昭莫多大軍所戰

地少東為斡難河即黑龍江之源元太祖未都和林

以前所居在克魯倫河之北興安嶺之麓皆未越杭

愛山而西也是明祖車轍馬跡與李文忠邱福所軍

均不過喀爾喀車臣汗土謝圖汗境內而未西至賽

音諾顏札薩克兩部明人張皇遠有回視北斗在南

之侈矣原北注案黑龍江北及頂若成祖所至克魯倫

河鄂爾坤河北安能即在南乎我

聖祖三路出師每路不過三萬然西師已有乏糧草
疲士馬之患蓋絕漠度磧自古為難而明人虛聲失
實又有度漠五十萬之侈矣至若李陵趙破奴所至
之浚稽山距朔方居延二千里驃騎所封之狼居胥
山距代二千里衛青所戰之寘顏山出定襄塞千餘
里準其地望皆在今土臘河鄂爾坤河左右興安嶺
杭愛山之支麓特難定為何峯

陳希曾重立義學碑記
任山西學政所著有
陳希曾
人前

樸谷
齋稿

我

國家誕敷文教學校如林自通都大邑以迄山陬海
澨罔不蒸蒸向化家有塾黨有庠而國有學也即邊
徼羈縻之地為自古聲教所未通者今亦野無匿秀
人知向方往往以義名其學而或者限于地絀于財
經始者未得其人繼起者未振其緒則其學亦終不
立此固賴存心之公愛人之切疊疊然全其始要其
終而後其事以集其功以成歸化城為三晉藩衛觀
察德公蒞任有年所以通商惠工者成效已彰彰矣

古豐識畧

人部

卷三十三

藝文上

四七

而尤以興教勸學為先務舊有義學久廢不舉公亟謀更建之度地於道署之右捐廉為屬吏倡鳩工庀材不數月而落成屬予為文以記之且語予曰地近官僻集生徒數十人其長者課以文藝勉之絀華崇實以敦品制行為大端其幼者與之繹經義課記誦并出絹素毫翰以鼓舞之或日一至焉或二三日一至焉樂此不為疲也予聞之喜曰此邦人士何幸得嘉惠儒林教學為先諄諄如公者哉知化民成俗之必由於學也而以身先之知遜志時敏之厥修乃來也而以勤董之知入學考校離經辨志之不可凌節

而施也而次第以及之知觀摩有自復虞彼之苦其
難而不知其益也而獎賞以誘之夫豈徒高其垣宏
其宇為寒士謀棲遲之所哉蓋欲襍被而來者之實
能相與有成也然則公之好學深思其存心之公愛
人之切亦概可知矣予視學此邦凡使節所至靡不
以先德行而後文藝為士子勗每進諸生於庭拳拳
懇懇勉其所已能而掖其所未至蓋獎誘後進之思
與公實有同心焉幸與公同事一方樂其心之相契
而尤嘆是舉之德施於無窮也異日者化成俗美風
聲所樹將見擔簦負笈者接踵而來斷斷然相與絃

誦服習於其中吾知必有瑰奇特出之士侗儻不羈之才出而宣揚

郵治黼黻

皇猷而歸本於振興庠序翕然稱公之德於不衰則公之培養士氣作育人材以上副

聖天子觀文成化之治者雖邊徼羈縻之地固無殊於通都大邑也予故樂為之書并為肄業者勛焉

鍾秀上撫憲稟

為謹就所屬情形酌請變通各廳陞調章程開具節畧恭呈憲鑑事竊查道屬各廳本係土默特蒙古牧

地南接邊牆西臨黃河東界察哈爾鑲藍旗北界大
青山後烏闌察布源泉托蘇圖山等處廣袤千餘里
三面毗連外藩

國初擴入版圖漸置牧吏先設歸化城副都統蒙民
理事同知暨協理筆帖式七員分理其事至乾隆初
新築綏遠城徙右衛將軍并分駐防旗兵鎮守其地
始設綏遠糧餉理事同知倉庫大使裁去七協改設
各廳通判添駐道員又於各廳設管獄分防各巡檢
官制由斯而定治具由是而張凡地方應行事宜立
法已無可議惟是要荒僻遠終與腹地不同約舉情

形其難有四內地州縣不過三二百里而各廳轄境數百里之外兼管外藩遇有命盜等案亦歸勘驗清水河托克托城兩廳分管準噶爾一旗各數百里歸化城則兼管四子部落茂明安達爾漢三部薩拉齊則兼管烏拉特東西中公達拉特貝子杭錦郡王等五部自千餘里至二三千不等程途往返動輒兼旬傳証緝凶每多竄匿外藩廣於分壤實有鞭長莫及之虞則難於控制口內糧地肥瘠不同而口外沙漠之區實鮮沃壤各廳惟綏遠經營之渾津黑河莊頭地糧尚可年清年款其餘如清和兩廳山坡磽

确屢報逃荒薩托濱臨黃河時虞水患歸化糧地極
多皆遠在山後極寒之地春末開凍秋初隕霜統年
燠少寒多禾稼難以長發稻粱菽麥本非貊地所生
蒿籽油菽亦皆視為嘉穀勞於耕作而薄於收成故
各廳雖有徵銀徵粟之殊類皆完納維艱逋逃甚易
則難於催徵安民之端莫先除暴而口外地方寥廓
草地處處可通賊騎便于往來兵役難于掩捕自歸
綏兩城而外官民均係野處街市無城郭之固村落
無堡寨可憑雖有營汛卡倫勢難徧及兼以七廳錯
壤九旗毗連近接外藩遠通各省刺麻蒙回燕晉秦

隴之人無所不有詰之不可窮詰追之無可追尋故
口外為盜賊之淵藪而緝捕甚難唐魏之風素稱淳
樸而口外則五方雜處刁野成風細微之端即起爭
訟且蒙民交涉事件須由副都統委員會審事權不
一辦理諸形掣肘歸薩兩廳自外藩陸續放地以來
又添數十村至百餘村不等蒙民間雜耕牧錯居或
一地兩租而地戶自相爭奪或先放後逐而蒙漢激
成事端艱鉅頻仍無從措手則撫綏聽斷在在均難
至于口外血脉全在商人從前南北暢行故地方繁
庶泉布流通窮民為人傭工力作亦可藉資餬口近

年道途不靖時事多艱鋪主歇業收貨行商聞而裹足廛市日形蕭索貧民艱于謀生以致匪竊流行搶劫疊出此又地方凋敝諸事增劇之一端不僅有妨於闕權也夫以邊外之難治值近日之情形自非精明諳練通權達變之員鮮克有濟而各廳多由京外筆帖式簡補與各省撫民撫彝同知曾任州縣者有別具間豈乏人材未免短于歷練膺此盤錯之任殊難措置裕如所以口外治理未能日見起色者殆由于此故處今日而圖整頓莫先于為地方求人才為地方求人才自宜少廣陞途而酌優甄叙查各廳中

綏和清托四廳係中簡之缺向由內院報滿及京察
記名之筆帖式銓補歸薩兩廳均係兼四要缺向由
口外各廳中陞調定例本有區別第思記名并報滿
筆帖式以之補授中簡之區尚可勝任似不必盡議
更張惟歸薩最關緊要若僅選諸各廳未免遴才途
隘得人較難倘適遇乏才之時亦不得不就中陞調
似非所以重繁要而求循良查各廳員向以補授筆
帖式為始論俸推陞員外郎部選甚速雖有奏請暫
留三年之案而年滿仍轉京職竊以內地州縣亦係
論俸推陞如有出色人員即由本省陞轉歸薩二廳

緊要過于州縣如果任重有餘正可留為外用若聽其推陞京職幾無異置散投閒未免人才可惜今欲籌議變通除中簡各廳銓補陞轉及奏請暫留似可仍循其舊不必更議外其歸薩兩廳缺出擬請仍先儘各廳選擇如無可調之人即由內地旗員繁簡州縣及簡缺同通內陞調如任事一二年後實在得力准由道詳請保奏將論俸推陞注銷留於本省以知府同知直隸州酌量補用如此量為變通庶陞途較廣要缺易于得人而有此外轉一途既可久於其任亦可藉資鼓勵似於吏治民生均有裨益且查口外

各廳介在內地外藩之間而歸薩兩廳形勢尤居吭背若地方靜謐風化肅然實為三晉北面之藩蔽故兩廳之得人與否不但有關於吏治且有關於邊防值此多事之秋不敢不豫為籌及倘蒙憲台採擇而昌言焉則疆圉之幸也至口外專轄地方者七廳道屬五廳大朔所屬二廳其中緊要三缺歸化豐鎮均設同知惟薩拉齊則設通判未免缺同銜異查薩廳政務繁難較之歸豐兩廳有過之無不及且該廳接壤烏拉特等五旗與外藩王公貝子時有會辦事件僅以通判臨莅其間似不足以資彈壓所有薩拉齊

一缺可否照豐鎮之例改為理事同知以崇體制之

處謹為附陳并候鈞裁謹稟此稟因中丞陞任四川

告然於此間政務頗有指
陳存之以俟採擇為幸

附各廳查稟地方情形

歸化城

一廳屬南界一間房子村距城九十里北界四
 子等旗距城三百餘里東界速魯圖村距城二
 百餘里西界察素齊村距城百餘里其間游民
 居多宵小易發雖派役沿途巡察而路途遙遠
 并無墩鋪防汛設之難也鞭長莫及不能及時
 弋獲此緝捕盜賊之難也

一廳屬每年人命案亦歸化同知驗訊辦起尚
 藩三旗命案亦歸化同知驗訊辦起尚者數
 均係散居並無餘甲隣或租種旗地攬放牲畜情

古豐識畧

人部

卷三十三

藝文上

五十四

性命案之野難遇有命案多有狡譎鮮得實情此審理

一廳屬五方雜處蒙民交涉命盜詞訟本極繁多

自嘉慶十五年道光二十二年大青山後沙拉

穆楞十村地戶爭訟更繁且蒙民交涉之案由

等數派委蒙員會審并有將軍都統本衙門

以都別廳審解之案情罪未協飭委審辦者幾無

虛著非如內有籍即出外謀生查傳案非易訊而民

詞訟之難人也犯本已不少兼有外藩齊爾噶

一本廳監獄人犯鄂城車臣汗四子部各廳招解

茂明安盟各旗人犯均解來寄禁又有各廳以上固

當人嚴加稽察稍有未周即可滋成事端此防範監

獄之難也稍周即可滋成事端此防範監獄之難也

以及附近各村尚能遵照憲定章程辦理外其
離城寫遠之處多係無業游民遷移靡定并有
搭蓋窩鋪暫居隨地與人牧畜或割草度日旋
往別處謀生既無牌甲之可編又無籍貫之可
考此編查保甲之難也

和林格爾

一廳屬周圍計六百餘里共村莊二百二十八處
其蒙古村莊一百四十四處係口內忻代等
州祁縣太原古原太谷陽曲大同左雲平魯等縣民
人祖種蒙古地畝在內居住其民人糧地村莊
一廳屬官地共三千二百二十五頃六十二畝五
分五厘七毫八絲合四勺銀色米三千二百六十五石
四分九厘八毫合四勺銀色米三千二百六十五石
石一升九合七勺
一廳屬五旗廠地共七百二十三頃四十八畝額
徵銀一千六百三十三兩三錢七分三厘隨徵耗銀
五十二兩六錢六分三厘

相地	和之	具口	沙種	肥平	和其	七稀	東和	七鰥	四廳	一廳
沿畝	廳難	文外	土子	土川	廳他	家少	路廳	十寡	厘屬	廳屬
日餘	除較	下地	擁二	尚而	微鋪	現而	客舊	七孤	額蒙	古
久俱	物他	忙寒	蝕升	堪土	糧戶	僅官	商係	兩獨	徵古	廠
轉係	阜處	追三	多約	滋脉	官可	十差	利南	七蒙	銀廠	地
租蒙	等尤	呼四	種收	潤瘠	地知	二仍	其北	錢古	五地	共
者古	里甚	稍月	蒿二	嗣後	多在山	家絡	捷衝	五地	百四	二百
漸戶	及五	急間	籽前	愈常	原坡	開不	徑自	分六	十十	百八
多口	旗馬	種青	收成	耕愈	先	設絕	由咸	一十	六六	八十
原租	廠	地黃	益穀	瘠瘠	壑種	粟舊	東豐	六頃	兩六	項九
約給	並	者不	薄黍	收種	時	店開	路四	九十	錢七	十分
既不	無	輒上	催油	成時	均	九設	行走	十五	畝額	徵銀
跟地	蒙	戶忙	徵益	成日	賴	家典	以遠	畝額	徵銀	
隨民	古	逃徵	難麥	歉每	浮	現當	致廳	額徵	銀	
新人	吃	走收	兼近	每畝	面	僅鋪	商新	額徵	銀	
約耕	租	催不	以			三家	開			
又種		過								

復草率只載一段一條並無確實畝數甚或以
 後種樹木指為舊有相連地土越畔新開興訟
 紛聽斷最難得實間有並院牆俱無者鼠竊
 和廳村落多係土牆間有並院牆俱無者鼠竊
 最易生心賴以民戶瘡苦穿窬尚不多見惟馬
 上盜匪三兩同行蒙回莫辨遇有官人盤詰則
 詭稱販馬遇孤身行客輒下馬搶奪廳屬東南
 山路險阻每易藏匿西北平原曠野一鞭十里
 追捕無從雖派役來往梭巡緝捕實非易易

薩拉齊

一 薩廳兼管烏拉特三公達拉特貝子杭錦旗郡
 王等五部周圍數千里過有命盜各案均歸薩
 廳辦理往返甚勤驗經旬累月鞭長莫及未免有
 顧此失彼之虞此不特內地州縣所絕無即口
 外各廳亦未有如臨黃河每年春夏秋三季河
 一 廳屬地各村濱臨黃河每年春夏秋三季河
 水漲發輒將沿河隄堤興衝決致受水患必須累
 年興修工費頗鉅民力十疲困甚至藉口隄累

工經費輸納不能言以此催科甚難而其糧銀亦不多

一廳屬周圍五六百里蒙古回漢五方雜處並無

土著居民淫情頗與歸化城人情更覺刁野其

蒙外藩交涉多袒護寄民則私自逃回原籍無從

關查縱使其一中棘手之處種種請副都統派委獄

一薩未易聽斷也其流自甘肅至外藩各旗界

內及河套等處曲折無常凡有往來船筏該匪

時有賊匪潛匿出沒如馬成彪李錦各案現

一雖多阻攔訛索肆行搶奪嚴行緝拿河路尚稱靜

廳屬外藩蒙古集民私墾地畝動輒聚眾

乘間搶奪滋事遠則有王大人等均命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

則有烏拉特西公旗槍斃民人均多命等案其

乘間搶奪滋事遠則有王大人等均多命等案其

命盜重案層見迭出多出尋常情理之外一時未可枚舉較別廳尤為繁劇圖治最難見效

清水河

一清廳村莊共三百八十六處或五六十里始見一村或一村僅兩三家居住並無紳士富戶商賈亦甚寥寥

一清廳四面皆山其地畝即就山坡墾種遇有大風則浮沙壅積山水衝出則土盡石露其地最為磽瘠不堪耕種原墾上中下地一萬三千四

百餘頃徵正耗銀三萬五千餘兩嗣地戶陸續潛逃於嘉慶二五年九十年餘年奉部

豁除至今計地八千一百五十一頃額徵銀七千餘

兩業經詳請委勘咨司咨部尚數未覆准豁除奏

銷處分俱照口內地丁計算分數與別廳不同

催徵固難督催亦甚不易

托克托城

古豐載畧 八年 卷三十三 藝文上 五十八

<p>一查現屬各地多沙壤自鮮限藏歷年糧米每多獎</p>	<p>一賞懲責尚不與小則錢債細故大則戶婚田</p>	<p>一查民間詞訟之興則錢債細故大則戶婚田</p>	<p>一既產托廳蒙民雜處無交涉地畝事而歷年</p>	<p>一掌須咨查命歸化各案司檔冊令四至界址瞭如指</p>	<p>一請委員會審詳辦有案件應行分理不得互相</p>	<p>一推諉如準噶爾貝子一旗距廳一百二十里係</p>	<p>一與和格爾分管子按里數畫清與別廳兼管</p>	<p>一各旗者同</p>
-----------------------------	---------------------------	---------------------------	---------------------------	------------------------------	----------------------------	----------------------------	---------------------------	--------------

藝文上二

蘇武別李陵

漢

蘇武見流寓門

黃鵠一遠別千里顧徘徊胡馬失其羣思心常依依
何況雙飛龍羽翼臨當乖幸有絃歌曲可以喻中懷
請為游子吟泠泠一何悲絲竹厲清聲慷慨有餘哀
長歌正激烈中心愴以摧欲展清商曲念子不得歸
俯仰內傷心泪下不可揮願為雙黃鵠送子俱遠飛

答李陵前人

童童孤生節寄根河水泥連翩游客子於冬服涼衣
去家千里餘一身常渴饑寒夜立清庭仰瞻天漢湄

寒風吹我骨嚴霜切我肌憂心常慘戚晨風為我悲
瑤光遊何速行願去何遲仰視雲間星忽若割長帷
低頭還自憐盛年行已衰依依戀
愴愴難久懷

李陵與蘇子卿李陵見藝文上一

良時不再至離別在須臾屏營衢路側執手野踟躕
仰視浮雲馳奄忽互相踰風波一失所各在天一隅
長當從此別且復立斯須欲因晨風發送子以賤軀
携手上河梁遊子暮何之徘徊蹊路側悵悵不能辭
行人難久留各言長相思安知非日月弦望自有時
努力崇明德皓首以為期

錄別

有鳥西南飛熠熠似蒼鷹朝發天北隅暮聞日南陵
欲寄一言去託之牋綵繒因風附輕翼以遺心蘊丞
鳥辭路悠長羽翼不能勝意欲從鳥逝駑馬不可乘
晨風鳴北林熠熠東南飛願言所相思日暮不垂帷
明月照高樓想見餘光輝元鳥夜過庭髣髴能復飛
褰裳路踟躕徬徨不能歸浮雲日千里安知我心悲
思得瓊樹枝以解長渴飢

鍾子歌南音仲尼嘆歸與戎馬悲邊鳴遊子戀故廬
陽鳥歸飛雲蛟龍樂潛居人生一世間貴與願同俱

身無四凶罪何為天一隅與其苦筋力必欲榮薄軀
不如及清時策名於天衢

紅塵蔽天地白日何冥冥微陰盛殺氣淒風從此興
招搖西北指天漢東南傾嗟爾穹廬子獨行如履冰
短褐中無緒帶斷續以繩瀉水置瓶中焉辨淄與澠
巢父不洗耳後世有何稱

石崇王明君辭并序

晉人苞之石崇字季倫渤海

年二十餘為城陽太守伐吳有功封侯後遷
荆州刺史嶺南校尉致富不貲為趙王倫所

誅族其家

王明君者本是王昭君以觸文帝諱改焉匈奴盛請

婚于漢元帝以後宮良家子昭君配焉昔公主嫁烏
孫令琵琶馬上作樂以慰其道路之思其送明君亦
必爾也其造新曲多哀怨之聲故叙之于紙云爾
我本漢家子將適單于庭辭訣未及終前驅已抗旌
僕御涕流離轅馬悲且鳴哀鬱傷五內泣涇朱纓
行行日以遠遂造匈奴城延我于穹廬加我閼氏名
殊類非所安雖貴非所榮父子見陵辱對之慙且驚
殺身良不易默默以苟生苟生亦何聊積思常憤盈
願假飛鴻翼乘之以遐征飛鴻不我顧佇立以屏營
昔為匣中玉今為糞上英朝華不足歡甘與秋草並

傳語後世人遠嫁難為情文選注時陳湯斬入朝支非

荐女和親也強盛請婚殊乖
本事後此作者多謬宜矣

陸機飲馬長城窟行陸機字士衡華亭人弟雲字士龍太康末兄弟

俱入洛時人
稱為二俊

驅馬陟陰山山高馬不前往問陰山候勁虜在燕然
戎車無停軌旌旆屢徂遷仰憑積雪巖俯涉堅冰川
冬來秋未返去家邈以綿獵狃亮未夷征人豈徒旋
末德爭先鳴凶器無兩全師克薄賞行軍沒微軀捐
將遵甘陳迹收功單于旃振旅勞歸士受爵蒙街傳

斛律金敕勒歌北齊

敕勒川陰山下天似穹廬籠照四野天蒼蒼野茫茫
風吹草低見牛羊

庾信昭君詞

後周時為散騎常侍聘西魏遂

留長安孝閔時終司憲大夫信在梁與徐陵
文並綺麗世號徐庾體有開府集二十卷

拭啼辭戚里回顧望昭陽鏡失菱花影釵除却月梁

圍腰無一尺垂泪有千行綠衫承馬汗紅袖拂秋霜

別曲真多恨哀絃須臾張此詩疑少

千金公主題屏風公主周宗室女嫁突厥沙

風賜之公主傷周之亡心恒不平因書以自
寄又楊妃外傳帝以虹霓屏風賜太真上彫

刻美人長三寸許以水晶為地其器玩衣服
皆眾聚雜錯而成云隋煬帝所造以賜義成

公主墮入邊外貞觀初蕭
后持歸中國疑即此屏也

盛衰等朝暮世道若浮萍榮華實難守池臺終自平
富貴今安在空事寫丹青盃酒恒無樂絃歌詎有情
予本皇家子飄流入虜庭一朝覩成敗懷抱忽縱橫
古來共如此非我獨申名惟有昭君曲偏傷遠嫁情

隋煬帝幸北塞

見巡幸及史鑑門

鹿塞鴻旌駐龍庭翠輦回
纒帳望風舉穹廬向日開
呼韓稽顙至屠耆接踵來
索辯擎羶肉韋韝獻醪盃
何如漢天子空上單于臺

唐太宗飲馬長城窟

見史鑑門

塞外悲風切交河水已結瀚海百重波陰山千里雪
迴戍危烽火層巒引高節悠悠卷旆旌飲馬出長城
寒沙迷騎跡朔吹斷邊聲胡塵清玉塞羌笛韻金鉦
絕漠干戈戢車徒振原隰都尉反龍堆將軍旋馬邑
揚麾氛霧靜紀石功名立荒裔一戎衣靈臺凱歌入

釋子蘭飲馬長城窟唐

遊客長城下飲馬長城窟馬嘶聞水腥為侵征人骨
豈不是流泉終不成潺湲洗盡骨上土不洗骨上冤
骨若不沉水四海有還魂空流嗚咽聲聲中疑是咽

未句疑
有誤

劉沔出塞曲

見史鑑門

將軍在重圍音信絕不通羽書如流星飛入甘泉宮
信是并州兒年少心膽雄一朝隨召募百戰爭王公
去年桑乾北今年桑乾東死是征人死功是將軍功
汗馬牧秋月疲卒卧霜風仍聞左賢王更欲圖雲中

常建塞上曲

翩翩雲中使來問太原卒百戰若不歸刀頭怨秋水
寒雲隨陣落寒日傍城沒城下有寡妻哀哀哭枯骨

昭君墓前人

漢宮豈不死異域傷獨沒萬里馱黃金蛾眉為枯骨

迴車夜出塞立馬皆不發共恨丹青人墳上哭明月

李白咏蘇武李白字太白母夢長庚入懷而

遂有就其譜而太白出處畧不著見因刊定李集

明于彰明也讀書于蜀之昌明縣青蓮鄉昌

今贈詩所謂匡廬非也讀書處頭九江人何得謂此山

雲藏李鄭谷送人入蜀詩雪下文君沽酒以

才名為採訪使蘇許公所知疏荐于朝曰趙

入京賀知章以謫仙呼之未久還蜀見鄉人

司馬相如誇楚七澤遂下荆門娶于許氏因

別已寓巴陵成庭之問故再入長安客遊山東

其詩有云顧予不及仕學幽居携家與居焉其

物類而引杜詩為證近于郢書燕說矣。東人	之近世作大明一統志遂以李白入山東	安石風流自號東山時人遂以東山李白稱	叙李白集云白客遊天下以聲妓自隨效謝	東山李白好俗本妄改作山海內為長白按樂史與	言云。又云杜子美詩近來海內為長白按樂史與	病草猶以詩草託友人捉月之說蓋流俗愛石	夕夢子雲宅然竟不果其願也竟終于采石	詩云國門遙天外鄉路遠山隔朝憶相如臺	焉之志而首邱之懷不遠其懷趙徵君	舊遊可考也故既返初服遂就息焉將有秋	居曰荆門曰石門曰嵩陽而心獨樂于秋浦	夜郎遇赦歸復至池州蓋公生平遊歷所卜	幾去之廬山遭永王璘亂永王敗繫潯陽	歸空斷腸是也遂欲卜居池州之藍岑又未	田又送人之魯云我家寄在沙丘旁三年不	留家于魯其詩有云我家寄在沙丘旁三年不	奉樓于魯其詩有云我家寄在沙丘旁三年不	際事未幾又入長安應制詩于蒼耳林皆賦此	送子美于石門訪范山賦詩于蒼耳林皆賦此
--------------------	------------------	-------------------	-------------------	----------------------	----------------------	--------------------	-------------------	-------------------	-----------------	-------------------	-------------------	-------------------	------------------	-------------------	-------------------	--------------------	--------------------	--------------------	--------------------

按太白客遊山東子美即以山東呼之亦無不可惟一統志當入流寓不當入人物耳

蘇武在匈奴十年持漢節白雁上林飛空傳一書札
牧羊邊地苦落日歸心絕渴飲月窟水飢餐天上雪
東還沙塞遠北愴河梁別泣把李陵衣相看泪成血

劉駕古出塞

進士官南江東人與曹鄴友善

鄴登第不出京俟駕登科同去兩人俱以古詩名故相契如此

朔風不開花四氣多作雪北人尚多死况我本南越
古來邊塞地巡狩無遺轍九土耕不盡武皇猶戰伐
中天有高閣圖畫何時歇坐恐塞上山低于沙上骨

郎士元塞下曲

士元字君胃中山人天寶進士官至鄆州刺史

寶刀塞下兒身經百戰曾百勝壯心竟未嫖姚知白
草山頭日初沒黃沙戍下悲歌發蕭條夜靜邊風吹
獨倚營門望秋月

温庭筠塞上行庭筠字飛卿太原人
才思豔麗工於小賦每入試押官韻

凡八又手而八韻成時號温八义宣皇微行
遇於逆旅以言辭獲罪又以南華非僻書語

忤丞相令狐綯方城尉流落而死温貌甚
陋號鍾馗著有握蘭金荃漢南真藁諸集

燕弓弦勁霜飛瓦樸簌寒雕睇平野一點黃塵起雁
喧白龍堆下千蹄馬河源怒濁風如刀剪斷朔雲天
更高晚出榆關逐塞北驚沙飛迸衝征袍心許凌烟
名不滅年年錦字傷離別彩毫一畫竟何榮空使青

樓泪成血

王維塞上

維字摩詰太原人有別墅在輞川地極幽勝日以詩書嘯傲其中蘇

東坡謂其詩中有畫畫中有詩鬱輪袍之說恐忘才者厚誣之

屬國過居延單車欲問邊
征蓬出漢塞歸雁入胡天
大漠孤烟直長河落日圓
蕭關逢候吏都護在燕然

張喬書邊事

喬池州人有詩名咸通中與許棠俞坦之等為十哲京兆府解

試月中桂詩喬獨冠場

調角斷清秋
征人倚戍樓
春風對青冢
白日落梁州
大漠無兵阻
窮邊有客遊
蕃情似此水
長願向南流

此詩似與許棠同至五原者

古詩識畧 人部 卷三十三

藝文上 六十六

高適明妃曲

適與王昌齡之煥等齊名旗亭
賞酒伶人謳其開篋泪沾顯句

合殿恩中絕交河使漸稀肝腸隨玉輦形影向金微
漢地草應綠邊庭沙正飛願逐三秋雁年年一度歸
賦得征馬嘶送劉評事充朔方判官前人

征馬向邊州蕭蕭嘶未休思深常帶別聲斷為兼秋
歧路風將遠關山月共悠贈君從此去何日大刀頭

朱慶餘塞下曲

慶餘名可久以字行張籍擇
其詩二十六章置諸懷袖而

推贊之因得重名登科世傳其闡意一篇有
壯罷低聲問夫婿畫眉深淺入時無之句

萬里去長征連年慣野營入羣來擇馬拋伴去擒生
箭撚雕翎闊弓盤鵲角輕問看行遠近忽過受降城

雍陶塞上宿野寺

陶字國子鈞成都人大中八年由國子毛詩博士出刺

簡州不喜賓客有馮道明下第請謁云與陶有舊聞者引之進陶曰與公昧平生何云相

識道明曰詩集中日得相見何隔平生也遂吟立當青草人先見行傍白蓮魚未知之句

陶大喜待之如曩昔友

塞上番僧老天寒疾上關遠烟平似水高樹暗如山

去馬朝常急行人夜始閒更深聽刁斗時到磬聲間

許棠五原書事

見流寓門

西出黃雲外東懷白浪遙屋河愁立夜雷電獨行朝

磧迴人防寇天空雁避雕如何非戰卒弓劍不離腰

司空圖塞上

圖字表聖河中虞鄉人登進士為禮部侍郎王凝所知凝坐法

敗商州圖感知己從之凝起拜宣欽觀察
使辟置幕府召為殿中侍御史不忍去臺劾

左遷宰相盧携嘉其節曰司空御史高士也
召拜禮部員外郎黃巢亂後隱居中條山王

官谷自號耐辱居士所居處冠盜不入朱温
篡位召為禮部尚書不食而卒年七十二

萬里隴城在三邊殺氣衰沙填孤障角燒斷故關碑

馬色經寒慘鵬聲帶晚悲將軍正閒暇留客換歌詞

李昌符塞上行昌符字巖夢有詩名以婢僕

第此亦似效子昂破
琴意然風斯下矣

朔野烟塵起天軍又舉戈陰風向晚急殺氣入秋多
樹盡禽棲草冰堅路在河汾陽無繼者羌首肯先和

張蠡登單于臺見流

邊兵春盡迴，獨上單于臺。白日地中出，黃河天外來。
沙翻痕似浪，風急響疑雷。欲向陰關度，陰關曉不開。
朔方書事前人

秋盡角聲苦，逢人惟荷戈。城池向隴少，歧路出關多。
雁遠行垂地，烽高影入河。仍聞黑山寇，又覓漢家和。
雲朔逢山友，前人

會面却生疑，居然似夢歸。塞深行客少，家遠識人稀。
戰馬分旗牧，驚禽曳箭飛。將軍雖異禮，難便脫麻衣。

張九齡奉和聖製送尚書燕國公張說赴朔

方軍九齡曲江人相唐元宗致仕後宰執每

宗臣事有征廟算在休兵天與三台座人當萬里城
朔南方偃草河右蹙揚旌寵錫從仙禁光華出帝京
山川勤遠畧原隰軫皇情為奏薰琴唱仍題寶劍名
聞風六郡伏計日五戎平山甫歸應疾留侯功復成
歌鐘旋可望枕席豈難行四牡何時入吾君聽履聲

宋璟奉和聖製送張說巡邊

璟廣平人與姚崇同時為相

帝道薄存兵王師尚有征是關司馬法爰命總戎行
畫閫存威信分麾盛寵榮聚觀方結轍出祖遂傾城
聖酒山河潤天詞象緯明德風邊草偃勝氣朔雲平
宰國擁良器臨戎挹壯聲至和常得體不戰即亡精

以智泉甯竭其徐海自清遲還廟堂上贈別故人情
白行簡賦得九月九日李陵得蘇屬國書

降虜意何如窮荒九月居三秋異鄉節一紙故人書

對酒情無極開緘思有餘感時空寂寞懷舊幾踟躕

雁盡平沙迴煙消大漠虛回頭向南望掩泪對雙魚

劉禹錫送渾大夫赴豐州學宏錫字夢得登博

御史坐王叔文黨被貶貞元初召還作元都

觀看花詩復出為播州刺史易連州又召入

為主客郎作再遊元都觀詩嘗與白樂天唱

和號劉白唱和集與裴晉公唱和號汝維集

鳳銜新詔降恩華又見旌旗出漢家故吏來辭辛屬

國精兵願逐李輕車擅表君長迎風馭錦帶英豪踏
雪衙其奈明年春日好無人喚看牡丹花

李益飲馬泉

覲流寓門

綠楊如水草如烟舊是胡兒飲馬泉幾處吹笳明月
夜何時倚劍白雲天從來凍合關山路今日分流漢
使前莫遣行人照客髻恐驚憔悴入新年

李商隱贈別契苾使君

商隱字義山河內人開化二年進士與飛

卿齊名人稱溫李俱以恃才詭激為當路所薄官階不進坎壈終身

何年部落到陰陵奕世勤王國史稱夜捲牙旗千帳
雪朝飛羽騎一河冰番兒襁負來青冢狄女壺漿出

白登日暮鵝鷄泉畔獵路人遙認郅都鷹

温庭筠蘇武祠見前

蘇武魂消漢使前古祠高樹兩茫然雲邊雁斷胡天
月隴上羊歸塞草烟回日樓臺非甲帳去時冠劍是
丁年茂陵不見封侯印空向秋波哭逝川

秦韜玉塞下曲韜玉字中明京兆人著有投知小錄三卷

到處人皆著戰袍席箕風緊馬蹄豪丹鉛總錄謂李長吉詩天遠席

箕愁劉孟注席箕如箕踞坐此詩似未可以箕踞解之恐是塞上地名書之以俟知者。按席箕與息

雞同音疑即指塞草而言詳見物類黑山霜重弓添硬

青冢沙平月更高大野幾重開雪嶺長河無限舊雲

古豐識畧 人部 卷三十三 藝文上 七十

濤風林關外皆唐土何日陳兵戍不毛

李白咏王昭君見前

昭君拂玉鞍上馬啼紅頰今日漢宮人明朝胡地妾

劉長卿平番曲長卿字文房以詩馳聲上元寶應間人呼為五言長城

絕漠大軍還平沙獨戍閒空留一片石萬古在燕然

盧綸和張僕射塞下曲綸河中蒲人數舉進士不第為大歷十才

子之一德宗表其才召見禁中有所作輒使廣和異日從渾瑊在河中帝使召之綸已卒

矣憲宗詔中書舍人張仲素訪其遺集文宗尤愛其詩問宰相綸有子否李德裕對綸四

子皆進士第在臺閣帝遣中人悉索家笥得詩五百篇以聞

林暗草驚風將軍夜引弓平明尋白羽沒在石稜中

月黑雁飛高單于夜遁逃欲將輕騎逐大雪滿弓刀

王勃贈蘇綰書記

文勃字子安父福時祖通即

歲作滕王閣序後杜子美韓退之極推服之

知君書記本翩翩為許從戎赴朔邊紅粉樓中應計

日燕支山下莫經年

常建塞下曲

玉帛朝回望帝鄉烏孫歸去不稱王天涯盡處無征

戰兵氣銷為日月光

北海陰風動地來昭君祠上望龍堆髑髏盡是長安

卒日莫沙場飛作灰

無名氏胡笳曲

月明星稀霜滿野
羶車夜宿陰山下
漢家自失李將軍
單于公然來牧馬

李益夜上受降城聞笛

見流寓門

回樂峯前沙似雪
受降城外月如霜
不知何處吹蘆管
一夜征人盡望鄉

白居易咏王昭君

居易字樂天太原人徙下邳貞元中進士官至刑部

尚書文章精切雞林賈售其國相篇易一金其偽者相輒能辨之每作詩必令一老嫗為解嫗曰解則錄不解則不復錄喜與元微之唱和號元白體又曰長慶體

眉銷殘黛臉銷紅
滿面胡沙滿鬢風
愁苦辛勤憔悴

盡如今却似畫圖中

漢使却回憑寄語黃金何日贖蛾眉君王若問妾顏
色莫道不如宮裏時

杜牧遊邊

覲流
寓門

黃河連海路無塵邊草長枯不見春日暮拂雲堆下
過馬前途着射雕人

邊上聞胡笳
前人

何處吹笳薄暮天塞垣高鳥沒狼烟游人一聽頭堪
白蘇武爭禁十九年

題木蘭廟
前人

彎弓征戰作男兒夢裏曾經與畫眉幾度思歸還把
酒拂雲堆上祝明妃

張敬忠邊詞

二月垂楊未掛絲五原春色舊來遲只今河畔冰開
日正是長安花落時

儲嗣宗過五原

嗣宗大中進士爵里失傳有詩一卷

偶逐星車犯塞塵故鄉常恐到無因五原西去陽關
路日沒平沙不見人

文同謝友人寄畫

宋潞公同字與可蜀梓州人

登皇祐元年進士與執政議新法不合以論禮奪官知陵州有政績卒稱石室先生嘗自

謂有四絕詩一楚詞二草書三畫四與東坡為中表每切規誠東坡亦極與之善

客從長安來厚紙封小軸題云此奇畫寄贈公可蓄
開之掛高壁爛絹祇一幅中有兩駱駝氣韻頗不俗
大駝載半髀正面頸愈曲小駝方就乳蹲身脚微踞
一馬立其後纔露頭與足三犬乃子母共卧銜齧肉
健兒抱朱旗狀貌何狠愎端然立高岸勢若不可觸
定是此中長華旗蓋鮮服不知何所求隨從無一僕
初誰作此畫精妙亦可錄應餘右方在次第不止獨
更願君訪來我有萬錢贖按老可此詩本與此地無涉惟年來出入耳目所及

為此詩此畫描寫畧盡且諸詩中咏駱駝者極少因附識之

王安石明妃曲陵安石字介甫臨川人後居金陵又號半山封荆追封舒王

明妃初出漢宮時
淚溼春風鬢脚垂
低回顧影無顏色
尚得君王不自持
歸來却怪丹青手
入眼平生幾曾有
有意態由來畫不成
當時枉殺毛延壽
一去心知更不歸
可憐著盡漢宮衣
寄聲欲問塞南事
只有年年鴻雁飛
家人萬里傳消息
好在羶城莫相憶
君不見咫尺長門閉
阿嬌人生失意無
南北杜工部詩以為

又

明妃出嫁與胡兒
羶車百輛皆胡姬
含情欲語獨無處
傳與琵琶心自知
黃金捍撥春風手
彈着飛鴻勸

胡酒漢宮侍女淚暗垂沙上行人却回首漢恩自淺
胡自深人生樂在相知心可憐青冢已蕪沒尚有哀
絃留至今

歐陽修和王介甫明妃曲

修字永叔吉州永豐人天聖中進士

以太子少師致仕卒諡文忠其詩如昌黎以氣格為主而少昌黎排原之句與其文相似

漢宮有佳人天子初未識一朝隨漢使遠嫁單于國
絕色天下無一失難再得雖能殺畫工於事竟何益
耳目所及尚如此萬里安能制夷狄漢計誠已拙女
色難自誇明妃去時泪灑向枝上花狂風日暮起飄
泊落誰家紅顏勝人多薄命莫怨春風當自嗟

又

胡人以鞍馬為家射獵為俗泉甘草美無常處鳥驚
獸駭爭馳逐誰將漢女嫁胡兒風沙無情面如玉身
行不遇中國人馬上自作思歸曲推手為琵琶却手琵琶
胡人共聽亦咨嗟玉顏流落死天涯琵琶却傳來漢
家漢宮爭按新聲譜遺恨已深聲更苦纖纖女手生
洞房學得琵琶不下堂不識黃雲出塞路豈知此聲
能斷腸

曾鞏明妃曲和王介甫作

鞏字子固世稱南豐先生

蛾眉絕世不可尋能使花羞在上林自信無由汙白

玉向人不肯用黃金一辭椒屋風塵遠去托羶廬沙
磧深漢姬尚自有妒色胡女豈能無忌心直欲論情
通漢地獨能將恨寄胡琴但取當時能託意不論何
代有知音長安美人誇富貴未央宮殿競光陰豈知
泯泯沉烟霧獨有明妃傳至今

黃庭堅塞上曲

庭堅字魯直分甯人自號山谷老人又號涪翁詩蒼萃百

家雖隻字不輕出後竟為書名所掩

十月北風燕草黃燕人馬肥弓力强虎皮裁鞍雕羽
箭射殺山陰雙白狼青羶帳高雪不溼擊鼓傳觸令
行急戎車半醉擁貂裘昭君猶抱琵琶泣

麻革上雲內帥賈君

流寓門見

北極長虹掣西垣太白高千年知運圮四海共兵鏖
霧黑龍蛇鬪山昏虎豹嘯石傷填海羽波動負山鰲
遺介潛寒渚驚鷗走夜牢江山留慘黯天地入煮蒿
眾折思枚柱初寒俟璽繅明良逢慶會鄉曲得名豪
梁棟因人出舩艍為世操安流欣鼓枻奔浪獨能篙
日出戈揮景江翻弩射濤風聲連瀕洞裁鑿悉纖毫
桃李勤封植茅菅日薙蒔獵場游麋鹿魚渚動鱗魴
井邑生春色禾麻飮土膏民歌烏繞屋士喜馬騰槽
朔塞閑刁斗天山擁節旄岱嵩何落落江漢自滔滔

大寶珠仍壁長城雉與壕崇牙分祭戟大壤屬韃橐
日月依龍德風雲挾豹韜夾山羣戰騎黑水泳輕舠
落日觀魚浦秋風射雉皋化行家置塾役簡里停鑿
歌奏投壺室文閑治獄曹西菴談性理東閣會奇髦
森爽開璜琥縱橫列雁羔禮容新泮宇物性遂莊濠
牧唱聞朝起樵音聽暮號孤嬰收坎阱流滯起蓬蒿
屢下陳蕃榻誰空北海醪卻軍敦禮樂曹館富風騷
客望龍門聚雛從鳳穴翱世知三窟隘人可二天逃
雨露承恩命山河襲世勞功名高衛霍輔弼慕伊咎
鞍馬憐髀肉簪纓視髻毛雅申張仲德頌入魯侯昭

有客傷淪落無階寫鬱陶太行雲冪冪代北雨騷騷
去國心將折懷人首獨搔身如伏櫪驥情似失林猱
涸轍將安往窮途況所遭幸逢今匠石直欲啖醪糟
忖己誠無有登門亦已叨沐薰良備至感激欲號咷
己客馮驩舍猶傷范叔袍鏹須開匣劍割欲試鉛刀
杞梓容山木包羞薦沼茅每思休困頓佳蔭有蘭蓐

王元節青冢

元節字子宏州人

環佩魂歸青冢月琵琶聲斷黑江秋漢家多少征西
將泉下相逢也合羞

郭允升塞外道中

長城關外暮雲飛
蕭瑟秋風雁幾群
戍士牧兒頻借問
只今誰是李將軍

落日平沙接大荒
蕭蕭衰草藉河湟
受降城在今何處
此地空題古戰場

陳孚李陵臺

元。孚字剛中號笏齋天台人著觀光稿

落日悲笳鳴陰風起千嶂
何處見長安
夜夜倚天望
臣家羽林中
三世漢飛將
尚想甘泉宮
虎賁擁仙仗
臣豈負朝廷忠義
夙所望
漢天青茫茫
萬里隔亭障
可望不可到
血泪墮汪洋
空有臺上石
至今亦西向

按剛中詩義極喜翻新如博浪沙范增墓等七絕
炙人口惟此詩持論頗偏不及柳貫作遠甚或後人
古豐識畧 人部 卷三十三 藝文上 七十七

偽作亦
未可知

柳貫李陵臺

平沙北流水青山在其上李陵思鄉臺駐馬一西向
草根含餘淒峰尖入塞望俚言雖莫稽陳迹尚可訪
想其深入初步卒亦材壯手張天子威氣奪名王帳
覆車陷匈奴此志乃大妄一為情愛牽遑卹聲名喪
縷縷中郎書挽使同跌宕安知臣節恭死亡不易諒
河梁執別處出語漫惆悵家聲故燁赫三世漢飛將
兵法有死生人運迭休旺忠回在信史豈沒功罪狀
馬遷當腐刑強欲雪其謗歸思豈能無層雲塞亭障

千年麒麟圖吾將執元纛

袁桷送蘇子寧赴領北行省

桷字伯長慶元人童子時己著

聲大德初為國史院檢閱官侍講學士泰定初致仕所著有易說春秋清容居士集卒年

六十一
諡文清

貂帽護寒沙冰天閱歲華斷溪駝聽水密雪犬行車
雲盡難尋雁春深不見花昔人奇絕處八月解乘槎

劉秉忠過豐州

見流寓門

出邊瀰瀰水西流夾路離離禾黍稠出塞入塞動千
里去年今年經兩秋晴空高顯寺中塔曉日平明城
上樓車馬闐駢塵不到吟鞭斜裊過豐州

雲內道中前人

遠水平蕪間野花塞雲漠漠際寒沙閒禽向晚無投
樹倦客遲秋更念家萬里經年走風雨一身無計卧
烟霞來朝又上居延道懷古思君感鬢華

薩都刺過李陵墓

薩都刺字天錫其先蒙古人後居中國折節讀書隱

居不仕以詩文自娛與趙松雪張伯雨諸君
後先輝映其詩磊落激昂不掇拾前人一字

陸次雲選善鳴集謂米山評前輩詩云看似
尋常最奇崛成如容易却艱辛方之天錫不

魏斯語

降入穹廬愧將才山頭空築望鄉臺蘇郎有節毛皆
落漢主無恩使不來青草戰場雕影沒黃沙鼓角雁

聲哀那堪携手河陽別
泪灑西風骨已灰

王恭塞上曲

明。恭字安中。閩縣人。自稱翰林。初以儒士待詔。翰

林年六十餘矣。與修大典。書成授翰林。典籍投牒歸老。詩文自娛。有集云。白雲樵唱。

登陴望烽火落日烟塵紫
百戰久不歸空閨泪如水

漢兵十萬餘盡沒長城死
城下有精靈啾啾明月裏

戴銑出塞二首

銑字寶之。婺源人。宏治己未進士官南科。給事中。以劾逆

瑾受廷杖死。追贈光祿大夫。

軍行入大漠遙見胡騎來
死戰四五合白日昏黃埃

戰敗虜星奔血洒陰山隈
高功在主將南聞班師回

明時重文教邊功誰敢邀
邇來逐小醜已覺戰士凋

何喬新題蘇李泣別圖

喬新字廷秀廣昌人景泰中進士官至刑

部尚書請老卒諡文肅著有
椒邱文集詩多援據典故

黃雲黯欲暮歸騎慘將發醜酒上河梁羞與故人別
後會不可期請與君永訣祁連山前箭沙漠窖中雪
君心與我志各欲效忠節老親坐誅夷此志遂蹉跌
今君獲生還竹帛炳貞烈顧我墜家聲有懷共誰說
韓王昔降虜茅土世不絕念我先飛將守邊號瓌傑
臣罪固當誅臣族固宜滅嗟嗟全軀臣誰肯與論列
我心豈忘歸望鄉心如熱親族靡孑遺念之肝腸裂
痛哭送歸旌哀哀泪成血君歸謁茂陵毋為遂結舌

寄語霍將軍此心宜識察

李攀龍明妃曲

攀龍字于鱗歷城人嘉靖中進士官至河南按察使為七

之子五子

我本良家子承恩入漢宮
光來射綺羅語笑生春風
君王希召幸在遠誰為通
漢宮三十六處處種梧桐
美女八千名各各分當熊
黃金買顏色丹青多益工
甯知佳麗人不出所圖中
黃金猶糞土丹青復何功
君王寵自娛賤妾以和戎
豈惜賤妾去但惜長門空
涕泣顧長門從此逐秋風

徐良彥塞上曲

良彥字季良新建人萬曆戊戌進士官南工部侍郎請告

卒于家少讀經世之書不事聲律信筆口占
有詩數百篇高陽孫世師稱量朝士少所許
獨可於季良折馬

胡兒為我歌胡婦為我舞酪酒兩三行黃塵雜桴鼓
披甲上馬鞍旁觀色如土長城陳死人有力皆如虎

曾榮龍支行

榮字子榮永豐人永樂中廷試進士第一飲酒數石不醉官少

詹事卒于位病革將絕呼酒痛飲以為贊曰官詹非小六十非天我以為多人以為少易

箒蓋棺此外何求青
山白雲樂哉斯遊

龍支城頭夜吹角黃雲蔽天沙草薄虎鬚使者長安
來持麾擁蓋邊塵開城門盡是胡兵守城外老人多
白首拜迎使者雙泪流問云天子今安否自言家世

豐州住少小辭家隸軍戍吐番作日下蕭關胡騎長
驅涇隴間將軍戰敗鼓聲絕棄戈遺鏃填邱山自從
陷沒身為虜五十年來在邊土依棲部落作番人生
長兒孫盡胡語朝看烽火望中原夜聽鳴笳憶故園
顏垣敗屋誰家宅斷磧荒蹊何處村奉使還時報天
子早遣官軍復清水假令年老身歸死已免游魂作

胡鬼

原注唐穆宗時遣大理卿劉文鼎出使吐蕃道

子安否言頃從軍戰敗于此咽密問之皆豐州人也

李東陽牧羝曲

東陽字賓之茶陵人

官至文淵閣大學士致仕卒諡文正著有懷麓堂集罷相家居請詩文書篆者填塞戶限

頗資以給朝夕一日夫人方設客可使業無魚菜
倦色夫人笑曰今日方設客可使業無魚菜
耶遂忻然命筆移時
而罷其風操如此

嗟汝陵咄汝律羝可乳節不可屈咄汝律嗟汝陵甯
為我死不作汝曹生生入朝身已老有泪猶沾茂陵
草天遣生還入畫圖不然誰識冰霜貌

明妃怨前人

莫倚朱顏好妍媸無定形莫惜黃金貴能為身重輕
一生不識君王面不是丹青誰引荐空將豔質惱君
懷何似當初不相見君王幸顧苦不早不及春風與
秋草却羨蘇郎男子身猶能仗節長安道休翻胡語

入漢宮祇恐伶人如畫工畫工形貌尚可改何況依
稀曲調中

王鏊胡人歸朝歌

鏊字濟之吳縣人成化中進士歷官文淵閣大學士

卒諡文恪

兒胡兒女胡女女嫁胡兒娶胡婦唯有老身從漢來
椎髻纒裘作胡語當時從駕土木間匈奴驅我不得
還朝看鷄兒嶺暮宿木葉山昔聞青冢今始覩幾過
蘇卿持節處胡風烈烈胡霜飛聽罷胡笳泪如注胡
中洵樂漢自親呼韓猶作南朝賓欵關不用通事語
三十年前我漢人奉天殿前拜天子封爵歸來認鄰

里南街北巷爭聚觀家人見我還驚起男襲冠裳女
繡襦今日漢人昨日胡回思李陵并衛律漠北高墳
空突兀

盧柎送人之塞上

柎字少楨一字子木濬縣

罪邑宰以他事誣繫之獄東郡謝茂秦

携柎詩文游長安見諸貴人絮而泣曰有一

盧柎視其死而不救乃從千古惘惘哀沅而

弔湘乎吳人陸光祖為邑令平反其獄得免

嗜酒終以落拓

北風颯颯胡馬鳴君今棄我何遠行陰山雪花大如
掌黃雲出沒單于營萬里龍沙那可見將軍大小七
十戰捷書奏入建章宮寄我雲中一隻箭

李禎塞下曲

禎字昌祺廬陵人永樂中進士歷官廣西布政使

鐵騎蹴交河銜枚半夜過雪花凝鎖甲月色冷雕戈
黠虜俱亡命連營盡凱歌至今青冢骨猶恨與通和

蔣山卿咏王昭君

山卿字子雲儀真人正德甲戌進士歷官廣西參政

拭目新裝束朝來殿裏辭何堪辭訣日卻是見憐時
漢騎臨關外胡笳出塞遲琵琶寫哀怨淒切轉添悲

霍鵬塞上吟

馬邑人

昔道金河冷今來玉塞涼關門屯虎豹斧鉞掃豺狼
劍拂欃槍影旗搖太白光韜鈴常在篋持此報天王
宦拙心偏苦秋深雨又零方山傳采芑瀚海任流萍

虜市頻年款戎車鎮日停昨宵狼鬣暗惟見羽林星
 落落關山曉蕭蕭朔漠秋大軍閒虎隊元帥擁貂裘
 雲塞寒初動冰河咽不流沙場雄萬里殊勝酒泉遊
 北塞非無路東郊自有橋不堪胡馬度只怕漢兵驕
 露下千山瘦霜飛百卉凋兵家說方畧爭頌漢嫖姚
 五原人未回傳在黑山隈雁自龍庭過軍從虎峪來
 蒙恬多將畧魏尚有邊材古昔垂芳烈予懷亦壯哉

沈周從軍行周字啟南長洲人十五歲試鳳臺賦得盛名景泰中郡守以

賢良應詔決計隱遯奉母九十齡乃終先生年八十矣又三年而卒詩畫冠一時

馬上黃沙拂面行漢家何日不勞兵匈奴久自忘甥

勇僕射今誰託父兄雲外旌旗婆勒渡月中刁斗受
降城左賢早待長繩縛莫遺論功白髮生

楊慎出關

慎字用修新都人少師廷和之子也正德中廷試第一授修撰以議

大禮受廷杖再斃而復甦謫戍永昌衛投荒三十餘年卒年七十二著丹鉛總錄傳世

狼狐芒角正彎環虎落連營又出關漢使征鴻何日
至胡兒牧馬幾時還千重紫塞迷青冢九曲黃河繞
黑山飛將殊勛猶下吏書生乘障敢辭艱

王世懋華夷互市圖

世懋字敬美世貞元美之弟也嘉靖己未進士

以家難歸後除南儀制主事歷官至南太常寺少卿移疾歸卒於家兄弟俱以詩文名

大漠高空寂建牙兩軍相見醉琵琶天閑首蓓多美

種胡女胭脂盡漢家雲裏射生旋入市日中歸騎不
飛沙金錢半減犁庭費五利應知晉史誇

張元凱長安逢塞上班師

元凱字左虞吳縣人官指揮世爵著

有伐檀詩
集十二卷

盛秋胡騎若雲屯奏捷飛書入雁門浪說單于刑白
馬羞稱公主嫁烏孫班師節鉞歸三殿款塞旌旗過
五原幕府獻功方飲至撰成鏡曲侑金尊

蔡宗堯塞上秋思

宗堯臨海人自號東郭子嘉靖丁酉舉于鄉司教松

溪多識古丈奇字著有
適陵集二十卷詩一卷

斷雲殘柳接狼烟極目氛埃自黯然紫塞蒼茫能立

幟黃河容易可投鞭須知據險人持戟莫使衝風馬
避羶勝算終摧高闕聳遙藩荒破犬羊天

鄭琰挽鄭都護

琰字翰卿閩縣人布衣任俠

有眉安能作三日新婦悵悵悶死遂逃之

金陵依新安富人吳生醉輒唾罵呼為錢虜

兆獄死

中興功業更誰論
萬里摧殘百戰身
龍虎舊衣分愛
卒麒麟新冢哭
佳人金羈盡蝕燕
支血寶劍從吹礮
鷄塵塞外長星沉
碧海五原西望
泪沾巾

附錄徐興公榕陰詩話一則

鄭翰卿工七言少遊邊疆集中多悲壯語如馬邑
吹笳烽子急雁門獵火健兒歸霜色欲將關樹折
河聲如帶戍樓奔馬行空磧聞嘶斷人度殘冰過
語喧沙磧到天歸馬小朔雲連海遠鴻低磧上陰
雲連塞黑關前落日帶沙黃亂山獨馬嘶殘月遠
磧離鴻叫曙霜胡騎分營來漢冢蕃河分水到秦
川等句令人讀之有封狼居胥之志若陳幼孺之
鷗飛塞日翻胡影馬飲流泉咽漢聲馬季聲之馬
勒桃花銜苜蓿笳吹蘆葉響榆林謝在杭之風吹
紫塞草欲盡馬蹴黃河冰未殘亦不減鄭生高韻

于謙塞上即景謙字廷益錢塘人官兵部尚

即相公以社稷為重君為輕力主戰也先不

能相公唱始歸上皇天順復辟徐有貞石亨

等誣孝宗初乃追諡忠肅

目極烟沙草帶霜天寒氣暮景蒼茫炕頭熾炭燒黃

鼠馬上彎弓射白狼上將親平西突厥前軍近斬左

賢王邊塵無事烽塵靜坐聽鳴笳送夕陽

王恭咏胡兒吹笛見前

雲淨陰山片月孤數聲羌笛起單于不堪吹作梅花

調多少中原客在胡

施敬塞上曲字孟莊錢塘人

八月秋高塞草斑將軍千騎獵前山彎弓不射南飛雁恐有征人附信還

吳亮李陵臺詩見府志

飛將猶傳國士風出師未捷敢論功得當欲報漢天子千載知心太史公

蘇武祠前人

辛苦中郎已白頭節旄零落志方酬可憐麟閣圖名姓不及椒房博陸侯

王越邊行即事越字世昌濟縣人景泰中進士廷試日旋風掣其卷去逾

年高麗貢使携以上進天順中巡撫大同有功封威甯伯卒贈太傅諡襄敏

二月山城雪尚飛
年年草色見春遲
不知上國閒桃李
李開到東風第幾枝

徐禎卿咏昭君

禎卿字昌穀常熟人天性穎異家不蓄一書而無所不通

宏治中舉進士三十三歲卒與唐祝文為吳中四才子

辛苦風沙萬里鞍
春紅微淡黛痕殘
單于猶解憐嬌色
親拂胡塵帶笑看

薛蕙塞下曲

蕙字君采亳州人正德中進士以議禮下獄尋得贖官給事中

陰山縛盡犬羊羣
萬里胡天散陣雲
塞外降王三十部
來朝盡隸霍將軍

長城西北萬重山
無數征人若箇還
明妃死後留青

冢定遠生前隔玉關

顧璘塞下曲

璘字華玉吳縣人隸匠籍徙居金陵宏治丙辰進士歷官至刑

部尚書著有息園浮湘憑几歸田等集

千里驛騮丈八矛男兒畫地取封侯
黃昏塞上傳烽火一夜吹笳坐戍樓

百戰摧胡未許強馬前生縛左賢王
麟符鵲印須臾事祇博凌烟字一行

黃河冰厚馬橫行朔氣棱棱古鐵明
恨殺夜來風雪緊匈奴逃出受降城

汪循明妃曲

循字進之休甯人宏治丙辰進士官順天府通判

將軍仗鉞妻和番一樣承恩出漢關死戰生留俱為國敢將薄命怨紅顏

羅洪先昭君祠

洪先字達夫吉水人嘉靖己丑進士廷試第一官太常少

卿卒諡文恭嘗以疏請預定東宮忤旨罷官杜門講學攻苦淡鍊寒暑以經世為己任五

十前後絕意仕進默坐半榻不出戶者三年事能前知人問之曰偶然耳無疾而歿人以為

仙去或於燕齊海上見之

長秋纔引到簾前名姓誰知外國傳記得君王回盼

處肯令相識不相憐

鷓鴣泉上髑髏殘滿地黃雲拂草寒遇得花枝不忍

棄棄時容易遇時難

馬前雙臂海東青擒得哀鴻不忍聽我欲南歸無羽

翼問渠何事度龍廷

黃金縱買毛延壽玉貌當如薄命何多少佳人怨憔悴

算來不屬畫圖多

尹耕出塞曲耕字子莘代州人嘉靖庚辰進士豪宕不羈性嗜酒喜談兵嘗

為州守廢邊臣玩愒作塞語十一篇知疆事恨防備廢弛要害以告當事者為起兵部郎出

虜勢之朔俠烈之風分宜當國起兵部郎出落有河朔俠烈之風分宜當國起兵部郎出

知河間府擢河南按察司僉事為張萬紀所劾遣戍遼左遂屏棄不復用有秋興八首其

三四首云薊門千里接雲中虜騎清宵警報同合陣幾窺青海月鳴鞭爭下黑山風殘冬

戰士衣仍薄荒歲孤城廩欲空南國十年輸輓盡防秋諸將漫論功十萬鳴弦報吉囊野

心狼子是花當連姻故自輕中國分道頻看
入漢疆推穀丈人空肉食操戈遺孽尚蕭牆
不應干羽修文日歲歲三關有戰場俱感憤
邊事而言人謂少陵秋興而後此其嗣響

鷓鴣淬劍鵲調弓獵罷陰山落日紅鐵騎不嘶沙磧

草牙旗飛掣桔槔風

謝榛塞上曲

榛字茂秦臨清人即挾詩卷游
長安救盧子木者一時高其誼

爭與交驩秦晉諸藩皆延致之與李于鱗交
不終削其名于七子之致列而謝先生已
名滿天下右于鱗者雖惡之不能窮其所往
也眇一目年八十餘方賦詩遽投筆而逝

旌旗蕩野塞雲開金鼓連天朔雁回落日半山追點

虜彎弓直過李陵臺

飛將龍沙追虜還夜驅駝馬入燕關城頭殘月誰橫

笛吹落梅花雪滿山

胡笳曲 前人

沙磧茫茫黑水流胡兒六月換羊裘駱駝背上吹蘆
管風散龍荒作冷秋

漠北詞 前人

委羽山橫塞北天學飛雛雁夕陽邊匈奴歲歲無爭
戰白馬黃駝傍草眠

石頭敲火炙黃羊胡女低歌勸酪漿醉殺羣胡不知
夜鷄兒嶺下月如霜

曉聞羶帳擁秋雲虜將揮鞭部落分牧馬陰山莫南

向雁門今有李將軍

張元凱明妃詠見前

白雲堆裏塞雲昏黃鶴歌殘馬上論自恨良家充內
選也同公主嫁烏孫

于慎行題忠順夫人畫象慎行字無垢東阿

授翰林院編修萬歷初江陵卒有詔籍其家無垢

宜推明主冠擗言江陵母老諸子覆巢遺卵

義之歷官禮部尚書卒

燕支山色點平蕪染出春愁上畫圖一曲胡笳明月

夜邊聲又度小單于

邊城新舞柘枝詞降得渾邪罷漢師不道長安春色
少甘泉宮裏畫關氏

天山獵罷雪漫漫繡袜斜偎七寶鞍半醉屠蘇雙頰
冷桃花一片帶春寒

蓮花寶鈿綠雲鬟不脫檐褕欵漢關枉殺白登城下
畫虜中原自有紅顏

馮琦題三娘子畫象琦字用韞臨胸人萬歷
丁丑進士入翰林年十

九由編歷官至禮部尚書嘗有疏極論時政
草具未上易簣前夕力疾刪寫奏上以倣古
人尸諫之美遲明度疏入而
後暝年四十有六諡文敏

纓綸春暖鎖芙蓉爭羨胡姬拜漢封繞膝錦襪珠勒

馬當胸寶袂繡盤龍

塞北佳人亦自饒白題胡舞為誰嬌青霜已盡邊城
草一片梨花冷不銷

紅粧一隊陰山下亂點駝酥醉朔野塞外爭傳娘子
軍邊頭不牧烏孫馬

徐渭邊詞

渭字文長山陰人為胡少保宗憲幕客生平尚氣節不以阿曲取容

嘗自言書一詩二文三畫四後世當重之以貧死

千金赤兔匿宛城一隻黃羊奉老營自古着棋嫌盡
殺大家和局免輸贏開馬市

立馬單盤俯大荒提鞭一一問戎羌健兒只曉黃台

吉大雪山中指帳房

漢軍爭看繡衲襠十萬彎弧一女郎喚起木蘭親與
較看他用箭是誰長以下詠三娘子

長纓辦取鎖嬌嬈馬上織腰繫不牢好把鴛鴦靴上
腦倩誰雙把馬鞍橋

女郎那復取梟英此是胡王女外甥帳底琵琶推第
一更誰紅頰倚蘆笙

老胡寵向一人多窄袖銀貂茜巨羅遮與遼東黃鶴
子側將雲鬢打天鵝

姑姑花帽細銀披兩靨腮梨灑練椎箇箇菱花不離

手大家立馬點胭脂

胡兒處處路旁逢別有姿顏似慕容乞得杏仁諸妹

食射穿楊葉一翎風胡人最嗜糖纏杏仁

駱駝見柳等閒枯虜見南醪命拚殂倒與鷓夷留一

滴回韁猶見卯免沽原注諺云駱駝見柳達子見酒

崔鏞塞上曲詩見府志

鼓角聲喧塞日孤黃沙白草走單于大荒自古無分

地指點而今入版圖

霍鏞青冢弔明妃鏞馬邑人詩見府志

琵琶彈出漢宮秋青冢千年姓字留多少紅顏承主

幸名隨身世盡東流

蛾眉出塞萬家春不數將軍作虎臣但使此身能報
國何妨恩寵屬他人

古豐識畧卷三十四

長白鍾秀石帆

初稿

崞縣張曾小袁

人部

藝文下

劉統勳歸化道中晚行

東國朝人。見文正公山

蹇驢破帽獨衝風路指陰山落日紅
行客不須悲塞北
版圖先已屬遼東

聖恩雨露蘇邊草使節星霜滯轉蓬
幾度拂雲堆上望紛紛得失悟雞蟲

無名氏費大將軍祠題壁

詩見府志

遺像今何似當年駐馬時一方民父母千載世神祇
勒石全軍勝屯田治策奇乾坤同不朽留與後人思

袁枚明妃曲

見前藝文上

明駝一羣角數聲漢家宮女昭君行六宮送別泪如
雨怨入民間小兒女昭君上馬鞍手取琵琶彈生來
絕色原難畫影落黃河自愛看詔書殷勤選容質傳
到龍庭轉幽咽侍女濃熏甲帳香傾城遠掃天山雪
橫波滿臉向名王手拂穹廬作洞房生長內家風味
慣酒酣時作漢宮妝從今甥舅息干戈塞上呼韓日

請和寄言侍寢昭陽者同報君恩若箇多

紀昀塞上雜詠四十首原詩百六十字為鳥

地無涉迺西北所暨風氣畧同爰摘錄四分

想文獻縣人乾隆甲戌進士官至禮部尚書

高宗純協辦大學士卒謚文達文庫全書學問為

百卷精詳孫樹馨編其

山園芳草塞烟平迢遞新城接舊城行到叢祠歌舞

榭綠鑿瑜上看棋枰原注城舊卜東山之麓後移以

市皆俯視歷歷此間呼歸演劇時兩城外園畦羅

列濃綠

古豐識畧

人部 卷三十四

藝文下

二

塵市鱗鱗兩面分門前官樹綠如雲夜深燈火人歸

後幾處琵琶月下聞原注富商大賈聚居舊城南北

萬家烟火暖雲蒸銷盡天山太古冰臘雪清晨題牘

背紅絲硯水不曾凝原注向來內地氣候極寒數載

流雲潭沱水廉纖長夏高齋坐捲簾放眼青山三十

里已經雪壓萬峯尖原注城中夏日頗炎燠山中則

巖壘積雪皓然此間距大青山里數畧同

百道飛流似建瓴陂陀不碍浪花鳴遊人來到蕭關

外誰信山泉解倒行原注謂水流迅急越坂數重

亦謂之倒行

南北分疆畫界勻雲根兩面翠嶙峋中間岩壑無人

跡合付山靈作守臣原注山北屬烏魯木齊山南屬

城南風穴近山坳一片濤聲萬木梢相約春來牢蓋

屋夜深時捲數重茅原注聞城外林木聲如波濤不

尤甚此間立春後必多大風

金碧觚稜映翠嵐崔嵬

紫殿望東南時時一曲昇平樂膜拜聞呼

萬歲三朝原注賀張樂坐萬壽宮在城東南隅遇

此在宮前演劇謝街思邊氓芹曝之忱例所不禁

戶籍題名數種分雖然同住不同羣就中多賴鄉三

老雀鼠時時與解紛原注戶多就鄉約事權頗重官衙

有四鄉者十二總領統之事權畧同

雕鏤窗櫺綵畫椽覆檐却道士泥堅春冰片片陶家

瓦不是劉青碧玉甃原注惟神祠以瓦為之餘皆覆

亦礫易於碎裂此間亦少瓦房不解何故

婚嫁無憑但論資雄蜂雌蝶兩參差春風多少盧郎

怨阿母錢多總不知原注娶婦論財多以逾壯之男

此外每多此風此間尤甚

襪程翻翻數寸零桔槔到手不曾停論園彷彿如朱

荔三月商家已買青原注二三月間田禾方長商家以錢給農戶俟熟收糧謂之買

青藉以漁。此間村莊多。

到處歌樓到處花塞垣。此地擅繁華。軍郵歲歲飛官

牒。只為遊人不憶家。原注：商民流寓往不歸詢之。則曰：此地紅花紅花者土語繁

華也。此間亦有此語。

萬里携家出塞行。男婚女嫁總邊城。多年無復還鄉

夢。官府猶題舊里名。此間學校未立。居民無籍可入。有數世未還家者。遇有官事仍

曰某處人。

界畫棋枰綠幾層。一年一度換新塍。風流都似林和

靖。擔糞從來謝不能。原注：塞外之田更番換。此間息地力從無糞田之說。

馬糞頗貴。俱以代薪炭用。無入地者。

麗譙未用夜誰何寒犬霜牙利似磨只怪更深齋吠

影不容好夢到南柯原注屋人喜畜犬家家有之至暮

徹夜不休頗聒人睡。此俗語有狗鎮城之說

酒果新年對客陳鵝黃寒具薦燒春近來漸解中原

味浮瓊牢丸一色勻原注新年客至必陳餼餌四器

粉團其他糕餅亦畧同京師之製。此間點心近仿京式

半帶深青半帶黃園蔬已老始登牀可憐除却官廚

宴誰識春盤嫩甲香原注鬻菜者謂之菜牀瓜菜必

其嫩而不食。此間亦無嘗鮮之說瓜菜鮮時園丁不肯摘鬻縱多與之錢亦不願也

花信闌珊欲禁烟晴雲駘宕暮春天兒童新鮮中州

戲也趁東風放紙鳶原注塞外舊無風鳶之戲近有

間風箏之戲亦不數年

燒殘絳蠟鬪臯盧畫出龍眠賢已圖老去杜陵猶博

塞陶公莫怪牧豬奴原注土俗嗜博比戶皆然此間婦女尤甚

五月花蚊利似錐村村擬築露筋祠城中相去無三

里夜捲珠簾不下帷原注田中蚊蟲最毒城內則無此間近城亦少蚊

息雞草長綠離離織薦裁簾事事宜腰裏經過渾不

顧可憐班固未全知原注芟芟草生沙灘中一叢數百莖莖長數尺即漢書息雞草

也班固謂馬食一本即絕然馬殊不食此間叢生極多土人每以之縛帚呼音近及雞二字

姹紫媽紅廿四畦香魂彷彿認虞兮劉郎儻是修花

譜芍藥叢中定誤題

原注虞美人花巨如芍藥五色皆備。此間多種罌粟田畦數

里錦綉奪目按虞美人亦罌粟之類

朱橘黃柑荐翠盤關山萬里到來難官曹春宴分珍

果誰怯輕冰怯齒寒原注柑橘皆有惟價過昂耳

旋繞黃芽葉葉齊登盤春菜脆玻璃北人只自誇安

肅不見三臺綠滿畦原注黃芽菜不減安肅菜菔亦甘脆如梨。此間白菜以薩拉

齊所產為最佳

千瓣玲瓏綠葉疎花頭無力情人扶因循錯喚江西

蠟持較東籬恐未輸原注江西蠟花徑二寸千瓣五色望之如菊。此間名七月菊

春鴻秋燕候無差寒暖分明紀歲華何處飛來何處

去難將踪跡問天涯原注燕鴻來去之候與中土同

徹耳金鈴箇箇圓簷牙屋角影翩翩春雲淡宕春風

軟正是城中放鴿天原注土與鴿宜最易蕃衍風和日暖空中千百為羣鈴聲浪浪

頗消岑寂此間不能如是之多然鈴聲亦堪悅耳錄詩至此鈴聲又漾空而過矣

菽乳芳腴細細研截肪切玉滿街前只憐常逐春歸

去不到榴紅蓼紫天原注豆腐頗佳冬春以此為常餐夏秋則無擊者此間近來有

南豆腐惜夏秋間亦不易得也

槐榆處處綠參天行盡青山未到邊只有垂楊太嬌

穉纖腰長似小嬋娟原注柳最難長罕見高丈餘者此間尚不至是惟署前新栽

柳亦數年尚未長成

剪剪西風院落深夜涼是處有蛩音邊城不解金籠

戲一任籬根徹曉吟原注地多促織無促鬥之戲

新榨胡麻澁艷光可憐北客不能嘗初時錯認天台

女曾對桃花飯阮郎原注胡麻即脂麻東坡集言之甚晰而西人以大麻為胡麻其

油氣味甚惡非土人不能食也。此間麻油亦不可食

臘雪深深坼地寒經冬宿麥換苗難農家都是春初

種一樣黃雲被隴看原注雪深地凍宿麥至春多不生所種皆春麥也

八寸葵花色似金短垣老屋幾叢深此間頗去長安

遠珍重時看向日心原注葵心向日與內地同

地近山南估客多偷來番曲演鴛哥誰將紅豆傳新

曲記取摩訶兜勒歌原注土魯番呼歌曲亦靡靡可聽

取。鴛哥字未詳所出此間謂之秧歌或

玉笛銀箏夜不休城南城北酒家樓春明門外梨園

部風景依稀憶舊遊原注酒樓數處日日演劇數錢買坐畧似京師

桃花馬上舞驚鸞趙女身輕萬目看不惜黃金拋作

埽風流且喜見邯鄲原注塞外豐盈游民鬻技者麇至畿南馬解婦女亦聞風而來

始。此間近者

樊橋月滿四絃高小部交彈鳳尾槽白草黃沙行萬

里紅顏未損鄭櫻桃此間菊部諸人亦多自都中來

赤繩隨意往來牽頃刻能開並蒂蓮管領春風無限

事莫嫌多費買花錢此間五方雜處娶婦極易

白草颼颼接冷雲關山疆界是誰分幽魂來往隨官

牒原鬼昌黎竟未聞原注己丑冬城西林中時聞鬼

不得官牒不能過關焚牒給之是夜寂然有此間城隍祠亦給客死者路票每票索錢數百內有仰沿途

可關隘商民多敬信之

吳頡鴻送哲省莽成額之綏遠司馬任寓門

端征正是歲闌時仙吏行裝最便宜收拾江山歸宦

索半肩書畫一囊詩

邊塵黯黯塞雲飛草短山遙雪四圍此去定從青冢

過一樽為我酌明妃

策馬樓煩望曉曠五辛盤列酒盈尊遙知竹馬歡迎

處帶得春風度雁門

計元旦
可抵任

數聲風笛送花轅千里相思月一彎料得歸來持贈

我倪家雲樹米家山

時以素絹索
省斧畫山水

自殺虎口至和林格爾前人

車軸響硜硜程無十步平風聲都少韻山色總無情

路迥荒阮隔梁危獨木撐迷途欲問訊絕塞少人行

中秋月夜登清水河署樓望諸山積雪前人

屏山八月朔風烈吹出千山萬山雪我來踏月縱雙

眸九塞分明銀一色是時玉宇浮雲空沙磧淨掃無

塵容琉璃世界現本色冰輪正掛天當中前宵滕六
肆威怒如掌雪花飛萬樹牛心山沒七墩平平盡人
間不平處北望石碌南雁門二十六口飛烟屯忽逢
兔魄明秋霽一白不覺天黃昏風來尚捲梨花朵百
尺樓高宜着我劇憶閨中兒女歡正拜姮娥設瓜果
詎知絕塞民生難稻梁半熟逢嚴寒場圃築成蓋藏
少坐對佳節空愁歎我昔看月金山頂萬道金蛇盪
波影又曾看月崦山巔九點遠失齊州烟今朝于役
來塞北頓使書生眼界濶黛海青山一覽收置身如
在玻瓈國水調歌翻白雪篇不知今夕是何年願將

塞外清寒景補入幽圖達九天

張棣明妃曲

棣字夢樓，崑山縣人。道光丙申進士，官直隸吳橋、靜海、知縣。少以

睿皇帝

詩賦為周石芳學使所知，選拔貢生。西巡召試，賜綺一端，為縣令十七年，多惠政。

著有壁齋存草

雪滿天山草不春，琵琶幽咽怨和親。縱然不為丹青誤，也是長門失意人。

塞下曲 前人

陰山飛雪冷征袍，古戍寒霜溢佩刀。颯颯西風連夜急，受降城外月輪高。

彥德青冢詩

彥德字亦庵，滿洲正黃旗人。嘉慶癸卯舉人，襲世職，歷官至漢

軍都統定邊
左副將軍

閨閣堪垂世明妃冠漢宮一身歸朔漠數代靖兵戎
若以功名論幾於衛霍同人皆悲遠嫁我獨羨遭逢
縱使承恩寵馬能保始終至今青冢在絕勝賦秋風

此詩現勒石墓側旁有兩碑一為將軍昇寅作七古一為故相者英作五古昇作主不從胡俗飲藥而死
立論無以蘇武娶胡婦比之文姬失節法雖尊題其說不論太過考作粗率尤不足存僅錄昇作於後

昇寅青冢七古

寅滿洲人前任綏遠城將軍歷官至都察院左都御史

乾坤毓秀無遐邇半出簪纓半牀第才貌豈足定閨
賢總觀大節知臧否呼韓入覲詔六宮願嫁烏孫挺
身起一枝穠豔別椒闈三千粉黛皆委靡畫師伏罪

天子嗔昭君遂志單于喜御溝紅葉水融融團扇秋
風處處同回憶簪花衆姊妹可憐白首甘泉宮琵琶
醉酪日歌舞寵擅閼氏塞北空外無胡馬飲江水內
無野雞興女戎甯為雞口不牛後誰識女子真英雄
大青山下黑河汜旁有孤墳如壁壘空餘牧豎任樵
蘇自昔流傳青冢是當年夫歿請還朝詔令從俗亂
人理守志妃賢從一終君王忍不諒人只視彼文姬
返漢關失節屢嫁中朝士典屬老人吞雪忠牧羊又
娶胡兒婢名臣才女縱千秋貞操應令昭君鄙聞道
黃河西岸邊亦有明妃舊芳址噫吁嘻一坏黃土易

銷沈青冢傳疑勝青史

古豐識畧卷三十五

長白鍾秀石帆

初稿

崞縣張曾小袁

人部

風俗

定襄雲中五原本戎狄地頗有趙齊衛楚之徒其民

鄙樸少禮文好射獵

漢書地理志云此風近二

惟射獵則不知何矣奈何

俗尚武藝見志一

民勤耕作士鮮奔競

見樞府全書此間既無土著之

民亦並無絃
誦之士也

按古者天子巡狩命太史陳詩以觀民風誠以
治民之道必因其俗而化導之示儉示禮各隨
其宜風俗所關最為切要此間自我

朝開國伊始首先內附其向化之速被化之久較內
地且早數年及今涵濡

聖澤二百餘年視南疆西域聲教所訖感召宜深乃
以學校未開民無定籍居其地者十九以商賈
為生間有一二士子餬口遐方非粗識之無即
意存漁利詩書禮樂蕩如蔑如即以商賈而言

若輩與外藩互市日久謀利較他處獨精人情十分狡譎而權其子母所得十無一焉奢靡之習游蕩之行比比皆是農之情工之拙所不知也至於冠婚喪祭各縱其欲無搢紳以先之無名教以束之無老成以勸戒之雖宣講

聖諭朔望僅存其文會典通禮衙署內藏其書民俗之弊頽然莫挽有心者當何所移易耶識畧及此不禁感慨係之

古豐識畧卷三十六

長白鍾秀石帆

初稿

崞縣張曾小袁

人部

土默特

刺麻札布土默特人姓博爾濟古特元太祖十六世
孫阿爾坦裔阿爾坦號格根汗初由河套徙豐州灘
築城架屋居之曰拜牲明史訛為板升者也與明通
好封順義王以歸化名所居城至今仍之阿爾坦子
九長僧格號杜梭汗子噶爾圖以避察哈爾東徙隣

喀喇沁為土默特東路即今駐牧巴顏和碩之土默特右翼札薩克其居西路者自格根汗凡四傳至博碩克圖汗仍居歸化城察哈爾強役屬博碩克圖汗不從偕喀喇沁部布顏台吉等敗察哈爾兵四萬於土默特之趙城又敗其赴張家口請明賞兵三千與察哈爾林丹汗交惡博碩克圖汗卒林丹漢襲之有其眾我

朝天聰六年大軍征察哈爾以林丹汗西奔唐古特移師趨歸化城博碩克圖汗子俄木布及其部頭目古祿格杭高託博克等集眾降

詔安堵如故八年以林丹汗竄死大草灘
遣使取道歸化城往諭唐古特

命所部人護送之九年睿親王多爾袞率師收林丹
汗子額哲於黃河西託里圖地貝勒岳託留駐歸化
城所部人告變言俄木布乳母之夫毛罕潛通明沙
河堡守將以歸化城叛偽稱俄木布為西土格根汗
且導明使約喀爾喀兵為外應岳託遣謀往喀爾喀
兵在途追襲之無脫者執俄木布以歸

諭古祿格杭高託博克分守歸化城轄土默特部衆
崇德元年

詔編所屬三千三百餘丁為二旗以古祿格為左翼都統杭高為右翼都統領之託博克尋代杭高子巴桑掌右翼嗣是博碩克圖汗裔分隸左右翼稱台吉刺麻札布祖素爾巴勒濟圖父達木巴世居歸化城隸左翼乾隆二十年

詔徵歸化城土默特兵千隨北路大軍剿達瓦齊於伊犁刺麻札布獻馬三百匹叙功授一等台吉

命乾清門行走二十一年奉

命隨承恩公明瑞赴巴里坤徙厄魯特達什達瓦部眾於阿勒台并以其女妻和託輝特郡王青衮咱卜

會青衮咱卜叛

詔隨左副將軍喀爾喀親王成衮札布由烏里雅蘇
台進剿偵青衮咱卜欲逃往俄羅斯復隨參贊大臣
納穆札爾等輕騎尾之抵杭哈將噶斯青衮咱卜就
擒捷

聞

詔增設土默特一旗封刺麻札布為輔國公授札薩
克隸烏蘭察布盟

勅曰朕仰荷天庥撫綏區宇中外臣工凡有効力宣
猷勞績茂著者罔弗優封爵秩用獎忠勤爾土默特

一等台吉刺麻札布追擒叛逃奮勇有功朕甚嘉之爾其副朕養養之隆恩歸撫爾旗人衆恪守典常靖共爾職勿蹈愆尤敗乃成業國有常刑勗哉無斁二十五年以不入

覲及違例妄行罪議削爵

諭曰刺麻札布自優封公爵以來不思感激朕恩奉公守法乃日耽逸樂恣意妄為本應照議削爵但念公爵究係從前勤勞所得着加恩免削其札薩克及乾清門行走之處一併革退飭令回旗効力三十一年刺麻札布卒次子索諾木旺札勒襲四十九年

詔世襲罔替

古祿格土默特人姓納喇其先本姓土默特因滅扈
倫國之納喇部遂以為姓世居葉赫部葉赫部亡依
土默特博碩克圖汗於歸化城號楚琥爾博碩克圖
汗卒察哈爾林丹汗攻滅土默特役屬之天聰六年
大軍征察哈爾古祿格征林丹汗由歸化城西遁惧
掠匿山砦乃免旋請內附九年來朝

優賚之崇德元年授左翼都統與右翼都統杭高並
駐守歸化城三年春以喀爾喀札薩克圖汗擁眾逼
歸化城馳疏

聞

上統大軍征之扎薩克圖汗遁師旋

諭古祿格及杭高曰爾等所守城小濠狹勢難禦敵
宜於城外建築層垣以資捍衛垣如城高一丈五尺
濶稱之俾可屯兵其上垣四面置四門門各置甕城
四隅各建望樓垣外環以深濠工竣之日內城外垣
嚴加防守敵自不敢窺伺爾等其善為之夏率參領
韜瑚等九十六人來朝

遣官迎宴

詔授一等男爵

賜弓矢冠服冬遣烏巴什等貢朝珠文綺四年獻所
獲明歲給幣五年授其子烏克蘇穆佐領職協守歸
化城六年正月古祿格遣第巴圖等貢駝馬三月復
遣納穆習禮等解送來降蒙古

獎賜白金有差順治元年遣使獻方物

賜雕鞍弓矢皮幣二年晉爵三等子

特頒珠頂貂帽朝衣玉帶甲冑弓矢等物以殊異之
六年睿親王多爾袞征喀爾喀古祿格以兵來會偵
喀爾喀遁乃歸康熙五年卒長子烏巴什泰襲三等
子召赴京隸蒙古正白旗四子錫喇布留歸化城襲

都統九年卒子古睦德襲二十二年内大臣奇塔特
等奉使厄魯特察獲所掠歸化城人巴朗歸之古睦
德二十五年古睦德來朝以厄魯特巴圖爾額爾克
濟農和羅哩携衆降將由歸化城入覲

命速歸護降衆未幾以廢職罷都統

召赴京授佐領隸蒙古正白旗以其叔父阿喇納襲

阿喇納者古祿格第五子也由佐領襲都統二十七

年偕副都統阿迪等選兵偵禦噶爾丹三十年

命護視附近歸化城遊牧之喀爾喀衆無致失所三

十五年偕阿迪等隨大將軍費揚古擊噶爾丹於昭

莫多師旋運礮七十九置歸化城三十六年正月助
軍駝三月

駕由歸化城視師甯夏以土默特士衆委靡弓馬不
嫻皆由左翼都統阿喇納及右翼都統阿弼達等軍
律廢弛所致

詔削職停右翼都統世襲改用京員以阿喇納兄子
古睦德重襲左翼都統四十三年卒子丹津襲先是
烏把什泰襲三等子卒阿玉什襲阿玉什卒子多爾
濟襲五十九年多爾濟以罪革三等子

命丹津兼襲雍正元年疏請建文廟於歸化城左右

翼各設滿學教官一歸化城增設理事同知一
允之復以訓所部弁兵嫻弓馬

諭右翼都統如世襲舊制以阿弼達子根敦補授其
副都統職聽丹津察舉九年大軍議剿噶爾丹策凌
命丹津與副都統五十六酌辦歸化城駐兵事宜尋
因移駐洪果爾鄂隆

詔察給兵騎十二年以烏喇特部被災損牧畜遵

旨察閱戶口發歸化城帑賑之十三年九月奏歸化
城每年解額爾德昭糧米四萬八百石向用內札薩
克等牛車及喀爾喀官駝請自來年始募商駝輓運

停喀爾喀官駝令善牧備軍用又應運米向由山西
巡撫撥解道行不無竭蹶請以商人所納倉米十萬
石就近解送庶經費可省動用亦便

上從其請十二月

命大臣赴歸化城視形勝地築城屯田以丹津及根
敦協理之乾隆元年設馬廠於歸化城北

詔丹津董牧務二年卒先是丹津子達奈居京由世
襲佐領歷官散秩大臣卒無子以丹津族子札什泰
襲佐領至是丹津妻請即以札什泰為丹津嗣

詔停襲左翼都統仍襲三等子兼授三等侍衛二十

四年

諭曰左翼古祿格所遺都統職前因丹津無嗣停襲著加恩照右翼例改授三等男爵令三等子札什泰兼襲三十年卒子福保襲三等子兼三等男

託博克土默特人姓把拉格特世居歸化城隸土默特博碩克圖汗部因察哈爾林丹汗滅土默特遂為所屬天聰六年大軍征察哈爾託博克偵林丹汗西遁籲請內附九年來朝

優賚之崇德元年授三等參領隸右翼與都統杭高協守歸化城三年率子瓦駞來朝授一等輕車都尉

世襲瓦駟以佐領授騎都尉五年

詔晉託博克一等參領賚弓矢冠服諸物六年

賜貢使圖捫博奇等宴及甲冑冠服順治元年獻駝馬貂皮三年隨豫親王多鐸擊喀爾喀土謝圖汗及車臣汗兵於札濟布喇克四年叙功

詔授右翼都統時杭高子巴桑因軍務獲罪削職以託博克代六年復隨英親王阿濟格討叛鎮姜瓖於大同屢敗賊衆康熙九年卒

賜謚果壯長子瓦駟以騎都尉兼襲一等輕車都尉詔加為三等男爵卒弟古魯襲都統職十三年

詔選兵入邊會剿陝西叛鎮王輔臣十四年正月偕副都統席第等率土默特兵七百至榆林聽調

諭獎其聞命速赴三月由榆林迎提督陳福軍於興武營會鄂爾多斯部貝勒索諾木亦率兵至五月合圍花馬池叛賊朱龍糾眾來援大軍迎擊之朱龍遁城守賊出降花馬池平六月隨大軍復磚井安邊諸砦七月進圍定邊撫定下馬關師還駐榆林八月由西安援剿固原十五年正月甯夏兵變

詔古魯等防守靈州定邊等處旋請屯黃河岸扼寇衝

允之三月敗賊衆於靈州六月闕隴平叙軍功以兄
瓦駟已卒兼襲三等男二十年卒子拉察布襲二十
一年拉察布卒以其子什第襲三等男以其叔父烏
巴什襲都統什第卒子達什色棱襲達什色棱卒子
納木札布襲納木札布卒子甘保襲烏巴什者託博
克第三子康熙二十一年由佐領襲都統二十八年
備兵防噶爾丹二十九年運殺虎口倉米濟都統額
赫納軍三十五年副都統多爾濟等隨西路大將軍
費揚古進擊噶爾丹

命安郡王瑪爾渾統土默特兵防歸化城噶爾丹既

敗遁瑪爾渾移駐愛畢哈錫喇穆棱界留兵所部以
烏巴什子副都統阿弼達領之是年烏巴什卒阿弼
達由副都統襲都統三十六年以不訓練士卒罪削
職停襲改用京員札喇克圖俄赫楚忠相繼代任雍
正元年

諭曰歸化城土默特兩旗原在四十九札薩克內其
都統副都統等官皆係本部初附功臣子孫世職前
因廢弛軍務革退都統另選京員管轄今舊習漸改
訓練兵弁行伍整齊凡行圍出征等事與內地弁兵
一體効力不負

聖祖仁皇帝教育生成之意宜復舊制以阿弼達之子副都統根敦襲補右翼都統其副都統缺仍令丹津將兩旗內應補人員與原任都統副都統世家子孫內保送擢用欽此根敦係阿弼達長子初授副都統康熙五十九年授參贊大臣隨振武將軍傅爾丹由阿勒台進剿策妄阿喇布坦至格爾額爾格擒宰桑貝坤等百餘人復焚其糧於烏蘭呼濟爾

上優賚之雍正元年襲都統職二年

詔率滿洲兵二千赴巴里坤防禦青海叛賊羅卜藏丹津尋分兵千駐吐魯番師旋入覲

賜孔雀翎及

御書福字白金等物九年三月大軍議剿噶爾丹策
凌根敦率土默特兵千赴涼州聽調七月會西路軍
於巴里坤偵噶爾丹策凌遣兵由伊犁犯北路軍於
和通呼爾哈諾爾根敦隨西路大將軍岳鍾琪為搗
巢計襲擊烏魯木齊大敗之追至額爾穆克河而還
十月蒙

上諭以土默特將弁兵丁連歲從征甚屬勤勞已命
頒帑賞賚至都統根敦向在阿勒台軍營効力十有
餘年今復至巴里坤懋著勞績朕甚嘉之特賞御用

冠服及銀二百兩以示獎勵十年隨副將軍常賚等率兵三千餘赴哈密援剿十三年撤兵由塔勒納沁入嘉峪關還軍歸化城是年

詔偕丹津協理屯田事乾隆元年叙功

賚幣四年入朝七年卒子班達爾什襲入覲

賜孔雀翎扈蹕五台山以校射獲

優賚十九年卒

有碑立墓側諭賜祭文

詔停襲右翼都統改三等男以子賽音弼里克圖襲二十年

諭曰歸化城右翼都統原係

國初土默特杭高所遺世職後改授託博克嗣因子孫不勝其任由京員補授四次復念有可用之人是以令根敦及子班達爾什襲授是職朕思都統有整飭軍伍之責非閒散世職可比班達爾什之子賽音弼里克圖係前鋒職今若驟授都統不惟恐弗勝任且旗內台吉大員甚多亦恐未必服其調度著將班達爾什所遺都統職另簡京員補授其本支內加恩改授三等男爵令賽音弼里克圖襲欽此是年入覲授左翼副都統二十五年以病罷二十六年卒無嗣以從弟賽音岳蘇圖襲三等男爵

按以上三傳由

欽定蒙古王公表傳抄錄表傳成於乾隆中年以後承襲世次尚俟確查補入傳中所言

太宗文皇帝征察哈爾年月與魏氏記微異且魏氏記無阿爾坦此傳無俺答似阿爾坦即俺答之轉音蒙古言語本無定字正不必以拜姓為是以板升為非矣其以土默特為姓與滿洲八旗以地為姓者適同乃詢之土默特八旗轉不知有姓土默特之說其左翼右翼亦第分古祿格託博克所統兩旗而言與魏氏記左翼為濟拉

瑪後右翼為元後者不同彼兩翼在歸化城土
默特之外此兩翼專指土默特之在歸化城者
也字書冒頓兩字冒音墨頓音突似與土默特
字音相近然各書從無此說未便臆斷今各世
職距城遼遠參領佐領各家譜牒之藏一時未
能周悉畧識顛末其增續仍俟他日爾

古豐識畧卷三十七

長白鍾秀石帆

崞縣張曾小袁 初稿

人部

呼圖克圖

呼圖克圖者刺麻之學道能轉世分掌教化猶華言
再來人明史所謂尚師實理事之大僧官也其秩有
國師禪師及札薩克達刺麻等號分駐各蒙古部落
而皆遙領於西藏達賴班禪其來歸化城之始在明
隆慶萬歷間欽定蒙古源流以歸化城立廟為
時事惟云歲次癸酉考癸酉為萬

年歷元元太祖十八世孫阿爾坦汗即俺答年六十八
歲既與明通和好又收服阿木多喀木等部落於是
阿里克刺麻為唎誦大利益分別取舍等經解脫
三惡緣及來世罪孽汗遂專志經典始念六字心咒
其姪鄂爾多斯部博碩克圖濟農來見叔曰前生失
陷城池因與中國之人結讐以致出亡失絕今汗壽
已高漸至於老事之有益今生及來世者惟在經教
今聞西方純雪地方大慈大悲觀世音菩薩出現祈
遣使請來依從前神祖忽必烈汗與帕克刺巴刺麻
設立道教豈非盛事乎阿爾坦汗然之遂為右翼三

萬人和好右翼三萬眾為巴爾斯博羅特長子哀必

萬眾據十二土默特而遣使聖識一切之索落木札

木蘇呼圖克圖使未至其聖識刺麻靜坐微笑曰阿

爾坦汗前世已經善緣我今必往於是左翼蒙古三

萬人議於青海之察卜齊勒雅地方修造廟宇初遣

八百人往迎次遣千人往迎再遣三千人往迎四次

汗自領萬人迎於察布哈勒廟每次獻幣帛諸寶駝

馬無算刺麻為各言其前世三生善緣於是諸台吉

奏言前世青吉斯汗之孫庫騰汗與忽必烈汗以道

教使天下太平今值屢世爭戰之餘但值聖刺麻與

大力汗二人相遇伏願自今將湧血之大江變為溢
乳之淨海普徧大衆無有窮極是時漢番土伯特蒙
古等十萬餘人無不贊嘆希有從前蒙古人死後多
宰駝馬殉葬為行糧自此改按八節持戒誦經每月
治齋三日禁殺牲漁獵創立十善福政尊以聖識一
切瓦齊爾達賴刺麻之號刺麻亦贈汗台吉等以經
教護法之號阿爾坦許於歸化城立廟以八寶莊嚴
佛像博碩克圖汗許將一百八函甘珠爾經用寶石
金銀裝修達賴刺麻亦許於尼濟木搭拉地造弥勒
佛像使其徒呼圖克圖先往廟中入馬明王定土神

獻珍寶助工既而刺麻親至天散花雨又收服雷擊
刺麻之術士引入菩提此呼圖克圖始來歸化城及
土默特地方始立佛廟而我

朝因之遂藉以綏服蒙古者也事詳

欽定蒙古源流八卷魏氏源所作

國朝撫綏西藏記後嘗附錄之而於刺麻歷代譜系
事跡記中言之尤詳讀之可以畧知其梗概其上篇
云西藏古吐番元明為烏斯藏其人則謂之唐古特
亦曰土伯特其地分三部曰康即四川打箭爐外巴
塘察太多之地為前藏亦曰喀木曰衛即布達拉及大招

寺本吐番建牙之所今達賴居之為中藏

布達拉華言普陀宗

也乘曰藏即札什倫布本拉藏所治今班禪居之為後

藏

札什倫布華言吉祥山也

又並極西之阿里則稱四部云北界

河源南界大金沙江西距雪嶺東西六千餘里南北

五千餘里距京師萬有四千餘里由川陝滇入藏有

三路皆先至前藏而後西至中藏又西至後藏又最

西至阿里在五天竺之東非古佛國也而距天竺較

近故經教至多持陀羅尼尤驗多僧無城郭僧居土

臺者皆持戒律不持戒者居土臺外自唐太宗以文

成公主下嫁吐蕃贊普好佛立寺廟西藏始通於中

國元世祖封西番高僧八思巴為帝師大寶法王以
 領其地後嗣世襲其號而西藏始為佛教宗主元史釋老
 傳八思巴者吐番人生七歲誦經典數十萬言能通
 大義國人稱曰神童年十有五謁世祖潛邸即位導
 為國師命製蒙古新字字僅千餘凡四十一母頌行
 天下今後藏薩迦有刺麻即元帝師後人為紅教之
 宗其教先娶妻生子有明洪武初太祖以西番地獍
 後則不入室始登法座
 人悍欲綑其勢而分其力故凡元代法王國師後人
 來朝貢者輒因其故俗許其世襲以化獍俗尊中國
 永樂初成祖則兼崇其教聞西僧哈力麻有道術國
 人稱曰尚師遣使迎至京師為高帝后薦福於靈國
 寺有卿雲甘露青鳥白象之祥封大寶法王西天大

善自在佛其徒三人皆封國師其後又封大乘大慈
二法王禮之亞於大寶於是其徒爭來朝貢輻輳京
師所封有闡化闡教輔教護教贊善五王又授西天
佛子者二灌頂大國師者九灌頂國師者十有八法
王等死其徒輒自承襲歲一朝貢畧與土司等嗜茶
貪貢市冀保世職故終明世無西番患然皆紅教非
黃教其黃教宗祖則創於宗喀巴一名羅卜藏札克巴以永樂
十五年生於西甯衛得道於西藏之甘丹寺成化十
四年示寂初明代諸法王皆賜紅綺禪衣本印度袈
裟舊式也其後紅教專持密咒流弊至以吞刀吐火

炫俗無異師巫盡失戒定慧宗旨宗喀巴初習紅教
既深觀時數當改立教即會眾自黃其衣冠遺囑二
大弟子世世以呼畢勒罕轉生演大乘教呼畢勒罕
者華言化身也二弟子一曰達賴刺麻一曰班禪刺
麻刺麻者華言無上也今俗加口旁曰喇嘛其班禪
觀音分體之光班禪為金剛化身在皆死而不失其
印度已轉生數十世其說不可得詳
通自知所往生其弟子輒迎而立之常在輪回本性
不昧故達賴班禪易世互相為師其教皆重見性度
生斥聲聞小乘及幻術下乘當明中葉已遠出紅教
上未嘗受封於中國中國亦莫之知也達賴一世曰

敦根珠巴者即贊普之裔世為番王至是舍位出家亦名羅倫嘉穆錯嗣宗喀巴法傳衣鉢始以法王兼

藏王事其二世曰根敦嘉穆錯自置等巴等代理兵

刑賦稅其弟子稱呼圖克圖則分掌教化當明正德

時始以活佛聞於中國武宗遣中使迎之不至武宗崩世宗立盡斥遣番僧人益

謂達賴之不知三世曰鎖南嘉穆錯明史所稱鎖南堅

錯也名益著青海河套諸蒙古罔不嚮服順義王俺

答躬入藏迎至青海建仰華寺奉之大會諸部飲長

生水鎖南戒其好殺勸令東還而俺答亦勸其通中

國乃自甘州遺明大學士張居正書自稱釋迦牟尼

比邱中國始知有活佛而紅教中大寶大乘諸法王亦皆俯首稱弟子改從黃教化行諸部東西數萬里熬茶膜拜視若天神諸番王徒擁虛位不復能施其號令傳至第四世曰雲丹嘉穆錯生蒙古圖古隆汗族十四歲入藏坐牀二十八歲示寂故事跡不著然河套青海蒙古守其戒不敢鈔掠西邊安枕者五十餘年第五世曰羅卜藏嘉穆錯當我太宗文皇帝崇德二年喀爾喀三汗奏請發帑使延達賴刺麻四年因厄魯特使貽達賴書於是達賴班禪及藏巴汗青海固始汗聞我

朝興東土各報使繞塞外數萬里以崇德七年至盛
京奉書及方物約共行善事并獻卦驗知必當一統
明年遣使存問達賴班禪稱為金剛大士是為我
朝通西藏之始順治初天下混一達賴班禪及固始
汗復各遣使獻金佛念珠表頌功德

詔賚甲冑弓矢皮幣并遣使迓達賴九年冬至京師
賓之於太和殿建西黃寺居之及行餞之南苑德壽
寺授金丹印封西天大善自在佛領天下釋教普通
鄂濟達賴刺麻

命和碩親王以八旗兵送之康熙二十五年第五世

達賴死有第巴曰桑結者欲專國事秘不發喪偽言
達賴入定居高閣不見人凡事傳達賴命行之自是
益橫既袒準噶爾以殘喀爾喀蒙古復唆準噶爾以
鬪中國又外構策妄內鬪拉藏汗遂招準兵寇藏之
禍西北擾攘數十年皆第巴桑結一人所致噶爾丹
者亦四厄魯特之一曾入藏為刺麻與第巴暱歸纂
其汗自言受達賴封為準噶爾博碩克圖汗又喀爾
喀自

國初時以入藏隔於厄魯特乃自奉宗喀巴第三弟
子哲卜尊丹巴之後身為大呼圖克圖位與班禪相

亞凡數十年矣至是喀部車臣汗與土謝圖汗交惡
構兵

聖祖遣使約達賴和解之第巴奏使噶爾丹西勒圖
往蒙古謂刺麻坐牀者為西勒圖蓋達賴大弟子也
而喀部哲卜尊丹巴亦奉

詔莅盟壇與西勒圖並坐噶爾丹使其族人隨之觀
釁因責喀部待達賴使無加禮詎責之為土謝圖汗
所殺噶爾丹遂以報讐為名襲侵其部喀爾喀東走
聖祖申命達賴遣使罷兵第巴使濟隆呼圖克圖往
反陰啖之二十九年遂寇漠南為我兵所敗噶爾丹

託濟隆代乞和頂佛立誓而遁第巴內慚乃託達賴
意合青海蒙古及厄魯特五台吉上尊號

聖祖不受屢遣京師刺麻入藏探之歸言第巴桑結
使已遙望禮拜有刺麻立高樓上絳帳之中香烟繚
繞覲不分明三十三年達賴遣使入貢言己年邁國
事皆決于第巴乞與封爵

詔封第巴桑結為土伯特國王三十五年

聖祖親征噶爾丹至克魯淪河聞噶爾丹敗竄時慰
其部下曰此行非我意乃達賴刺麻使言南征大吉
是以深入也

上謂達賴存必無是事乃遣使賜第巴桑結書責其
唆袒準夸之罪且言達賴存日塞外無事者六十餘
年頃詢諸降番知其脫緇已久何至今猶匿不奏聞
如達賴果存此番使往必令相見第巴桑結恐次年
密奏言為衆生不幸第五世達賴於壬戌年示寂轉
生靜體今十五歲矣前恐唐古特民人生變故未發
喪今當以丑年十月二十五日出定坐牀求

大皇帝勿宣泄

西藏不紀天千惟以地支所屬紀年亦以十二月為一歲以寅為正月亦

有閏月但與中國閏不同如雍正十年閏五月其地則閏正月十三年乙卯閏四月其地則於寅歲閏七月且無小建而有閏日如是月當閏初二日則於初一日後即初三日矣每月必有初一十五三十而閏

日則但於中間並封進達賴臨終牀箒尸鹽拌像

上許為秘之俟十月宣示內外第巴使者歸途遇策
妄那布坦會禽噶爾丹之兵復宣言達賴已厭世爾
部落兵毋得妄行策妄哭而歸

上以第巴始終反覆持兩端乃追還其使傳集各蒙
古宣示密封則像首已墮第巴使驚仆於地四十四
年第巴謀毒拉藏汗不遂欲以兵逐之拉藏汗集眾
討誅第巴拉藏汗者青海固始汗之孫也自三十六
年嗣爵後因議立新達賴刺麻故與第巴交惡至是
奏廢第巴所立之假達賴

詔執獻京師行至青海病死

坦即方畧所云策妄那布坦遣使爭迎之而拉藏

不遣也

而藏中所立博克達山之伊西嘉穆錯為第六

世達賴者青海諸蒙古復不信之而別奉裏塘之噶爾藏嘉穆錯為真達賴以康熙二十二年轉生二歲著靈異至是廿歲矣諸蒙古迎至青海坐牀請賜丹印與藏中所奏互相是非

上恐其構釁

詔暫居西甯紅山寺旋移塔爾寺塔爾寺者西甯衛城西南四十里之塔山宗喀巴瘞胞衣地黃教祖寺也青海周數百里十三峰環繞之海中有二島人跡

不至

即唐時龍駒島

番僧習禪定者於冰合時裹一歲糧休

為往往出異僧故青海佛法與西藏相亞兩部爭議

未決五十六年七月策妄遣台吉大乘零敦多希領

兵入藏執殺拉藏汗搜各廟重器送伊犁禁新達賴

刺麻於札克布里廟五十七年西藏諸土伯特合詞

請奉青海呼畢勒罕擁置禪榻而以藏中所舊立者

為贗

詔許給冊印於五十九年春諸蒙古汗王貝勒台吉

扈從達賴刺麻入藏

詔加封宏法覺眾第六世達賴刺麻於九月登座取

拉藏所立博克達刺麻歸京師蓋自第五世達賴卒
後三十餘年兩立假刺麻西陲倣擾至是始定焉論
者謂達摩創法震旦有一花五葉之讖至六世果以
衣鉢啟爭故六祖不復傳衣鉢與宗喀巴至第六世
達賴之事若一轍物盛難繼始必有終天數所極佛
法不能違而況人事與

內節去大兵平定厄魯特數
語因與篇目無關緊要祇取

達賴
世系

刺麻
之麻其下篇云初雍正元年哲卜尊丹巴呼圖

克圖自喀部來朝卒於京師年九十矣

上親臨奠賜名號冊印如達賴班禪之例遣使護其
喪歸庫倫其後五年喀爾喀奏呼圖克圖呼畢勒罕

轉生於庫倫

詔賜金十萬造寺以綏喀爾喀之衆又為駐京之章
嘉呼圖克圖後身造寺於多倫泊以綏內蒙古之衆
章嘉者

上在雍邸時所從咨佛法者也方是時

世宗憲皇帝天縱神悟夙覺大乘優禮高僧方將以
君師宏法教普利羣生而二年即有青海刺麻助羅
卜藏丹津之叛其青海諸寺刺麻衆各數千羣起騷
動甚至以察罕諾們汗大刺麻亦黨賊拒戰王師討
平之

上謂玷辱宗門莫斯為甚乃收各寺明國師禪師印
并定制廟舍無逾二百楹眾無逾三百人冬

命大臣正副二人分駐前後藏鎮撫之移達賴刺麻
於西裏塘之惠遠廟以避準噶爾八年遷於泰甯護
以兵千十二年

詔果親王偕章嘉呼圖克圖赴川送達賴由泰甯歸
藏其哲卜尊丹巴於九年移多倫泊以避準噶爾者
至是亦返庫倫乾隆二十二年

詔加封敷教安眾大刺麻四十五年

高宗七旬萬壽第六世班禪來朝祝釐

詔倣後藏札什倫布式建須彌福壽之廟於熱河班
禪自崇德中同達賴通貢其第一世曰凱珠布格埽
克巴勒藏二世無考
順治初以年老未隨達賴入覲者皆其第四世羅卜
藏垂吉嘉穆錯也第五世曰羅卜藏伊什於乾隆二
年示寂第六世曰羅卜藏巴丹伊什於乾隆六年登
坐至是年四十有二矣七月班禪至接見於避暑山
莊之澹泊誠敬殿初

上習蒙古語及平回部金川即習回語西番語茲因
班禪來覲復習唐古特語故重譯朝見告語如一家
舊以達賴班禪有高行入覲惟跽不拜至是班禪固

請拜

上嘉其恪誠從之至京接見於南苑德壽寺仍居西黃寺講經放參皆

世祖禮達賴處也京師西山僧某往論佛法責以宜居西番清淨式衆不宜入中國過受崇奉班禪謝之十一月以痘終京師

詔即其地建清淨化域明年春舍利金龕西歸

駕幸西黃寺拈香送之而留其高弟子羅卜藏敦珠布者領班第二十人住持札什倫布廟傳授後藏經律選內地刺麻百八十人習焉是年冊封第七世達

賴刺麻時年二十二歲尚未受封至是班禪卒乃封
達賴以綏唐古特之衆初達賴刺麻之呼畢勒罕一
世二世出後藏三世出前藏四世出蒙古五世出前
藏六世出裏塘皆非一地一族班禪及大呼圖克圖
亦然至乾隆末而各大刺麻類多兄弟叔姪且多出
蒙古汗王貝勒子弟甚至哲卜尊丹巴示寂適土舍
圖汗之福晉有妊衆即指為呼畢勒罕及彌月竟生
一女尤貽口實損蒙古之敬信蓋宗喀巴經言達賴
六世班禪七世後不復再來故登坐者無復真觀密
諦祇憑垂仲降神指示垂仲者猶內地之師巫也又

達賴班禪親族多營為大呼圖克圖以專財利致有

仲巴兄弟誨盜之禍

仲巴呼圖班禪刺麻之兄盡有班禪入覲所得錫賚布施財物

其弟舍瑪爾巴垂涎不遂憤唆廓爾喀入寇

上久悉其弊欲革之而未有會也乘用兵之後五年十

廓爾喀深入福康安海蘭察大舉討平之

特運神斷創頒金奔巴瓶一供

於中藏之大招寺遇有呼畢勒罕出世互報差異者

納籤瓶中誦經降神駐藏大臣會同達賴班禪於宗

喀巴前掣之而各札薩克蒙古所奉之呼圖克圖其

呼畢勒罕將出世亦報名理藩院與駐京之章嘉呼

圖掣之瓶供雍和宮尤元明以來所未有章嘉呼圖

克圖者其先於康熙中自藏來朝乃第五世達賴之
大弟子也

聖祖優禮之命住持蒙古多倫泊之彙宗寺章嘉通
宗乘為

世宗藩邸時所敬逮其第二世呼畢勒罕轉生於多
倫泊

詔造善因寺居之

高宗朝奉召來京師翻定大藏經咒又佐莊親王修
同文韻統晚年病目能以手捫經卷而辨其字於四
十一年跌逝京師是為黃教第四支與哲卜尊丹巴

一支皆住持蒙古亞於達賴班禪二支而藏中之紅帽十三支黑帽數小支則不暇詳述云綜計刺麻之能出呼畢勒罕入理藩冊者西藏號呼圖克圖者十有八號沙布隆者十有五漠北蒙古十有九漠南五十有七青海番地三十有五四川察木多番地五又駐京呼圖克圖十有四共呼畢勒罕百有六十惟青海諾們罕一支久同世襲許以親族入籤又嘉慶十三年第八世達賴之呼畢勒罕靈徵衆著由駐藏大臣奏聞請

旨不復瓶掣是二者為破格然康熙中有丹巴呼圖

克圖出世時能自述前生事受封清修禪師住持五
臺山竟以酒色不檢黜退是能知風命之真呼畢勒
罕隔世尚或迷其本性云凡刺麻朝貢除達賴班禪
哲卜尊丹巴三人歲遣貢使不列年班外其餘大刺
麻駐漠南北蒙古各部者班六每歲一至岷州刺麻
班四三年一至凡西藏刺麻皆袈裟僧衣惟將入朝
貢始易內地衣冠其駐京刺麻或在京掌教或赴藏
辦事或分駐盛京熱河多倫泊五臺山或派往伊犁
及四川之懋功寺分闡黃教三歲而更代臣源曰西
藏誠非古佛國而自元明以來佛教則衛藏為盛其

始不過內受冊封師弟相嗣至宗喀巴崛起不藉中朝封號而覺出諸大法王上西北諸行國常視為嚮背中國常用為銜勒亦佛法因緣有時會興廢非人力與夫大雄涅槃不聞轉世即宗喀巴經亦言達賴班禪轉生止六七世自後不復再來今之黃教非昔之黃教尤非古之釋教宜若可以已焉然自葱嶺以東惟回部諸城郭國自為教外使無世世相傳之呼畢勒罕以鎮服僧俗則數百萬衆必互相雄長狼性野心且決驟而不可制蓋邊方好殺而佛戒殺且神異能降服其心此非堯舜周孔之教所能馴也

高宗神聖百族稟命

詔達賴班禪兩汗僧當世世永生西土維持教化蓋自金奔巴瓶之頒而

大聖人神道設教變通宜民者如山如海高深莫測矣

天章丁寧申諭比於吏部之為籤部視元代尊奉帝師干紀妨政者曷可復道里計哉此篇五節錄其後記

云達賴所轄寺廟三千百有五十餘所刺麻三十萬二千五百有奇百姓十有二萬千四百八十一戶班禪所轄寺廟三百二十七所刺麻萬有三千七百有

奇百姓六千七百五十二戶乾隆二年理藩院造冊其刺麻稱呼圖克圖者不可勝數皆同土司各轄番民不設官吏僧多於民君并於師介出家在家之間釋典言普陀有三一在天竺南海中一在中國浙江定海一在西藏平地連龜二峯高百餘丈其一達賴居之其一為高行刺麻靜修之所其達賴所居因山勢灑迤疊甃而成樓十有三重高三十六丈七尺有八寸上有金殿三金塔五僧舍萬餘間金玉銀銅佛像無數歷代寶器充牣耀目皆創建於唐時贊普而歷世達賴與藏巴汗重葺之西殿則宗喀巴遺蹟存焉有手足

印在黃酥油上久而不渝為番民所頂禮山之東五里為大小招寺皆唐公主所建西番謂廟曰招猶言大寺小寺大招高樓四重殿宇闌干皆銅塗金左廊有贊普及公主暨白布國王女塑像供神佛萬計釭酥為燈小招規制亞之大招供釋迦牟尼佛乃唐公主鑄自中國請往者小招所供珠吉多佛其座額書寂默能仁則亦釋迦像也世俗妄傳大招寺像乃白布國王女成佛小招寺像即公主侍女成佛直委巷之談耳甘丹寺距山八十里則宗喀巴成道之所有遺塔及所坐禪榻以十月二十五日為成道之期是

夕萬戶然燈光明如晝遇節期則達賴升坐講甘珠爾經丹珠爾經二經乃西藏大乘經之最尊重者圍聽膜拜千計達賴所坐疊纒綸數十重番民得其一摩頂一擊拂者如不世之遇班禪所居札什倫布寺次之相距七百餘里遠近瞻禮受法傳戒相等有呼圖克圖分掌教化其兵刑賦稅則第巴噶布隆戴喇堪布等分理之有番律四十一條甚酷番民病故後所有之財半供達賴喇嘛半施各寺諷經追薦故國中布施多於賦稅此外有西南布魯克二部世傳紅教寺廟百有二十刺麻二萬五千餘南近天竺界惟

番僧往來漢民罕至者此篇節錄松湘圃相國綏服
紀畧則云紅教刺麻最尊者為薩迦呼土克圖即元
帝師怕斯巴刺麻之後也在札什倫布之西宗喀巴
初年亦學經於薩迦廟本出一源及學成乃自立宗
余巡邊見薩迦呼土克圖詢其經典悉同黃教其僧
亦無眷屬惟薩迦有妻室朔望相見餘時不往來祇
為生子襲衣鉢計蒙古番眾凡崇信黃教者亦皆敬
禮薩迦如達賴班禪蓋紅黃二教本同其邪術惑人
乃紅教之末失非薩迦廟之本宗也其與黃教異者
一則衣冠異色二則咒語稍別三則傳子與轉生不

同如斯而已乃歸化城大小刺麻惟禮服升坐說法
袈裟袍褂俱用黃色餘皆紅黃兼用幾莫辨其何宗
且袍褂冠履除紅黃而外與軍民官吏無別常熟錢
氏出塞紀畧言歸化城刺麻廟有一僧被黃衣袒右
肩南面坐號呼土克圖自言能憶前生數世貌莊氣
靜類有道者此適遇其升坐時爾近則升坐亦無此
服飾豈以有品級大刺麻於年班入覲必易頂戴袍
褂故平日亦概從其制耶余慶遠維西見聞記謂維
西黃教刺麻夏戴平頂竹笠冬戴平頂方氈帽此間
小刺麻出寺行走夏笠必用黃紗絹縫裏表裏製極

精細氈帽上用黃毛蓋頂長尺許紛紛四垂如披髮
狀春秋間方戴之冬日則概用貂狐帽沿無用氈者
又記稱紅教刺麻十三種維西係格馬一種其長五
人輪回生番地掌教名曰五寶乾隆八年紅教謨勒
孤刺麻轉生於維西民家名曰達機年七歲其弟子
輩占卜尋至達機先一日即告知父母及期揀珠認
鉢及所書心經笑摩衆頂歷言前生事不爽遠近爭
皈頂禮迎去乾隆乙卯有善知識刺麻亦格馬四寶
之高弟子轉生於維西通事王善家丁亥年四寶命
刺麻數人以金銀馬騾夾迎入藏每程未至山川皆

預知之則是紅教亦有呼畢勒罕轉生不獨黃教矣
刺麻家譜曰經簿其布達刺經簿詳載歷代源流時
有續修各處刺麻皆有之惜外人未易見耳經簿言
第一世達賴生於明洪武二十四年辛未二十歲受
大戒壽八十六歲第二世生於成化十二年丙申第
三世生於嘉靖二十二年癸卯名索諾木嘉木磋即
魏記之鎖南嘉穆錯親赴各蒙古地方布行黃教蒙
古王等咸稱為達賴刺麻班禪額爾達拉萬歷間封
為大國師第四世生於萬歷十七年己丑十五歲至
藏魏記十萬歷間封為沙布達多爾濟桑結能驅邪

逐崇曾於石上踏留足印第五世生於萬歷四十五年其生之日與釋迦牟尼佛同崇德七年同班禪刺麻差烏巴什台吉達盛京進貢約行善事餘與魏第

六世名羅卜藏林沁倉洋嘉木磋康熙二十二年生

於蒙巴拉沃松地方按通志康熙四十四年拉藏汗請以阿王伊西為達賴刺麻而

青海諸蒙古所別奉之噶爾藏嘉穆錯亦第七世名

羅卜藏噶勒桑嘉穆錯康熙四十七年生於裏塘地

方此即青海蒙古所別奉者惟生年與魏氏記大相懸遠且以同時奏立互相是非之人而分為六世

七世其經簿第八世名羅藏丹碑旺楚克江巴爾嘉

木磋以乾隆二十三年戊寅生於後藏托結地方即

大臣記所云嘉慶十三年駐藏此下尚未續修今達賴

為第十一世其第九世未詳第十世於道光十六年

圓寂又聞今達賴於道光十五年生裏塘泰甯民家

其祖父本陝人以業窰至泰甯母番女也前藏中亂

時達賴嘗移牀泰甯故亦為勝地生三歲藏中蹤跡

得之自其家移大寺中有五色雲覆頂謝都閻曾親

見之其說最確魏氏謂達賴出微賤一旦置身青雲

始在孩提即為

天子所隆禮二萬里王公僧俗男婦無不誠心敬奉

非福德殊異何能臻此昔漢高祖所在其上常有雲

氣韓魏公廷唱第一太史奏五色雲見皆本體精氣
所發非山川之雲所見良是惟其生時年歲在第十
世未示寂之先不無可疑經簿又言班禪第一世名
刻珠尼瑪綽爾濟伽勒布格爾生於明正統十年乙
丑與魏氏記異二世名珠拜旺曲索諾木綽爾濟朗
布生年缺三世名結珠拜旺曲羅布藏敦玉珠巴生
於宏治十八年乙丑魏氏記未之及四世名班禪羅
卜藏綽爾濟嘉勒參生隆慶元年丁卯崇德七年遣
使進貢我

太宗文皇帝詔令班禪達賴二人年少者拜年長者

為師學習經典壽九十六歲五世名班禪羅布藏伊
喜生於康熙二年癸卯五十二年

賜金冊印注明札什倫布各廟宇地方屬班禪管理
六世名班禪哲布尊巴勒丹伊喜生於乾隆三年戊
午三十年

賜金冊四十五年入覲

賜四體字玉冊玉印以上三世亦與魏氏記小異第
七世生於乾隆四十七年壬寅以下亦未續修達賴
有金印玉寶金印文曰敕封西天大善自在佛統領
天下釋教普通瓦赤拉坦喇達賴刺麻之印至印文

同惟不稱印而稱寶又有金丹玉冊玉冊長六寸餘
寬約四寸頁厚二分邊刻龍文面書勅封達賴刺麻
玉冊其字四體前漢文次唐古忒文次蒙古文最後
國書其實國書右行先國書次蒙古文次唐古忒文
最後乃漢文也凡書籍碑刻冊十五頁不聯金丹大
小如之亦十五頁而聯其腦如展書者皆用紫檀座
盛班禪額爾德尼有金丹印無玉冊印達賴下有二
呼圖克圖一為濟隆一為第穆皆以所轄地名稱之
濟隆在後藏之南第穆在工布又有二那門罕或作
諾門罕一為榮增那門罕榮增者梵言師父為達賴

授經之師一為噶勒丹錫呼圖薩瑪第巴克什那門汗其人名阿旺札布巴勒楚勒齊木洮州人先時在京師以前輩達賴圓寂至藏為那門汗代理賞噶勒丹錫十二字名號道光二十四年駐藏大臣奏革之向例達賴圓寂以班禪或兩呼圖克圖及那門汗代理呼圖克圖較尊那門汗次之阿旺札布巴勒楚勒齊木前後代理達賴事二十餘年跋扈不法第十世達賴之死藏人洶洶言其謀毒堪布及衆刺麻詐於大臣事無左驗莫能究也有不服者更以抵罪阿旺札布巴益驕黨羽日衆厚結大臣以自固至是敗竄

黑龍江藏中管理寺院講習經典之僧官皆名堪布最大者曰總堪布次曰通巴堪布達爾罕堪布品級大小有差札薩克三人乃濟隆第穆兩呼圖克圖及那門汗理事之大僧官也歲琿者達賴起居之內侍也其次曰森琿又次曰曲琿職司經卷又次曰孜仲職司燃茶歲琿以下皆堪布之有職事者卓尼爾達賴之傳事者也達賴刺麻山上儲金銀緞足珍寶之內庫曰商上主庫之僧官曰商卓特巴曰仔琿皆四品商卓特巴本即倉儲巴以諸處皆有故特異其名其主徵收者曰業爾倉巴五品主刑名詞訟者曰噶

厦曰協爾幫五品主文書者曰大中譯六品曰小中
譯七品通傳譯語者曰羅藏娃主馬廠者曰達琿六
品分管地方曰希約第巴曰朗仔轄第巴皆五品掌
戶口冊者曰密琿五品主兵者曰戴琿次曰加琿次
曰甲琿次曰定琿代達賴理事者曰第巴統理兵馬
刑名者曰噶布倫又作噶隆三品噶布倫凡四人格
隆者戒僧也格隆之熟經典者曰格喜修行未深初
轉一二世者曰沙布倫通稱刺麻弟子曰托音俗官
初入籍者曰東科爾又有邊缺大營官小營官皆主
地方及兵事仔琿商卓特巴噶布倫有缺駐藏大臣

會同達賴刺麻選擬正陪二人請

旨補用餘皆會同揀放極小職事則聽達賴自用之
達賴圓寂後大臣行文各路民間有呈報生子靈異
者或有徵驗藏內則遣大堪布噶布倫持達賴生前
愛用之物數事雜以他物試之其兒指取不爽或見
堪布出一二語乃臨寂時事則令其父母携至德慶
距前藏一如此者或一二人或三四大臣覆驗後
站地名擇日以金瓶掣籤前七日各大寺刺麻虔誦經幫
辦大臣至大招行礼用牙籤書各小兒名人各一籤
彌封蓋瓶內駐藏大臣行礼啟蓋掣取其一對眾拆

封既知為某名則率眾至德慶迎入大招堪布日夕
守護具奏入呼畢勒罕冊

上命章嘉呼圖克圖至藏照料坐牀六歲學經七歲
受小戒即學禪坐不令卧公事皆班禪或呼圖克圖
代決十六歲乃自理事此俱乾隆中定制至此間所
奉呼圖克圖由雍和宮瓶掣已見魏氏記下篇其各
寺職事名號亦仿藏內制惟跳神之說各書俱未言
及此間於正月十四日夜半各寺俱登樓吹角角以
銅錫鑲骸骨為之傳集刺麻僧眾妝束黎明齊集五
塔寺前如天魔舞有青獅白象以紙粘木為之足有

輪四牽走如生日出後各歸寺閉門扮演其札薩克
刺麻或達刺麻在殿上南面據高坐坐褥以黃緞為
之著極厚褥數層高數尺對面寺門前張黃傘蓋一
刺麻假壽星面具北嚮坐前列小兒高二尺餘戴小
沙彌面具者五合掌侍東西廊突出戴假面具衣灰
白色緊衣憔悴作枯骨形者數十皆以三尺許小兒
為之殿階西南側坐刺麻十人作兩行列列各五戴
纒帽高二尺前鈎後坡脊起如摺扇形衣紫布衫袒
右肩左肩前後以紫布蒙之捲疊約長數丈左執有
柄鼓圓徑二尺柄注於地以右手擊之寺門內壽星

稍北數刺麻圍案吹角聲鳴鳴與鼓聲上下應其如
枯骨者數十人聚階下作大周轉每角一聲輒翹一
足作商羊舞進退以鼓角為度約炊許轟然仍東西
散殿上出一老人亦假面具白鬚眉衣錦襖褲鞞俱
黃色有織繡紋下階徐徐作龍鍾態笑容可掬數小
童扶掖以行亦作大周轉依壽星立殿上又出一人
粧束如女子頭插雉羽六徐舞作東西顧盼行下階
向大周轉處以手中拂上下指拂柄作骷髏形衣錦
衣雲肩下垂飄帶數十百條如戲班中宮衣冠前後
圍亦小骷髏形高寸餘約七八枚舞數刻殿上又出

八人繼又出八人兩次下粧束如前女子頭插雉羽
四皆執拂左右舞殿上又出數隊或兩人或四人對
舞而下約二十餘有牛首者有龍首鹿首者皆假面
具以漆髹之狀貌猙獰如蛇神牛鬼袍五色與前十
六女子穿花舞以一牛首者與插雉羽六者居中
所舞似無多式樣惟前後旋轉及以衣袖與拂左右翔
顧耳舞畢東西列老人者仍作前態上至正坐前以
首至地袖出一物如帛獻之名曰遞哈達正坐者摩
頂受其壽星者亦扶五沙彌上如大壺盧旁生數小
壺盧黃傘蓋隨至階壽星詣正坐前獻哈達如老人

而退正坐者起立音樂導送入別院前舞者復對對
作商羊而退入殿內壽星老人皆入外鼓角大作數
人舁一紙塔上面作千百骷髏形至廟外焚之是日
觀者如堵山後男女番衆亦結伴來城巷衢為之滿
寒男女由寺內出入有一刺麻手青絹巾拂其額輒
喜有抱兒跪求者有自以額就之者擲錢數文或數
十百文不等喧笑而散云看跳神畢矣商民則呼曰
跳鬼當亦古人大儺以驅疫厲之義特番俗不同耳
問其所粧演各人則俱以小刺麻為之歲歲元宵節
必有是舉六月間崇福寺晾甲後亦是聞歲除亦

間有作者未之悉也。瞭甲即取。

聖祖仁皇帝所留甲冑，瞭之哈達如白絹上織佛像。商民販鬻，專以待蒙古部落康賴紀行，謂番俗合古者數事。番衆相見，必以哈達。即古之束帛禮失而求諸野，此其一端也。

按此間各招亦多有活佛之稱，或書佛為白，或即呼為佛爺。余意所謂活佛，即呼圖克圖。在百六十呼畢勒罕之內，詢諸土人，則又非是。謂歸化城活佛已有數人，統天下而言，豈僅百六十耶？且俗傳各招活佛俱有原身在寺內，或蛇或

鹿或蝦蟆暇輒遊出刺麻輩習見之不為怪隆
壽寺蛇粗圍尺數寸居殿前石洞中見者尤眾
然此或別為靈異若謂即活佛原身是又與呼
畢勒罕出世之說殊相左矣此間每迎活佛來
寺亦先請降神如魏氏記所言垂仲惟皆以常
人為之必到寺更換衣服始有神附如師巫然
其事荒誕刺麻蒙古極敬信之

古豐識畧卷三十八

長白鍾秀石帆

崞縣張曾小袁
初稿

物部

書籍

御纂周易折中

御纂詩義折中

御纂春秋直解

欽定三禮義疏

上諭清漢文

御製文初集

大清律

大清律纂修例

纂修條例

續纂修例

欽定清語冊

大清通禮

吏部處分則例

戶部則例

戶部軍需則例

續纂則例

工部工程則例

保固則例

續增則例

洗冤錄

督捕則例

軍衛道里表 五軍道里表 三流道里表

清漢蒙古律例 理藩院蒙古則例

欽定訓飭州縣規條

聖諭廣訓

按古豐學校未立頒發書籍較他處獨少又以
解字卑濕年久霉爛毀棄無存現檢查庫中所
餘列其名目如右此外藏書寥寥瓶借無從書
賈偶射利而來所載亦僅稗官小說五車四庫
與塞上無緣即此識畧一書知不免貽譏淺漏
者亦半由典籍無徵之故欲求如日本存尚書

古文高麗進別叙孝經廣南國有五經廣注春秋後語三史加注張孟押韻集聖歷諸書杳不可得文教之興當自何日噫嘻

古豐識畧卷三十九

長白鍾秀石帆

嶧縣張曾小袁
初稿

物部

土產

穀屬

穀

穀為禾稼之總名五穀六穀八穀九穀皆穀也至
於百穀又不止言禾稼矣晉省以出粟米者為穀
有黏不黏之分黏者則曰軟穀其米曰小黃米蓋

別乎黏黍所出之黃米也穀米曰小米別乎稻之
大米而言其實所謂穀者乃古人所謂稷耳以稷
為穀與以棠為果同

粱

古有以粟米為粱之說今則專指高粱土人呼為
芟子有紅黃白三色有黏不黏兩種或呼為秫以
之釀酒極佳故山右言酒美而性烈者必曰高粱
燒別有一種曰玉秫土人呼為玉芟子

豆

即豆也有大豆小豆黃豆綠豆黑豆豇豆扁豆各

種皆以秋熟惟豌豆春種夏熟其餘如雲豆刀豆
連豆皆以供蔬菜之用然俱以豆名未便列諸蔬
屬豆之為用不一或以磨麩或以製粉至於豆腐
豆芽幾于每饌不廢宋牧仲筠廊隨筆載康熙間
上南巡至蘇州以內製豆腐賜巡撫宋犖且命厨人
親至撫署傳授製法以為該撫後半輩受用惜當
時不將製法附載書中袁簡齋隨園詩話亦云蔣
戟門觀察招飲珍羞羅列忽問客曾喫我手製豆
腐否曰未也公即着犢鼻裙親赴厨下良久擎出
果一切盤飧盡廢因求賜烹飪之法公命向上三

揖如其言始口授方歸家試作賓客咸以為美惜亦不傳製法近代梁蒞林中丞亦精此味謂最忌者二事用銅鐵刀切及合鍋蓋煮耳豆腐之名菽乳為漢淮南王劉安所作人人知之豆芽之一名苜蓿閒有未之知者唐人詩盤中何所有苜蓿長闌干注即指此非馬食易肥之苜蓿草也

麥

有大小二種大麥俗名草麥較小麥微早熟小麥即春麥也大麥多製麵用小麥以供麵食其秋種夏熟備四時之氣者曰宿麥極能養人外有蕎麥

一種初伏乃種霜早則盡萎土人喜作河漏食傳
青主謂河漏雞湯第一羊湯次之新秋蕎麥初下
最宜河漏雞羊濃煮雜以薑椒隔數日一頓頗利
老牌又謂高齊時促律忽塔想亦用蕎麥為之或
以為河漏之名土人呼漏音近落即古曳落河之
遺北邊所常食也又油麥一種性耐寒不畏霜關
外種者極多俗書為苽麥按字書苽田弔切無油
字音或云即燕麥也楊升菴丹鉛總錄謂漠南露
益一路皆有之土人以為朝夕常食今雁門一帶
亦有燕麥之名與油麥同昔人謂兔葵燕麥解者

以為燕麥麩麥也對真麥而言其形極似又蕎麥之屬有苦蕎油麥之屬有青稞一名青油麥皆以飼馬間有食者亦等諸荑稗而已

黍

有黏不黏兩種李時珍曰稷黍一類二種黏者為黍不黏者為稷其說亦似是而非今通呼曰黍亦曰糜子其不黏者則曰硬黍子亦曰硬糜子土人多炒食之曰炒米每食用茶送之遠行以代裹糧極便黏者有黃白紅黑諸色其米皆黃做糕食及造代酒用統呼之曰黃米

稷

辨者不一紛紛聚訟至有以為策問條目者迄今無定論惟晉省人即以俗呼為穀者當之似較有理總之黍以性黏為常閒有不黏者稷以性不黏為常閒有黏者未可以一說拘也

麻

有脂麻胡麻大麻草麻各種以之製油多不可食或此間水土所致本草謂胡麻即脂麻一名巨勝子種出大宛故曰胡麻又謂可以辟穀但滑腸耳與白朮並用為勝皮肉俱黑者良栗色者名鱉虱

胡麻更佳九蒸九曬食之益壽延年天台仙女飯
劉阮者即此陶宏景曰八穀之中惟此為良若云
自大宛來則非八穀之麻明矣月令仲秋之月天
子乃以犬嘗麻則麻當在八穀之中大宛之說何
以稱焉豈白者產中國黑者產大宛乎大麻績其
皮為織布及絢絞繩索用其幹蘄硫黃引火極易
草麻油味尤惡以猪脬盛之晾風日中數年白淨
如水晶用調印色最妙

蔬屬

白菜

一名菘有夏秋兩種秋熟者佳故云秋末晚菘晉省以忻州所出為最以其葉厚而肥心捲而實耐烹煮便醃藏耳此間薩拉齊所產微小而少筋似在忻州之上其味當不減安肅也諸書謂黃芽菜即此特南北名異耳

蘑菇

晉省言蘑菇之美者必曰口蘑曰營盤蘑與臺蘑並重如參之言党參也蘑菇本菌屬因熱氣濕蒸而生臺產之較勝于他處者每歲春夏之交蒙古僧俗携男女驅牛羊駝馬詣五臺山拜菩薩依水

草為廬帳所食必肉骨棄于地其殘羹賸炙亦不
時傾潑去後不數月日暄雨潤蒸而成菌味特肥
美此間更可知矣口蘑較臺蘑味尤厚微濁

芥菜

種類頗多其苗與子皆可食雁門關南一帶多取
以造油每秋冬間輒來城收買菜子較米粟尤貴
各鄉皆種之

菜菔

土名蘿蔔即爾雅蘆菔也有紅黃白三種紅黃色
者謂之胡蘿蔔別有水蘿蔔甘脆如梨色多白有

外紅如臙支而內仍白者

蔓菁

一名蕪菁一名諸葛菜

壁手藍

一名苛藍一名玉蔓菁皆土人俗稱其名未見諸書惟爾雅釋草歲馬藍郭注今大葉冬藍是也疑即此種苗與根皆可食以根為重與蘿蔔蔓菁同惟二種根在土中必掘取乃可食此則根出土上結實更大而圓尤脆美無熟食者

芫荽

一名胡荽俗謂之香菜宜羊肉

莧

有紅白紫三種又有馬齒莧忌鱉肉

萵苣

採其莖去皮食曰萵筍葉宜生食

芹

一名胡芹

蔥

初生者曰小蔥移栽者曰鉤子蔥秋栽冬萎春夏間重發者曰羊角蔥皆取其形似本草謂之菜伯

鬚與白俱入藥忌同蜜食

韭

春初早出者佳又有黃芽韭此間惟冬日有之

蒜

苗嫩時食與葱韭同微老則不可食其莖謂之胎與韭胎同以根為重獨頭者尤良一名胡蒜野生而根小者曰小蒜薤屬皆五葷之一釋氏忌之

菠菜

種出頗陵國後訛為菠薐唐西域傳婆羅獻波薐即此種又呼為紅根菜見姑蘇志根有紅白兩種

此間貴紅者

茼蒿

花如野菊黃色莖葉俱可食和林格爾山坡間喜種之其子性極黏蕎麥麩過夏後宜參和用之

黃花菜

一名金針菜以其未開時言

地粟

本草烏芋又名芋臍一名地粟羣芳譜慈姑一名地粟此間地粟與兩種絕異形微長而小纍纍如貫珠脆似芋臍而味極淡鹽漬食之以當小菜至

於芋臍關外尤罕見慈姑即茨菰以根生十二子
有慈姑之義關外偶有之亦不易覲也地栗又名
地梨呼音近滴溜

地皮菜

似木耳而小微薄野生牧羊地多有之

蕨

俗名掃帚菜

藜

俗名灰菜有紅心者

甜苦苣

根葉皆可食

瓜屬

西瓜

五代史郃陽令胡嶠於回紇得瓜種結實大如斗味甘名曰西瓜此西瓜入中國之始易以杞包瓜詩七月食瓜禮為天子削瓜春秋傳瓜期而往皆不指西瓜言故本草瓜類不載此種此間入市極遲暑月中絕不可得中秋前後始食之中締絡者將衣毳裘矣十月間蒙古部落貿遷者回城輒呵凍大嚼蓋漠北地慣寒冷到此轉覺熱也

王瓜

俗名黃瓜此間味多苦亦水土之異

甜瓜

種類極多有名香瓜者有子紅色者

苦瓜

俗名癩葡萄

絲瓜

倭瓜

南瓜

冬瓜

瓠子

壺盧

俗作葫蘆亦數種有名西壺盧者食與倭瓜同有
名瓢壺盧者曬乾劈作瓢用有名鴨壺盧者或取

東坡詩蒸壺似蒸鴨之義有長柄壺盧俱可食或
鏤為絲曬乾食之又有小圓壺盧俟乾開口去子
雕刻花鳥文為兒童養螞蚱用俱匏類也

茄子

別志多入蔬屬其結實與瓜同雖非蔓生亦入瓜
屬為是

葡萄

種亦極多通志於歸化城土產載瑣瑣葡萄實小
而甘仍從西域來歸化亦偶見之耳葡萄或作蒲
桃入果屬今以其蔓生也附諸瓜屬

果屬

桃 李 杏 梨 棗

此間市上所鬻多自關南來鄉村間有之不多得也近城惟董氏園中多果樹春夏花開如錦為游人娛目地園在西龍王廟側

棠

種類極多古既有棠梨杜梨之分俗更有沙果檳果之異有以色名者有以時令名者總之皆棠類而今則概呼為果子舉棠杜之名有不知為何物者矣惟林檎海棠果二種實尤小此地頗多

柰

即蘋婆果李笠翁謂可與荔枝媲美者

松子

栝子

栝子似松子而小山後多有之任人採摘不計值

郁李

似櫻桃而小董氏園中有之土人即呼為櫻桃

羊棗

俗呼為黑棗

胡桃

即核桃也

榛 栗 酸棗 石榴 山查 俗名山裏紅

酸刺子

此間多連枝鬻者小兒輩喜食之呼為酸溜溜

紅姑娘

野果也外垂絳囊中空有子如紅珠顆酸而甜可食徐一夔元故宮記有之

木瓜

小而無香別志多入瓜屬以其名也木本結實仍附果屬為是

花屬

見果屬者不載

牡丹 芍藥 荷

寺院中間有之荷惟盆種不數見也

菊

種類頗多秋菊與他處同府志有七月菊昔人咏
五月菊云却嫌陶令醉來傍屈原醒闕南呼六月
菊此云七月亦可以知節候之早暮矣曰洋菊曰
江西蠟曰金絲菊皆早菊之別名

葵 蜀葵

葵心向日與中土同蜀葵有大小二種一名一丈
紅俗呼為淑氣花

萱

土人呼為穿草花即宜男花也亦有鹿葱之說誤

石竹

一名十姊妹

山丹 百合

百合俗名卷丹山丹亦似之

玫瑰

土人呼為刺梅有紅黃二色

雞冠

鳳仙

玉簪

荷包牡丹

薔薇

月季

迎春

蠟梅

金盞

粉團

仙人掌

夜合花

塞上花雖少而不知名者頗眾即眼前易識者識之勿謂燕支山真無顏色也

蓼

俗名水紅花李長吉詩江圖畫水蒨皇甫嵩詞水蒨花發秋江碧是從蒨亦非俗名與游龍俱可入詩

丁香

有紫白二種

碧桃

一名榆梅取其葉似耳詩詞罕用者

海棠 秋海棠

海棠之種極多秋海棠草本無實

罌粟

種者極多農民頗貪其利為害不可言狀若以花而言則盈畦遍野五色紛綸塞上畎畝中一鉅觀也有千瓣者尤佳惟園中有之種者嫌其少獲

雁來紅 五色雲

雁來紅一名老少年五色雲惟此間有之與雁來紅相似葉備五色望之如錦繡其實皆草屬雁來紅入花屬已久用附諸末

木屬

松 柏 榆 楊 柳 槐 椿 樗俗名

樺 桑 楸 棘 花椒

餘見果屬

草屬

龍鬚 馬蘭一作馬蘭 蘆 蒲 蒿 艾 茅 莎

蓬 首蓓 莠

不知名者極多

菱 芡

二種俱有不能結實

胭脂 藍 菸

二種俱染色用菸即淡巴菰之類

掃帚草

即爾雅王芻是

芨芨草

土人呼近芨雞即漢書息雞草也一叢數百莖莖長數尺以之縛帚極佳班孟堅謂馬食一本即飽然馬殊不食見紀文達公詩又有作席箕者見藝文中

藥屬

黃芪 鹿茸

為此間兩大宗藥材商客來販買者較他客尤豪
侈以其利厚錙銖不足計也

苦參 沙參 黃芩 麻黃 柴胡 防風 知母

荆芥 車前子 甘草 益母草 細辛 遠志

桔梗 蒼朮 牽牛二黑種白丑 郁李仁 歲靈仙

枸杞 紫蘇 薄荷 藿麥 天仙子 王不留行

粟殼 小茴香 北椒 蒲公英 金櫻子 茵陳

夏枯草 草烏 地骨皮 地榆 秦艽 苦丁草

牛旁子 大戟 草麻子 土龍骨 蛇牀子

管仲 三稜 芎藭 蒺藜 葶藶子 地黃

石膏 豬苓 五味子 馬兜鈴 赤白芍 黃精

欵冬花

藥石不及備載

大黃

此間水土與大黃相宜小兒過藥肆輒買數錢食之每有疾病醫家喜用此藥分兩亦極重客居者最宜慎之

鳥屬

雞 鴨 鶩 雉 鴿 燕 鵲 雀 烏 雅

鳩 鷹 雕 雁 鷓 鷓 啄木 畫眉

石雞 半翅 布穀 紅藍點頰兩種

不及備載

百靈

一作白翎札木言於汪罕曰我於君是白翎雀地人是鴻雁耳言白翎雀常在北方鴻雁則南飛就暖地也是白翎原生塞北之證第未識即百靈否

沙雞

此間以冬月沙雞多寡卜來歲田禾豐歉俗諺云沙雞多賣老婆揣其意不過喜冬雪大耳數年來

亦不甚驗

獸屬

牛

驢

羸

羊

豕

貓

鼠

狐

虎

狼

獐

麇

兔

獾

黃羊

常見者祇此數種餘不悉載

犬

畜者極多亦極大蒙古語謂之腦亥漢北貿易各商所畜以看守帳房者每家以千百計冬日回城狺狺徹夜致歸化有犬鎮城之說

馬

明馬市之開盈廷聚訟今則中外一家無分畛域
矣惟古人貴用牡馬今多用驢馬驢五代史作扇
郭崇韜深嫉宦官謂魏王繼岌云王登極後當盡
去宦官至於扇馬亦不可用周南平王謂良馬不
可遇但要坐下穩惟扇庶幾語見北夢瑣言亦作
驢見周官注

駝

塞外運載莫便于駝一駝負米一石五斗飲水不
多食草不擇其卹駝之法莫詳于張鵬翮之西使
記軟屨以護其肉峯扁鞍以護其背慎牽以護其

鼻山路拖皮鞋以護其足扶整駝具以防其傾側
放牧無睡以防其攘竊防其驚逸必先得牧人之
力而後駝馬不苦于水旱故康熙中漠北之役西
路惟歸化城滿兵不恤駝馬以致中途餒匱駝之
關係重矣府志獸屬不載何也

鹿

角初生長二三寸分歧如鞍紅如瑪瑙破之如朽
木者謂之茸獵人繫取之然後斃鹿血未散也或
云太嫩者血氣未足用之無力此間鬻者皆長數
尺沈存中筆談云凡含血之物血易長筋次之骨

最難長麋鹿角無兩月長至二十餘斤角骨屬凡骨之長無速于此草木亦不及之頭為諸陽之會鍾于茸角豈與凡血比哉惟麋鹿茸角罕能分別麋補陰鹿補陽麋居澤鹿居山此間所獲乃真鹿茸也朱氏注孟子麋鹿後人多辨其誤。夜談隨錄載塞外有獸似鹿而大名曰堪達爾汗前昂後低多力毛粗而長為裘暖角扁而厚為決堅人以其皮可裘而角可決也驕馬彎弓逐而殲之獲厚利其唇方大而厚多膏味極美八珍中有猩唇即此物以角試水毒則角綠色又有掃雪大於貂絨

白毫長光遜之人以其似貂也或製為冠服兩種
頗不常見僅附識於後

魚屬

鯉 鯽 鮎 鰍

薩拉齊托克托城等處黃河有之鯉肥而美味不
減於石華春夏間不易得也

蟲屬

阜螽 蟋蟀 螞蚱者蟲之與蝗以翼鳴 蜂 蝶 蚊 蠅

蛙 螻蛄 蚯蚓 壁虎 蜻蛉 蝸牛 蛇 蚤

蚰蜒 蝦可織食細不 蜘蛛 蟾子 蟻 蜚螂

餘不勝紀俱與別處同惟自雁關以北無蝎子耳
或戲至關內携出亦不螫人枳橘之化地氣使然
信夫

巧媳婦

此名未見諸書他處亦從無言之者歸化城婦女
每日落即不敢動砧杵有犯者隣里輒戒之曰恐
驚出巧媳婦來有見之者云長三寸許首有翹髻
作婦人形徧體皮肉皆赤無毛兩手有小肉錐如
持杵狀敲物有聲似擣衣者其家出此輒不吉亦
異聞也

貨屬

煤 炭 木炭

歸化城煤炭極貴東距城二百里方有之西則自薩拉齊來亦祇有煤耳炭則自黃河西來近和林格爾有試開煤窯者未知能成功否也。凡煤炭所出亦地不愛寶之一端其利與開礦同咸豐七年有奏稱此間刺麻洞黃草崖及清水河一帶山中礦苗出現者經委員逐處踏勘爐民出具並無礦苗甘結復行停止頃閱梁莖林中丞浪跡叢談有開礦議一則謂今人無不言開礦有害大都鑒

於前明之用官官收礦稅耳不知委用宦官則凡事皆有害何獨開礦我

朝康熙五十二年大學士九卿議禁開礦蒙

上諭曰天地自然之利當與民共之不當以無用棄之要在地方處置得宜毋致生事又乾隆四年兩廣總督奏請封閉英德縣洪礫礦蒙

上諭曰銀亦天地間自然之利可以便民何必封禁煌煌

聖諭仁義並行固不欲興利以擾民亦未嘗閉地而塞利嘉慶中英煦齋相國亦嘗抗疏言中國銀有

日減無日增安得不短絀則莫如取諸礦廠或官
為經理或任富商經理即使官吏難保侵漁富商
或飽囊橐總係取棄置之物以濟生民之用且可
養贍窮民雖聚集多人而多人即藉以謀生未始
無益皆通達政體之言非迂儒所能識斯固籌國
用者所宜體察而施行也其說極為有理無論金
銀銅錫鐵礦皆然今此間礦務未成豈塞外土風
淳樸山川仍自安未鑿之天耶抑顯晦固有時耶
因煤窰之開而憶及之其效或見諸異日

羊皮 皮帽 皮鞞 皮繩 各色皮張 皮箱

數種因近外藩故作房極多

皮硝 釀

兩種俱起地之鹵土而熬成者與煮鹽同

黃油 乳皮 乳餅 酪 酪乾

數種山前所製較山後潔淨

油 酒 烟 醬

油有脂麻胡麻之分酒有燒酒黃酒之異前取烟草葉製烟近則種類益繁矣三種於乾隆中年始與皮張同稅黃酒名曰代酒醬曰口醬

磚茶

土人收買烹過茶葉加色香味重製成餅其形如
磚以鬻諸蒙古部落餘如武彝等茶俱自南來非
土產也咸豐九十兩年採辦貼補俄羅斯茶三千
箱購運俱極費力

按王者不貴異物而五土之物周官大司徒辨
之管子地員篇五隱五志瞭如指掌土產一門
志乘所必備也此篇僅識大畧以待參稽穀食
而外深山窮谷一草一木一飛一走以及織鱗
寸介雖老於漁樵者亦難盡悉而文人好博必
欲瑣瑣考辨即使誇多鬪靡克過茂先亦於實

用奚裨至絲枲布帛本皆來自遠方非其土之
所產未便攬列簡陋之誚烏能免諸

古豐識畧卷四十

長白鍾秀石帆

初稿

崞縣張曾小袁

物部

稅課

煤炭窰稅乾隆三十三年由將軍富梁等奏定大青山哈莫爾河利莫圖清水河喀喇烏克爾圖等四處煤炭窰口每年派土默特參領一員總管每處派佐領驍騎校前鋒校等各一員駐札收稅額稅二千餘兩內除三成作官兵盤費七成交庫收存此外如另

有呈請開挖之處據呈委員驗明有無妨碍立限發給印票准其開挖俟果開有煤炭再行發給印票准其出賣飭令附近管窰口各官照常收稅如開挖之後竟無煤炭准其將票交回委員封閉窰口

牲畜稅初有土默特人員記檔之例專為稽察盜賣馬匹而設每價銀一兩抽制錢八文所收記檔錢文交儲土默特旗庫以資公費按年造報理藩院核銷乾隆二十六年因內地商賈將茶布等項販運出口換回駝馬牛羊四項牲畜例應進口納稅恐其到歸化城記檔後輒從小徑販往他省易致偷漏即准殺

虎口監督期成額奏將土默特派員抽收記檔錢文作為正額統歸殺虎口兼收其土默特歲給公費即由監督給發足用報部查銷三十一年十月准副都統吉福條奏蒙古各札薩克趕牲畜來城殺虎口差人記檔收稅伊等不通蒙古言語只登記牲畜錢文數目並未及其姓名旗分佐領遇有賊盜事件無從稽查因派理藩院章京一員駐歸化城管理牲畜記檔稅務並將歸化城菸油酒皮張落地稅亦令新派章京兼管此歸化城抽收牲畜稅之始也

菸油酒雜貨稅起于乾隆二十六年前此並無歸化

城收稅之例嗣因殺虎口監督期成額奏稱蒙古地方現種菸葉雜糧製造油酒菸等項在歸化城一帶售賣漸成行市即為口外土產應行起課經戶部議覆將此菸油酒三項准與皮張雜貨均附於落地木稅納則抽納乾隆二十七年監督滿斗到任因歸化城菸油酒三項並皮張雜貨落地等稅抽收伊始尚未立定章程因酌量口外情形請將從口內販來茶布雜貨等項由殺虎口納過稅銀運至歸化城進柵入鋪零星貨賣者免其重複徵收惟由歸化城打成駝馱轉往各省及後山蒙古地方販賣出柵之貨按

則抽收經戶部據咨照覆三十三年新設監督法福
禮到任管理牲畜稅務兼管雜稅因歸化城與殺虎
口既分兩關欲將殺虎口納稅貨物到城入柵時重
複徵收經巡撫彰寶奏稱設關輸稅原因商賈雲集
諸貨流通以物價之低昂定稅則之輕重必須權衡
至當庶能裕課便民以垂久遠如殺虎口為內地邊
城重滙自南出口自北進口一切貨物俱有應徵稅
課至歸化城地方向止抽納牲畜記檔錢近年增設
油酒菸及皮張等項均指口外土產而言故附於落
地木稅并徵其內地各色貨物已從殺虎口納稅在

歸化城入鋪零星貨賣者例不重徵所以通商賈而
惠市屢義本明晰其所設四處柵欄南柵係殺虎口
孔道北柵通山後部落喀爾喀各札薩克等處東柵
通察哈爾蒙古八旗西柵通烏拉特鄂爾多斯地方
是以歸化城貨物有販往他處售賣者應於出柵時
徵收因其車載馱運遠處流通則不論土產及外來
貨物又當按則輸稅應請嗣後歸化城菸油酒皮張
等項及關東等處發來商貨從草地行走未經殺虎
口徵稅者俱為口外土產應令歸化城按則抽稅其
內地一切雜貨販運出口經由殺虎口納過稅銀到

歸化城入鋪零星發賣者仍不再徵若貨物運抵歸化城以後商販車載馱運又販往他處售賣則無論土產與外來貨物均於出柵時徵收則與殺虎口原定成規既屬相符內地貨物可免重徵之累口外土產亦無漏徵之虞再查則例內價賤之貨以成馱成篋成擔成箱起稅價貴之貨以每足每條每斤每件起稅自數錢至數分數釐不等其銀數在五分以上者雖物僅一件重止一斤亦當輸稅若每項銀數不過分釐者似應於則例內積算成總至五分以上之數定則抽納庶鄉民零星日用等物不致紛擾如一

二疋布兩三包菸胥役人等無從借端需索矣至殺
虎口與歸化城兩處監督所徵稅課有無短少浮多
應令按月造報巡撫查核其管柵家人書役或仍藉
端需索及口外商民包攬偷漏不遵則例輸納等弊
俱責成巡撫互相稽察查拿懲治以肅關政仰懇
敕部議覆并將則例逐一釐定頒發刊布俾各通曉
遵循以垂法守等因奉

硃批該部議奏欽此嗣蒙戶部核覆所奏與節次議
准例案均屬相符即行令該處稅員分別遵照仍將
徵收則例刊刻木榜豎立稅局並各柵口俾商民通

曉遵行惟查各關則例凡商販貨物抽收稅課應統計各項銀數彙總核算積少成多若如所奏請將各項應徵稅銀積算至五分以上始行輸納其五分以下概免抽收既與原定稅則多有紛更且恣奸商地棍串同家人書役從中舞弊將例應積算至五分以上貨物分作散數希圖偷漏侵蝕致於稅課有碍應仍循照舊例辦理但其中有實係民間零星日用物件如布止一二疋菸止兩三包原不在一概抽收之列應令該監督嚴察家人胥吏毋得藉端需索致滋苛擾其按月知會巡撫之處係為慎重權政起見亦

應准行奉

旨依議欽此

鐵器稅亦起于乾隆二十六年戶部議准殺虎口監督期成額奏稱鐵器一條到口收課把守員弁人等以久干禁例不准出口查中樞政考內稱沿邊守口遇有廢鐵鐵料潛出邊境售賣者立即拿究其鐵鍋農器准其前往烏喇等處貿易等語又關稅全書內鐵勺鋤犁等項俱經列有科則是有關於農器日用之物至未禁不出口惟廢鐵鐵料等物有碍打造軍器始行嚴禁該監督於商販到口時應詳細查明除

廢鐵料仍行禁止外如祇係農器及民間日用器物即行按則徵稅將名色件數註於票內令該商持票赴口驗明放出到城後如有販往他處售賣者亦於出柵時按則抽稅與油酒菸雜稅同

油酒二項除按鋪徵收課銀分別上中戶五兩及二兩五錢外無論就地貨賣及販運他處俱照殺虎口例按馱徵收其數不及馱者亦照該口則例燒酒胡麻油每馱收稅八分脂麻油每馱收稅一錢二分每驢一頭可載油酒一百二十斤之數酌斤折收此歸化城抽收油菸酒雜貨稅之章程也

歸化城稅課正額銀一萬五千兩錢九千串盈餘銀一千五百四十八兩七錢九分錢一百三十七千六百一十文其油酒課銀每年按照增除征解無庸定額並將經費各冊送部查核實存銀兩解部查收此例定于乾隆三十五年前此三十四年戶部議准歸化城稅務改歸山西巡撫兼管選派道府賢員按年更替本年即奏委河東道桂林監收自四月十三日起至次年四月十二日止一年期內共收過雜稅銀一萬六千五百四十八兩七錢九分牲畜稅錢九千一百三十七千六百一十文油酒鋪面課銀一百七

十七兩五錢經巡撫鄂奏明戶部議准分別正額盈餘於雜稅項下支給書役飯食心紅紙張房租等項銀一千二百四十六兩五錢牲畜稅錢項下支給飯食房租錢一百九十二千八百文餘贖錢八千九百四十四千八百一十文易銀解部三十五年奏委歸綏道富躬監收三十六年奏委雁平道錦格監收三十七年仍奏委歸綏道富躬監收三十八年三月署理山西巡撫印務陝西巡撫覺羅巴延三奏稱竊照歸化城稅務經前撫臣鄂寶奏准派委道府徵收一年期滿另行更換茲查歸綏道富躬經調任撫臣三

寶奏明於乾隆三十七年三月十三日接管起扣至
本年三月十二日一年期滿除該道收過稅銀數目
俟扣滿日期核明實數另行奏報外所有更換之員
例應先期奏派臣於各道員中悉心籌派冀甯道駐
劄省城距歸化城一千二百里該道管理通省郵政
兼轄太原等七府州事務綦繁碍難派往雁平道駐
劄代州距該城八百餘里河東道駐劄蒲州更距二
千餘里均有所屬審轉核轉及巡歷秋審等事若將
本任事務經年委員代辦亦非政體其餘各該知府
更有專管地方一切刑錢案件承上接下之責並無

就近可派之員惟歸綏道即駐該處經理較便該道
富躬兩經派管稅務於一切稽查事宜較為熟諳應
請再管一年臣仍不時留心訪察不敢少懈致滋弊
竇抑臣更有請者歸化城稅務既有歸綏道駐劄該
處自宜即令該道就近徵收祇因立法之初試收未
定恐一人常川經營或致日久生弊是以議於道府
內揀員派往逐年更換今經節年比較正餘各數業
有章程且該處貿易蒙古居多非漢員可能經理所
有歷年奏派俱係旗員而知府從未派委名為按年
更換實不過各道中一二旗員遞相輪替設遇冀甯

等三道俱係漢員更難遴換惟歸綏道係屬滿缺又
即駐劄該處耳目易周呼應亦靈稽查更為切實臣
愚以為該道如果徵收無弊似應循照揚關等處道
員監督例即今該道常川經管按年核實奏報毋庸
遞年更換倘有徵多報少或辦理不善致啟家人胥
役中飽等弊一經察出即隨時據實參奏亦無待扣
滿一年始行查辦所有按年更換之例應請停止等
因蒙戶部議覆經理稅務惟在該管官員實力稽徵
妥協辦理不使少有滋弊原所以嚴考核而慎權務
今歸化城稅務既據該撫奏請令該道接管正宜嚴

飭實力經徵按年據實奏報仍不時查察如果該道徵收有法於一切稽查事宜俱能實心經理則報滿時自可仍行奏請接管倘有辦理未能盡善或將來更易新任之員於稅務未能諳練即當選派賢員管理以昭慎重不必定為歸綏道應管之例似於權務更為有益奉

旨依議欽此此歸化城稅務酌定正餘額數及歸綏道連年接管之原因也

歸化城徵收落地雜稅設有總局一所東西南北柵關四處徵收牲畜稅設有歸化城綏遠城西包頭薩

拉齊托克托城和林格爾崑都崙八十家子等八處
乾隆四十年經巡撫巴奏請於和林格爾東白塔兒
兩處稽查漏稅如有奸商繞道漏越立即拿送道署
照漏稅例懲辦綏遠城添開麪鋪亦照歸化城例按
則輸稅咸豐四年七月經巡撫恒春奏稱歸化城口
岸西包頭鎮薩拉齊托克托城三處皆濱臨黃河商
民販運雜貨由河路行走程途較近且和林格爾亦
有歧路可通各處商販每多不赴歸化城納稅分撥
即由四外繞越偷漏若不設法變通不特稽查難周
且稅課有虧所關匪輕查西包頭鎮等三處均設有

歸化關牲畜稅廳一切雜貨既圖捷境行走若仍令
迂道由歸化城完稅後再行分發各處銷售未免行
旅跋涉似非體恤商人之道應請嗣後從口內販來
一切雜貨並從口外販入土產等貨即就近在西包
頭等處稅廳照例輸納並即設立髻印稅票其有運
赴歸化城售賣者入柵時驗明放行毋許再徵等因
蒙部議准行六年鍾道任內經巡撫王委員擬定章
程十二條如西包頭鎮應設立稅廳一所以收該鎮
稅務又甯夏貨物西包頭鎮收稅已久仍照舊辦理
無庸另議更張又各項南貨由殺虎口河保營並繞

越歧路而來者到西包頭鎮按則納稅其在本鎮零星買賣及載往他處售賣者無論多寡均免重納又南貨及關東京貨已在歸化城納稅有鬻印稅票者到鎮驗明放入於出鎮時無論商民多寡概免輸納又口外土產及後山各部落所出一切貨物無論鄉民及客商交易收買而來者入鎮免其納稅其在本鎮售賣者亦免惟再由本鎮運往他處捆載成馱成車成擔出鎮時均按則徵稅倘至歸化城售賣或由城經過俱驗明印票放行無許再徵如運至歸化城後又復販往他處仍照舊章辦理又鄉民在包鎮買

回日用土產各物出鎮時每樣計稅不過五分者免其輸稅再有多餘按則收納又商人赴後山各部落收賬並外藩收放牲畜種地人民程途較遠後山路無買食麵油菸酒之處應准酌帶以示體卹但須予以限制方免弊混如麵止二百斤油酒各止五十斤菸止二十斤概行免稅再多仍按則收納又南貨由河保營而來有托克托城薩拉齊兩處歧路可以繞越歸化城西包頭鎮即分往各處售賣應於托薩兩處向有之牲畜稅廳派役稽查以免偷漏如情愿就近輸稅准其在各該處按則交納以免跋涉之苦

又後套河西暨薩屬各村鎮裝載船筏土產各貨及
白托城下河水運前項貨物內有並不經由包薩而
必須經過托城之河口者自應准其即在托城舊設
畜稅廳納稅如在包薩上游裝載貨物情愿就近在
包薩完稅者亦聽從商便又薩屬包鎮各鄉村土產
菸葉除在本村鎮零星售賣免其納稅外如商人收
買成馱或做成菸包發往他處者照則准其在包薩
各處納稅蓋印放行到歸化城免其重納又包鎮土
產微物如西瓜瓠絲箕帚雞子麩筋笊篋巨籬葱蒜
布鞋襪補襯布梳子兔皮騾皮汲水柳斗鑲鐵木斗

升飯碗出入概免納稅如查獲漏稅之人稟官照例究治其管稅家丁書役不准擅自釋罰如違准被害人呈告以上各條俱奉批准行刊刻木榜曉示此歸化等處稅口歷次添設之始末也

客商匿稅不納課程者笞五十貨物一半入官客商船舶到岸即將貨物盡實報官抽分若停塌沿港土商牙儈之家不報者杖一百雖供報而不盡實罪亦如之貨物並入官停藏之人同罪凡周歲額辦茶鹽商稅諸色課程年終不納齊足者計不足之數以十分為率一分笞四十每分加一等追課納官此歸化

關監督歷來遵行之條例也

秦州古舊書店復抄

抄 寫 陳子偉

校 對 魯硯農

筭

蒙

芻

議

許秉琦

謹署

光緒戊申秋仲

刊於京師厲齋

春秋以降王伯分儒者高語純王大都遠絕事情而莫由振拔逮西哲出一破中國王伯之藩人類之禍益棘夫古之滅國以兵革今之滅國以農商文野固懸絕矣獨其私已族以亾人庶終且激他族以自亾故嘗以謂中國純王之道實合內外而絕其私而究其所行雖孔孟不能無伯術以持其變惟其義主保民而無內外故其術始之一國極之天下民旦自生自殖以共樂其天漢宋諸儒斥功利以弱吾民實非孔權孟術之義有王者作必將始于保民而先于無我環球之大庶幾一息以卽于安嗚乎此人類

生滅之大關也我

朝之御蒙古眾建以分其力崇釋以制其生一絕匈奴回紇之禍其術可謂神矣顧乃不思同化之方變居國以嚴藩翰遂至疆鄰交迫肩臂孤寒求若漢唐之衰北騎一兵而不可得居平深憂太息謬思泱泱萬里必能資固有之物力育新造之人民乃周覽遺篇輒謂沙磧苦寒無能廣生殖以成新城私竊痛之庚子以還日俄戰棘高遠之士又或高談建省絕無根本步驟之方行者乃或莽裂乖離以怒其族嗟乎孤舟絕海寇仇皆骨肉也今既區漢族復

怒蒙民彼行慕者尚何國之不可奴哉此可爲痛哭者已
戊申夏客都門始聞左丞姚公再游朔漠著籌蒙芻議而
未以示人求而讀之三日夕三復則狂喜作而歎曰咄哉
姚公其建國之才乎自古英雄特患無土無民耳夫措已
成之利勦無本之謀皆不可言治法嘗慨箕治平壤孔慕
九夷其志皆痛故國之不可爲銳思一闢新天地以範模
天下其法皆必利其利殖吾民以民其民則兩利竝育而
民益滋而傷傳記之莫由證索獨管氏相齊毅然官山海
籠鹽鐵以植宮彊制國幣輕重之權運軌里連鄉之法工

商秩秩雄服諸侯武侯之治蜀也正軌道肅傳郵兵墾渭濱魏民無擾其策乃類殖民故能攘外尊王以成伯業而其精微奧曲皆不獲詳馴致英俊之才沈霾故紙千百萬華僑之眾奴役他人盜蹠斲吾卧榻烏呼豈非天哉公之籌蒙也制烏珠穆沁之鹽經始內蒙以爲根本附建銀行通國幣闢道路利農商吸巨農巨商之力資勞力以闢新原合蒙財以求礦業廓然畫兵區新內治以鄉官治賦稅兵警就地利建學校闢工場使州縣統蒙漢而督其成以賦稅屬銀行一絕官蒙之貪虐其精微所萃尤在聽蒙賃

荒官無弋獲漢蒙交易國乃升科而其妙用微權則在贖
蒙人之私上下無失其富貴使漢蒙相樂油然而治于智
彊堅定之術而不自知至哉言乎千古殖民之道盡此矣
夫人者萬物之母固天所使以生萬物而卽以生其生而
其用莫大乎土是故有一地之土必能養一地之人有一
地之人必能生一地之財得豪傑以製其權皆可本山川
形勢以製國域所慮血食者濁穀食者清清濁失常匪愚
則弱剛柔之過勢輒相殺而不相存調血穀以劑其平各
贍其欲以飫其求乃可相智相彊相助而不相害世有孤

存一族而可長保者哉惜乎東西人之未及此耳且夫競
爭之世非戰伐莫可保民國卽無能自保固皎然已顧其
爲用也無一不始于財不財不兵而曰保民雖孔孟不治
而其事則無一不始于農農焉而後若工若商財乃環起
迭生吾民乃可漸推漸積國勢且將磅礴宇宙而莫測所
終然而其道必自政教始政教之術必將與時地爲變通
雖聖人不能執一法以治天下此固大同未至之所爲也
然而其義且將互萬古窮地球而不變故其始也必先握
天產之大操一國倉貨之權然後可以運吾民而保吾國

天下養人之物靡不賴人以生獨鹽之爲物天地輒自生之若嬰乳焉其用實足操萬利之原取諸天成以製一國之大權而于人無虐海濱之斥鹵至無用者也而鹽出焉龍江之呼倫貝爾蒲甯蘭肅敦煌青海衛藏之鹽池蜀中之火井地皆隸隔山海天輒自生自長以彊其地之民今蒙古之鹽且豐美若是矣精而博之塔藏之金于闐之玉吉林之奇木環海之巨魚皆天各產其地以畀吾自保特非建國之才不能各製其域以奠其疆卽無能相助相援勢且俱歸淪滅得其才而假之權蓋無一地不克立郡縣

慎封守以雄天下也決矣況乃江河流域之大擅環球孕育之奇至乃旦夕憂貧無能相保以求樂利尚何言哉尚何言哉痛乎患莫大乎無實而張其名勢且速亾而不可救齊之寄軍內政蜀之北出而魏始震驚皆此義也公籌蒙之術就東四盟推測句稽已成未取之財決以至微數且踰三百萬故先謀內二省一鎮赤峰以遏東道之衝一鎮色爾貝山南以扼張庫北來之道而皆以保漠南衛京師推而行之經始土謝圖高原用花馬池鹽建外三省以制北徼內專民墾而錯以兵屯外樹兵屯而暈之民墾協

蒙財闢內外二鐵道以達伊犁使窮邊萬里皆有猛虎在
山之勢而其至精之識尤在徵節候察雨暘辨井渠明土
物以抉其幽微故能徵外蒙屯利而堅其必效蓋其深思
遐覽擷東西拓土致人之術以圖吾存靡不決之實驗齊
蜀而降寄軍內政之精未有過于此者則何王伯之有至
不得已乃請設全甯副都統分內政于鹽墾之中以一標
卒振其民而使之不覺雖闢荒先後皆以精思交錯其間
然其範圍愈微其心則愈苦矣築室至今乃竟寂焉萬國公
法荒土不闢則失其權邊患方殷瞻烏誰屋嗟夫統朝之

贈秦豈無人固不僅爲作者涕洟以道者已光緒三十四
年戊申秋七月桐城陳澹然劍潭序于陸軍編譯局

籌蒙芻議目錄

丹徒姚錫光

卷上

查覆東部內蒙古情形說帖

光緒三十一年乙巳八月
上練兵處王大臣

續呈實邊條議以固北圍說帖

光緒三十一年乙巳
八月上練兵處王大

臣

實邊條議

同上

卷下

呈覆經畫東四盟蒙古條議

光緒三十二年丙午六
月上練兵處王大臣

私售大段重要蒙地情形說帖

光緒三十二年丙午
六月上練兵處王大

臣

蒙古教育條議

光緒三十二年丙午八月覆學部

上練兵處王大臣牋

光緒三十二年丙午三月

再上練兵處王大臣牋

光緒三十二年丙午四月

再上練兵處王大臣牋

光緒三十二年丙午四月

附牋

同上

再上練兵處王大臣牋

光緒三十二年丙午閏四月

再上練兵處王大臣牋

光緒三十二年丙午閏四月

擬設全甯副都統說帖

光緒三十二年丙午七月上
練兵處王大臣

籌蒙芻議上

丹徒姚錫光

查覆東部內蒙古情形說帖

光緒三十一年乙巳八月上練兵處王大臣

竊錫光

前于五月初十日奉劄開前據喀喇沁郡王呈稱

籌辦該旗練兵及學堂等項事宜請由本處派員次第興辦等情查蒙旗情形各不相同所有擬辦各事本處礙難遙度茲派員先行前往攷察據實呈覆等因承此當于四月十八日起程前往二十六日抵該王旗先行察閱學堂校視操練竝嚴密詢問蒙漢各戶暨曾往來各部官民將

該郡王所呈各節反復推究茲得其實在情形應卽馳回具覆查該郡王原呈扼要在卽蒙財以治蒙兵一語蒙財大綱臚分三項曰地租曰煙土稅曰鹽釐更推廣而至官銀行又推至未墾旗分之放荒收牲畜稅各節誠爲謀慮周至目前以急就法經理蒙財亦實不外此數端惟須事有統宗行有次第順序以施乃無窒礙查該郡王原呈係專就其本旗而言自是該郡王職分所限惟以東四盟論凡蒙古三十六旗斷無專就一旗舉辦之理卽謂先行經畫該旗以爲榜樣特亦祇地租一節尚可枝節而爲然此

事如治亂絲斷難倉卒辦理而蒙古可收之近利實首在鹽業銀行兩事鹽業以植大利之根銀行以吸交通之益惟必通籌全局乃有辦法斷非句于一隅所能集事

錫光

此次凡駐該旗幾及一月嗣往翁牛特旗及該喀喇沁部中左兩旗竝土默特等部詳細查攷且于東四盟蒙古全境亦得大概情狀而于蒙鹽及已墾未墾各部諷察尤詳竊謂蒙鹽一宗宜收爲

國家專賣品而不以抽此區區釐稅爲計鹽業旣成則銀行卽附于此官鹽總分各店之中兼設銀櫃舉辦旣易信

用更堅可久可大實可握全局利權而爲經營蒙古並舉行新政根本至地租一節亦入款大宗固事在必行特必從清丈入手此須節節進辦非可資爲近利苟辦有成效則官鹽銷場之贏餘與直隸所屬口外府廳州縣凡東四盟已墾蒙地之地租卽此兩項以目前論周年所入照至少之數核計總有銀三百萬兩以外而銀行餘利尚不在內以後一切新政辦有成效則

國家所入自應歲有加增更未可限以成數若煙土稅一節喀喇沁右翼旗內種煙見尚不多而熱河都統見已按

畝收稅特種煙之利頗厚似可姑于該旗官稅以外酌收
學堂捐暫爲津貼該旗辦理學堂經費以救其目前之急
免致已辦各學堂廢于中道若放荒一事自爲當務之急
然不可倚押荒款項以爲大宗入款轉生阻力至牲畜稅
一事可于小庫倫喇嘛廟等處暫行試辦至能否收有成
數尚難豫計此 錫光 馳入蒙境後按該王原呈地租鹽業
銀行煙土稅放荒牲畜稅五端查攷之大略也茲除學堂
情形另呈外謹將句稽研證所得各節臚陳如左

一地租

查該郡王原呈稱該旗東西約五百里南北約二百里面積近一萬方里當爲田五萬四千頃山川民居廟宇沙磧略居其半則田畝之耕者約二萬頃而分有主租田無主租田最上田爲三大綱統計地租每年可得七萬八千兩等情茲查該旗之寬竝無二百里其全境面積亦不止五萬四千頃原呈誤算而山川沙磧尚不止居其半茲以該旗爲準以例各旗區爲地畝租項辦法三宗于下

地畝

查喀喇沁右翼一旗截長補短凡長五百里寬一百
里面積有五萬平方里每一平方里化作五頃零四
十畝茲面積五萬平方里應共積二十七萬頃山川
民居廟宇沙磧作除去十分之九以至少之數計之
僅以一分作爲耕種之田此必有盈無絀當有田二
萬七千頃

以喀喇沁一旗爲比例東四盟蒙古凡二十部三十
六旗見在已經開墾者凡十二部二十一旗大小旗
分牽算當共有平方面積五百六十七萬頃亦以至

少之數計之祇以十分之一作爲耕種之田應有田五十六萬七千頃如仍恐其中有不足之數再以六折計算尚應有田三十四萬零二百頃實較全數面積祇合百分之六而以百分之九十四爲山川民居廟宇沙磧及不足之數則所估耕種實田三十四萬頃自必有盈無絀清丈以後必大漲溢

東四盟已墾各旗開列如後

卓索圖盟三部五旗

喀喇沁部三旗

土默特部二旗

所附唐古特喀爾喀小庫倫三小部分在外

哲里木盟四部十旗

科爾沁部六旗

郭爾羅斯部二旗

杜爾伯特部一旗

札賚特部一旗

烏昭達盟五部六旗

專指已墾旗分

翁牛特部二旗

奈曼部一旗

敖漢部一旗

半墾

克什克騰部一旗

半墾

喀爾喀左翼一旗

半墾

共已墾十二部二十一旗

東四盟未墾各旗開列如後

烏昭達盟三部五旗

專指未墾旗分

巴林部二旗

札魯特部二旗

阿嚕科爾沁部一旗

錫林郭勒盟五部十旗

烏珠穆沁部二旗

浩齊特部二旗

阿巴噶部二旗

阿巴哈納部二旗

蘇尼特部二旗

共未墾八部十五旗

租項

照以上核計已墾蒙地十二部二十一旗至少亦應有墾孰之田三十四萬頃自應按畝徵租查照則例及圍場租銀折中定數以每頃徵銀四兩計之每畝四分每年應共徵地租銀一百三十六萬兩而圍場及承德府灤平縣豐甯縣並口北三廳尚不在內此六屬與圍場幅員甚大亦應徵地租至數十萬兩則統計直隸口外地方北盡東四盟蒙古之全境除未墾地外必可徵地租銀至二百萬兩上下斷無疑義

查國初熱河田畝科則凡民地每畝上則徵銀六分中則三分下則一分五釐園地每畝徵銀上則二錢五分中則一錢二分五釐下則六分二釐五豪見在圍場徵租定例上地每頃五兩五錢中地四兩五錢下地三兩五錢茲照新舊科例高下地畝折取中數每畝四分每頃四兩已爲至少之數

辦法

國用倚地畝稅爲大宗中國歷代皆然卽東西各國地租一項亦爲不動產稅中之一大人款此爲國家

經常款目應收之項固無疑義特蒙古田地尚難率爾起科一須先行清丈以清地畝一須調和業佃以劑蒙漢一須禁革陋規以除民累而後有徵租之法蒙地當口賃漢民開墾其地多以段計非以畝計且其王府貴族箭丁各招各佃事無統宗以本旗之人莫能知其本旗所墾之地有若干頃畝加以歲月久遠人事變遷其中侵占隱匿殆不可究詰此須履丈以清其源蒙古地畝租項懸殊大要剔分兩種一曰榜青一口口白地白租榜青之產照地畝所入業佃各

半白地占租之產照地畝所入業一佃五此相縣太甚照榜青田畝則地租應徵諸地主照白地白租田畝則地租應徵諸佃民如因陋就簡不能立有一條鞭辦法則事多窒礙地租將不可徵此須設法調劑以期其平口外州縣吏治之壞已無復加民間地畝雖無納糧之名然地方官非法誅求名目繁多不可殫舉每地一頃其官差浮費約攤至二三四五兩不等民間所出已不啻正課若再定官租是直無異重徵非以重典澄清吏治嚴汰陋規則地租亦不能辦

此須禁革以救其弊以上三者皆非能刻期奏效前
兩層須有經分縷析手段以區疆理之宜後一層須
用風行雷厲手段以速陰霾之去至少須期以三年
乃能田畝清課則定民樂徵輸而國收美利其清丈
及定租簡易辦法容續擬訂

至徵收錢糧弊竇所叢內地州縣已成積重難返之
勢口外新訂地租斷不可再令州縣循例徵收移內
地之弊政以重累邊氓此蓋另有辦法官民皆便而
宿弊一清容續擬訂

一鹽業

查該郡王原呈稱蒙民會鹽產于烏珠穆沁而喀喇沁
爲販賣要道每年經過者五六萬車不等其販賣以米
易鹽若以本屬商民集股包銷繳納鹽釐每車收銀三
錢則鹽釐一項可得銀二萬兩之譜等語查該王旗尚
非蒙鹽販運要路且川澤之利原係國家所專有可比
照東西各國辦法定爲

國家專賣品卽以爲經營東部內蒙古入手地步立腳
根基將來收效極大茲區爲鹽產釐稅蒙情鹽利辦法

五宗于下

鹽產

查烏珠穆沁鹽池不假人工自結鹽塊取無盡而用
不竭洵爲天然美富外來販戶繳銀六錢裝鹽一車
該旗主歲可收銀六萬餘兩約在十萬車上下此外
旗蒙古前往繳銀購辦之例若其本旗蒙古竝不繳
銀祇須自有車牛即可自行裝運出境售賣歲銷之
鹽以十成計之外旗蒙古前往購販者約在七成其
本旗蒙古自運者約在三成則該本旗自運之鹽每

年當有三萬車上下姑取少數合共運鹽十一萬車以每車裝鹽八石計之凡八十八萬石此爲每年銷數其銷路爲熱河察哈爾兩都統所轄境會地甚廣似每年銷數尚不止此其如何短絀目前尚無可查攷見姑以年銷八十八萬石計以立大較

該旗鹽池北面直達外蒙古車臣部似亦應爲該鹽銷路見已另派密員前赴該鹽池查攷其北路情形應俟該員回時續呈

釐稅

查該池監行察哈爾境內者近從販戶包釐本年係
認繳銀七萬兩北洋五萬兩察哈爾都統衙門二萬
兩聞明年已豫認繳銀十萬兩北洋八萬兩察哈爾
都統衙門仍二萬兩其熱河境內係設卡于巴林橋
烏丹城赤峰縣等處每石抽釐制錢五百文每斤其
歲抽若干不能知其共數然以察哈爾歲祇抽釐二
萬兩爲比例則熱河鹽釐每年至多亦不能過五萬
兩

蒙情

蒙人販鹽南來東路多半以赤峰縣爲市場向係以
麩粟易鹽每粟平盃三盃易鹽堆尖二盃見雖仍以
粟鹽互換然各照市價準錢交易矣其買賣出入全
藉繙譯特號稱繙譯實卽牙保代爲買賣取利甚大
買主賣主不予見面繙譯
爲之居間是以其利甚大 若外旗蒙古人赴烏珠穆
沁旗販鹽自帶車牛不得入境此該旗新定辦法意
在勒令販客僱該旗車牛亦專利一法出該旗境乃
可任便凡蒙人販鹽長途行運卽支帳卸車野宿竝
不下店且亦無店可投

鹽利

蒙鹽專賣須將該旗旗主所收價銀每年五萬兩照數發給其北洋察哈爾熱河每年所收釐稅約共銀十五萬兩上下亦須如數提還照蒙鹽歲銷八十八萬石以每石價制錢四千文每斤四十文計合售制錢三百五十二萬緡內除去一成半作運費包繩等用共五十二萬五千緡又除去一成半作總店分店薪資火倉一切費用共五十二萬五千緡又每年提出四十萬緡爲陸續修建總店分店鹽倉屋宇之用限年截止

通共除去一百四十五萬緡尚淨餘制錢二百七萬
緡以每兩合制錢一緡三百五十文計應化銀一百
五十三萬三千三百餘兩其中又除去發給該旗旗
主鹽價並提還北洋察哈爾熱河鹽釐約共銀二十
萬兩計每年淨贏鹽利銀一百二十三萬兩上下

辦法

古者山林澤藪之利王者專之本非就封之國所得
私有此千古通義東西諸國除奧大利以外無不盡
籠鹽利以爲國家專賣品蓋以一人會鹽甚微周歲

所費有限而國家遂據爲大利此有所贏轉可輕農
民之任負而恤其力此其用意至精我

朝深仁厚澤凡鹽運司所掌斷不欲奪商人引地而
收其利特此項蒙鹽本無引地可言與內地商業迥
不相同任民自銷本非通法自應收爲國家所有得
此大宗入款而一切苛細之取求轉可蠲除似亦最
爲良法其辦理次序一須優待烏珠穆沁蒙民仿准
鹽運船專業之例此項鹽車領運准烏珠穆沁旗蒙
民專業準道里遠近訂定車值俾食其利一東與奉

天所倉海鹽西與歸化城運倉花馬池鹽明定界限
以免侵犯而暢銷路一設督運局于鹽池監守池場
以杜偷運而起運諸事由其專司別訂條例以資遵

守一設總店于赤峰以爲東路銷鹽總匯之所一設

總店于喇嘛廟

即多倫諾爾處

以爲西路銷鹽總匯之所一

各府廳州縣設分店而隸屬於東西兩總店一各府
廳州縣之四鄉集鎮設支店而隸于各所屬之分店
一無論總店分店支店俱售零市以便民倉特分別
零躉兩種價值躉價以賣鋪戶使稍有利可圖以暢

銷路零價以賣門市一量去鹽池道里遠近以定價
目惟高低牽算姑以每斤制錢四十文爲準察看銷
場再行加價一總店分店支店以三年爲通折中訂
定額銷數目以爲經理人功過獎罰分數一經理人
少給薪水而優分紅利以爲獎勵地步以上凡辦法
十苟管理得人則歲入將年溢一年而總店分店支
店基礎既立則銀行之設亦有所資藉矣

一銀行

查該郡王原呈稱如開官銀行一事亦大足爲蒙兵用

鑲之助蓋蒙地少見銀皆用極破碎之票若有官銀票
照外國兌換紙幣六成準備法發行必能暢用此不但
周轉公款即于興商亦大有關係等語查各國銀行辦
法實即公私銀庫爲公私經理財政不有銀行則公私
皆無交通之路斯開設銀行自爲經理地方第一要義
茲區爲市情設立交通勸業儲蓄歸結六宗于下

市情

蒙古地方直無圓法可言所用皆鵝眼沙殼

自灤平以東皆

是率從口內流衍而出百文之長不過三寸且尚不

可多得以銀換錢銀價尚彷彿口內惟所換祇三成
小錢七成卽本村本市鋪家自出錢票而所出錢票
又不能通用一出村市便須折扣折扣甚大有僅
作五成用者且
見銀亦少無可流通是以民間貿易多半以糧會交
換拙滯笨重莫與倫比商賈不興率由于此夫患氣
之來恆乘虛而入以無圜法之地而猝遇有圜法之
國無不從風而靡其圜法之力浸灌而入勢將橫出
芻溢而莫可救止于是財政之權歸其掌握地方精
華皆所吸收則不必兵力而已足制地方死命此等

端倪見已發露查俄羅斯見于庫倫設道勝分行發行羅布紙幣業通用于庫倫一帶外蒙古地方日本見在東三省其兵力所至卽其紙幣推行所至民間亦俱通用將來日本銀圓紙幣流行而西俄人羅布紙幣流行而東以灌入內蒙古勢所必至且其戰局定後又難免其不于內蒙古城鎮要地各設正金道勝等分行以角國力而爭利權屆時則我國之應付更將棘于是我正宜乘日俄紙幣見尚未經灌入之時先設銀行以爲抵制則內蒙古利權尚自我操而

凡百新政皆以此爲根據至設立資本則無需另籌其初始辦法如下

設立及交通

官鹽店總店分店支店所在卽官銀行總行分行支行所在則官鹽店與官銀行如孿生之子相依相輔可同時設立即同力滋長斯推行之速不可端倪特鹽店銀行雖在同門仍各異櫃各清各帳則兩相維繫之中方無互相侵奪之慮蒙地本少見銀可卽資官銀行鈔票以赴官鹽店買鹽且責成當舖凡民間

持官銀行鈔票贖當者與見銀見錢一律使用則出票以後勢必風行而于戶部造幣局或北洋銀圓局搭鑄銀圓小銀圓銅角運儲總分各行以便民間兌換凡持票上櫃任其取銀取大小銀圓或取銅角無論旦晚立時兌付其銀與大小銀圓銅角之兌換悉照市價不稍侵欺至取見取票概任兌換者之願不許措搭如是則信用自堅而推行必廣斯發行之票必有五成常在民間正可騰出見銀以資別用而于京師天津各設分行以便交通則商業之匯兌可爲

畫撥實于商民大便而免費所入亦屬大宗

勸業兼儲蓄

查各國皆有勸業銀行所以利農工商之小資本家而爲之接濟也有儲蓄銀行所以利農工業之各勞力家而濬其利源也此兩種銀行皆與蒙古地方相宜而足爲開通地方之一大助力應卽稍厲其法于官銀行之中以開大利蓋官銀行鈔票旣行以後恆有五成鈔票常布在民間卽有五成見銀可騰作別用應卽以此五成見銀爲勸業之用東部蒙古未墾

地方尚有三成則墾荒自爲生產大宗其業一蒙古地方出產係骨牙齒角皮張絨毛牛羊肉及脂油乳汁之屬又遍山細草兼出藥材東境且出紫衣棉花皆屬工藝原料須勸民間自設各種小工廠造成各種用品其業二田地日闢糧食日多工廠既興貨品日裕須恃商民爲之運行方有銷路其業三苟有勸業銀行以爲之後援于是各種小資本家或小公司不憂廢于中道盡棄前貲則農工商各業發生之速不可思量而銀行收其餘息亦屬兩利至農工商等

業日進則一切勞力家皆有資生之策其日工所餘
凡自銀圓一元以上就近支行皆準其存儲按日生
息此各國儲蓄
銀行通法以利苦力俾有餘財而涓流細水匯
成江河銀行之吸收亦實爲巨利凡此辦法皆附屬
于官銀行之中逐漸推廣至勸業儲蓄兩種銀行章
程細如牛毛應取各國辦法參以蒙古情形另訂專
章續呈

歸結

地方之有銀行如人身之有血管血管通則百脈靈

而骨幹自健肌肉胥豐理固然也東部蒙古地方有
銀行以通其機關于農業工廠商賈皆能速其進步
而迤北未墾之八部十五旗苟非沙磧不毛將不轉
瞬皆成耕桑之土土日闢而人日聚則銷鹽愈多而
鈔票之流通愈廣于是銀行之力日益漲銀行之力
益漲則提倡農業工廠之力更日加兩兩相需如環
無端而全盤皆成活著自是而東蒙鐵路及礦山開
采與凡百大工廠事業皆可倚銀行作領輿爲集股
之擔承百業俱舉而利不可勝言矣

以上地租鹽業銀行三端卽每年鹽業地租所入至少亦有銀三百萬兩以外而銀行餘利尚不在內實爲經營東部內蒙古一定不易之法特其次序則首在鹽業專賣爲第一步鹽業旣立而銀行隨之爲第二步其地租一節條理極繁成效較緩而入款亦巨爲第三步計其歲時鹽業銀行苟決計舉辦則一年可具規模三年可期成熟地租一事三年可具規模五年以外乃能完備若次序錯紊倒從地租入手則徒滋轉轄而事必無成若從放荒入手則尤屬倒行徒生阻力是經營蒙古計畫非從鹽業專賣無

著根地方應以全力持之爭此一著誠

朝廷主持辦理必無阻礙可爲豫斷爲大局計以勿游移
畏阻爲要至煙土稅牲畜稅放荒三事應否舉辦別詳概
略如左

一煙土稅

查該郡王原呈稱喀喇沁每年煙土重量在百萬兩以
上價值銀二十四五萬兩若照價什一抽稅以少數計
應得銀二萬兩等語查該旗雖出煙土殆未必有百萬
兩之多

沿途見民田所種
鴉粟並不過多

且熱河求治局四項稅中煙

土稅實居其一履畝定則由州縣抽收民間已照數完納勢難重徵特種煙之利遠過五穀且係害人之物理應以徵爲禁多取之而不爲虐暫可按種煙地畝加抽學堂捐以助該旗學堂經費特抽捐一節尚非該郡王力量所及無論該部貴族蒙民或認種漢民苟非由部院或督撫各衙門主持則勢必抵抗須酌量派員此項委員州縣佐領等官皆可前往協同履畝酌抽以定規則每年收支各數須報練兵處及直隸查核

一 牲畜稅及放荒

查該郡王原呈稱游牧各旗無地稅煙稅可收者可以放荒可以收牲畜稅饒足則多練饒絀則少練十年之間必有可觀竝請以喀喇沁右翼一旗爲嚆矢等語該郡王具此血忱公忠愛國自堪嘉尚惟查內蒙古牲畜買賣率以每年八月東集于小庫倫西集于喇嘛廟俟其會集之時派員前往監視卽收稅項原可試辦特歲可收稅若干見尚無可查攷至其平時零星買賣及外蒙古牲畜貿易聚集之處尚須另查若放荒一節斷不可以收取押荒經費爲宗旨竊謂墾荒一事宜任蒙漢

自爲交易官設農政局于未墾各旗其宗旨以提倡墾闢爲主不以收取押荒爲主國家大利在土地墾闢以後而不在目前墾放之時茲擬蒙漢交易定爲四種辦法一蒙地漢墾墾孰以後地畝均分各半執業一蒙業漢佃立限墾孰視田所收業佃各半一蒙收押荒漢爲永租酌定租票仍歲繳納一准通買賣土地過割一如內地自業自耕亦殊直截官爲定此四種辦法任蒙漢自爲交易交易既定由漢民赴局掛號局祇稍收掛號經費每頃一兩以充局用三年以後乃行清丈稅契升

科似此最簡而易行墾闢較易若責繳押荒乃准開放則蒙人有空白失地之懼漢人有多費折本之虞勢將畏阻不行必致荒無從墾銀無從收而後已聞東西放荒辦法率從已墾之田指收押荒實則放出真荒寥寥無幾是佃戶先已納價一次于蒙民而又需繳價一次于官吏則佃民喫虧甚大其在蒙民則未經收價之田收租必多而一繳押荒則租入須減是蒙民折耗亦巨此放荒一事祇可謂之孰地勒費不可謂之荒地押荒所以蒙漢間之幾如談虎色變此放荒所以絕少成效

而徒滋苛擾轉生絕大阻力也要知墾闢以後國家利
入且十百倍于押荒區區目前押荒銀兩何足計數有
較然者今經營蒙部以墾放便捷爲一定主腦豈可再
蹈覆轍是以墾荒一事可任蒙漢自行交易無庸立放
荒名色而轉致無荒可放也

通查東蒙全局鹽業銀行地租三項乃大利所在亦政策
所資而理財練兵及舉行一切新政皆于是乎藉自應以
全力經營以立不拔之基其喀喇沁煙土捐畝稅以外暫可按
畝加抽以濟該旗學費之窮牲畜稅一項姑從小庫倫喇

嘛廟試辦徐圖推廣之法惟放荒一策事在必行然必蠲除押荒銀兩乃能迅副墾荒之實際此皆此次東行所詳悉攷證而得者也特事體重大百度權輿而無事不與地方有關繫非通達時局諳練吏治且習于理財練兵之員兼有地方之權不足以肩此任竊惟東四盟蒙部地方東拱陪都南屏畿甸山川險阻縱橫幾二千里我

朝開國之初以東三省爲重地以榆關爲咽喉若柳條邊門迤西而北灤源流域以東雖附肘腋竝非要區頃者時局遷移今昔異勢東北邊事紛起疊乘遼西防維難須臾

緩及今圖之業屬徒薪之計竝非未雨之謀地雖一隅事
關全局因革損益制貴因時治忽安危理無中立此
所爲臚舉東部全蒙大勢而以上備鈞裁者也所有遵查
喀喇沁郡王原呈各節肅此覆呈再此次說帖以限于篇
幅其一應節目尚有未能詳盡之處應再續陳合併聲明
恭叩鈞安伏乞垂鑒

卷之三

三

續呈實邊條議以固北圍說帖

光緒三十一年八月
上練兵處王大臣

竊錫光

前奉鈞劄查攷喀喇沁郡王原呈所稱理財練兵

暨學堂各節業于七月十八日遵將查得情形呈覆在案
惟是經營蒙古一事體大思精細目宏綱非一事一言所
能罄盡茲再擬就實邊條議四道以闡前稟未盡之蘊恭
呈鈞鑒以備采擇竊維患氣之來恆自虛而入故古人籌
邊之策最重實邊實邊云何卽西人之所謂澎漲力也澎
漲力有三一生物之澎漲力一財產之澎漲力一政治之
澎漲力而財產之澎漲力亦有二有農業之澎漲力有工

業之澎漲力有商業之澎漲力而各種澎漲力實互相爲用無民間生齒財產之澎漲力以爲國家之後援則政治之澎漲力無自而生無政治之澎漲力而民間生齒財產之澎漲力又無自而保無農業之澎漲力則生貨不多而工商無本源無工業之澎漲力則孰貨不成而農商無運用無商業之澎漲力則銷貨不廣而農工無交通此數澎漲力者蓋國力之所以充西人生齒財產之澎漲力咸臻極盛所以橫出旁溢能從己國越數萬里而侵入人國如水流在地稍有低窪之處卽奔騰傾注于其中而其國家

政治之澎漲力亦隨以俱大此皆從至實而來非侈言長
駕遠馭也夫中國人民生齒農業之澎漲力亦稱極盛其
在本國則附邊城迤北一帶東西數千里南北六七百里
皆內地之生齒農業所流溢而出其在外國則美洲澳洲
之大陸及南洋羣島多半恃華民所開闢又皆中國之生
齒農業所流溢而出竝不藉兵力之保護甚且有無限之
艱阻困阨乃能隻身行千萬里以自謀生殖其力量不可
謂不大特商業殊無團結工業絕少萌芽所以澎漲力遠
遜西人而輒爲所陵駕國力亦遂受其弊然其生齒農業

之澎漲力固大可用也夫新開之地無不先從農業入手爲第一著蓋必農業興而後草萊闢榛莽芟于是人始有棲止之所周行之道煙戶稍聚工商諸業乃有所附麗此自然不易之理美澳諸洲無不先從農業極意經營此其明效大驗我國蒙古地方何以異是自應從民間固有之澎漲力盡力擴充于其未有之澎漲力盡力提倡實邊之道胥在是矣竊維我國歷代以來開邊之策率主兵力而無民間之澎漲力以繼其後往往一蹶不振觀于漢唐盛時其鞭策所及亦殊遼闊漢開西域營輪臺唐于西北兩

邊亦曾開金微幽陵龜林燕然北庭龜茲諸都督府然皆
旋得旋失守棄不常蓋孤城遠戍力薄形單其勢原不可
久古昔諸儒痛言開邊之非實有所懲語非無道不知見
在西人開拓之雄恆以實力之澎漲爲主不以兵力之所
至爲主而兵力之澎漲亦自在其中今者我北徼孤露極
矣先宜充實內蒙古而推其力于外蒙古土謝圖一部
後條議
各節以爲之基漠南全境宜立統治之法漠北諸部宜
籌開闢之方錫光所謂實邊者此也竊以化學之理以比
例游牧耕種兩種游牧者化學中之所謂流質也耕種者

化學中之所謂定質也以物理言流質固僅具形聲定質
乃堪成器皿然則游牧之必不可長而耕種之必不容緩
固深切而著明矣自烏拉大嶺以東西伯利亞全部入俄
人之手以後而游牧日微耕種日廣其明徵也夫游牧者
宜于封建而非可以大一統之治治之者也耕種者宜于
郡縣而可集權于中央以治之者也事理較然殆無疑義
茲擬實邊條議謹繕一通上呈鈞座有無采錄恭候裁決
祇請鈞安伏乞垂鑒

實邊條議 同上

議一 東蒙地方制置

竊惟熱河屬境見凡二府一州五縣南枕邊牆北連朔漠

西控三廳東瞰遼瀋蓋神京之肩臂而陪都之上游也慕

容氏之和龍今朝陽府境內北魏之安州今承德府治及灤平豐甯等縣地營州

今朝陽府平泉遼之中京道金之北京路今朝陽府境內

之大甯城即遼中京金北京舊元之上都路今朝陽府西

甯縣境內大甯路今朝陽府及平泉州赤明初之興州今朝陽府

豐甯縣境大甯今朝陽府全甯今朝陽府營州今朝陽府各衛所

其州軍郡縣錯綜境內久矣夫疆邑井然受治于有司竝
非雪窖冰天爲亙古荒落之區也特隋唐之間沒于庫莫
奚前明永樂以後棄于朵顏三衛此數百年間爲王靈所
不及郡縣之治乃中輟耳竊謂王者設險以守其國必能
限帶于藩籬以外乃能奠居于堂奧以內我

朝龍興威靈遠播東極黑龍江北環外蒙古悉主悉臣爲

我環衛是以柳城

朝陽境內

以西臨潢

赤峯池北

而南旣非內地亦

非巖疆譬如人身腋脇所在痛癢雖關以視肩背股肱捍
衛任負著力之所緩急固迥不相侔故自開國迄今三百

年來噢煦覆育之意多而力征經營之意少蓋有由也頃者今昔殊形衝僻異勢東北兩邊自俄羅斯西伯利亞鐵道成而全局一變自日俄交鬪勝負和戰皆于我有絕大關係而全局又一變恐戰事告竣以後將東三省利害我與日俄共之向之視爲內地者今不啻巖疆而東四盟蒙古適當畿輔奉吉腰膂之間此實堂奧之憂並非邊隅之患也似應極爲經營建設重鎮斯內于京師有磐石之安外于奉吉有建瓴之勢時勢所趨所宜急起直追不可前卻徘徊坐失事會者也夫漢闢河西而關中始安唐鎮隴

右而長安始固明棄開平大甯諸衛而邊牆以外翦爲戎
藪識者非之曾不數傳果受其弊今者東四盟蒙古境域
實卽我

朝之河西隴右也亟宜擴漢唐之遠圖勿蹈前明之覆轍
頃以中立之故提督馬玉崑所部屯駐朝陽孤戍客軍乃
一時權宜非可久長而熱河之駐防旗兵古北口提標綠
營東四盟各部落之蒙古箭丁坐倉而嬉實不堪用斷難
恃爲折衝禦侮之備也時局所乘利在通變謹擬三策備
臚于左

第一 應如新疆開設行省成法將熱河口北兩道所轄二府三廳六州縣益以迤北境地畫至外蒙古南界止西循三廳邊境順山河天然形勢亦北指外蒙古界爲西綫別設直隸山北行省以資控制

直隸山北行省仍兼轄于直隸總督別設巡撫凡吏治財賦兵政漢民蒙部皆所專轄以歸統一

設立行省宗旨其對外意見原隱然爲監制奉吉屏障畿疆而設所應設立軍鎮自以東面爲重北面爲輕

東面足爲奉吉聲援北面特車臣部後路

巡撫應駐赤峯卽于赤峯也

東而北設立軍鎮則外而奉吉之交可資策應內而

東四盟南北之會差亦適中且赤峯迤北而西爲烏

昭達及錫林郭勒兩盟蒙古其境地多未墾闢

錫林郭勒

盟全境未墾

茲封疆大吏駐節赤峯益以軍屯漸擴而北

則人民輻湊氣象殷闐將氈毳之鄉漸成邑聚孳牧
之壤盡易田疇不出十年將稱樂土

行省旣設財政爲先地稅之清釐蒙鹽之專賣銀行
之設立爲入手三大宗而經營礦業提倡工藝裕課
益民爲利尤溥凡此設施區畫以漸有人有土斷不

憂貧此其大綱條目所枉別有專篇茲不備具

山北地方遼闊每一州縣幅員輒數百里幾與內地一府面積相埒若增置縣邑徒滋煩擾既費官帑抑且厲民擬參用東西各國郡市町村各法以歸簡易而省官力別有內政區畫一篇列後茲不備具

山北開闢未久民氣敦樸蒙古箭丁原充兵役漢民生計僅資習于勤苦亦不同內地浮靡文弱習氣相其質地最宜爲兵苟教練得人可成勁旅立法之始徑可畫作兵區行徵兵令不分蒙漢一律簽役其徵

兵法令條目甚繁別有專篇茲不備具

山北疆域東控全遼南屏畿甸經營之始姑設新兵
一鎮以奠基礎推其究竟總須新兵三鎮方資控扼
應于赤峯迤北而東設一鎮建昌朝陽之交設一鎮
圍場境內設一鎮聲援相接犄角可資應俟布置得
宜經費稍充刻期推廣以鞏疆宇其中或用日本北
海道第七鎮屯田法抑照內地軍鎮一律編制均候
體察情形屆時酌定

以上乃第一策規模稍闊收效亦宏苟經理得人此

誠磐石之安苞桑之固也若以事屬大舉經始爲艱
庸勅于因徐圖進步別設第二策如左

第二 擇通曉練兵理財吏治之員

簡派督辦墾練事宜兼熱河都統而直隸于練兵處
練兵理財如無地方之權則財無從理兵無從練故
必兼熱河都統既兼熱河都統斯爲地方官卽易爲
成例所限文法所牽故擬直隸練兵處方能破除拘
攣不致爲理藩院及各部成法所束乃能別開生面
而事有可爲

照以上辦法則權限所及自不出熱河轄境兩府一
州五縣及卓索圖烏昭達兩盟蒙古以外其口北三
廳及哲里木盟四部蒙古屬盛京將軍錫林郭勒盟五部
蒙古屬察哈爾都統自非事權所及

惟財政大宗當以蒙鹽專賣爲第一入款胥仰爲開
練新兵的饗蓋馬賊之縱橫東省之逼近畿輔邊境
之延長俱東急于西非若察哈爾境僅爲外蒙古庫
倫後路相距尚遠且南接邊牆地段亦較短縮特蒙
鹽產自錫林郭勒盟之烏珠穆沁部隸于察哈爾都

統應將蒙鹽一節專案提出督辦爲東道練兵專款
斯百度權輿方有措手地步

哲里木盟四部蒙古境地僅十分之二三錯入奉吉
邊境而表延于盛京吉林邊外直接熱河邊境東北
隅者凡十之六七盛京將軍旣鞭長莫及將爲甌脫
之地則害氣易中似應將哲里木盟蒙古境地凡原
出東三省邊境以外者一律畫歸熱河管理則熱境
東拓而北一旦有事方足遮斷奉吉西上而南之路
其錫林郭勒盟蒙古部落值熱河全境北面者亦應

畫歸熱河管理以通聲援而免牽掣又不僅烏珠穆沁鹽業提歸督辦已也

如以上辦法權力所及尚足練新兵一鎮先以一協開辦以漸推廣俟成鎮後再視物力盈絀以爲進止特兵隊駐所仍宜注重東路建朝之交屯駐一協赤峯迤北而東屯駐一協而督辦以半年駐熱河半年駐赤峯經理兵隊兼督北面墾務

其地稅銀行礦業工藝內治徵兵一切仍如前第一策辦理特規模較小收效較微乃權力所限此特以

爲建設行省先步乃一時權宜試行之計俟事機稍孰仍待擴充非可倚爲定法也

以上乃第二策辦法範圍收縮已難厚積其力以赴事機若再剖觚爲圓力求卑近請言第三策如左

第三 練兵理財區而爲二理財一人由練兵處奏派竝以補熱河道而別派鎮統或協統以司練兵理財與吏治相表裏如無地方之權則呼應不靈故必兼熱河道以資實行

由練兵處奏設籌餉局于熱河中分五股曰地稅曰

鹽業日銀行日礦務日勸工卽奏派該員督理而總其成于練兵處儘所收入以爲境內開練新兵的鑲視收人的鑲歲得若干以定新兵開練若干此則枝枝節節爲之固不能一氣呵成而兵區之分畫徵兵之實施蒙漢之同役與夫內治之改絃更張恐均非其權力所能舉辦特地稅鹽業銀行三端苟得練兵處主持于中而又濟以風力彊幹之員尚克收成效至熱河道處都統統轄之下其意外之牽掣固亦勢所必然特地租鹽業銀行諸務皆特別開辦之事向

非都統所有此竝不侵都統權限且此乃練兵處奏
明特派之員而兼管熱河道俾藉專轄地方之權以
濟特別應辦之事與尋常熱河道卻有不同矧新政
所關練兵所繫又與尋常地方事件不同則都統似
尚無所用其牽掣抑或別加崇銜以隆體制俾免掣
肘亦無不可

以上乃第三策辦法收縮愈小動力愈微責效觀成
亦必有事倍功半之慮然得尺則尺得寸則寸苟盡
一分力量究有一分進步較安戢無爲任失事會者

固天淵也特原始要終總非兼有地方事權無論大小不能有濟若僅負空名竝無實力主客殊形則成敗立判雖百其員以效馳驅亦無當于事是直謂無策

議一 蒙古部落處置

我

朝撫綏蒙古分建札薩克台吉塔布囊以掌旗務畫疆而理實卽封建之制也而熱河一道又設承德一府灤平甯平泉赤峯建昌朝陽六州縣頃又升設朝陽一府析置

建平一縣而口北一道分設三廳山西邊外增設七廳此
又郡縣之制也竊惟封建與郡縣二者不能竝存而封建
之法尤不宜于今日之世界勢分力薄不相統一不足捍
禦外侮其勢不能久存自非易封建而郡縣不能爲治然
欲易爲完全無缺郡縣制度非收回各札薩克土地人民
之權不可其收回各札薩克土地人民之權若何道在柔
和利導而得其歡心非謂彊取豪奪而致生阻力也其柔
和利導之法若何第一其王公台吉塔布囊須不失固有
之富貴第二其上流蒙古人須予以登進之路第三須裕

蒙古丁之生計第四蒙古與漢民准典賣田土一如內地田地過割辦法第五不論蒙民漢民同受治于地方官而其扼要之方在化畜牧爲耕種易水草而宮室乃能易封建而郡縣則各蒙古札薩克土地人民之權不必言收回自無不收回而國家練兵理財之方設險守國之道乃有所措手茲臚舉其略如左

第一 蒙古王公台吉塔布囊不失富貴

蒙古王公台吉塔布囊凡兩等一世襲札薩克之王公台吉塔布囊一不管旗務非札薩克之間散王公

台吉塔布囊世襲札薩克之王公台吉塔布囊有管
本旗土地人民之權不管旗務非札薩克之閒散王
公台吉塔布囊無管本旗土地人民之權而各有其
私產私奴才如采邑然

蒙古各旗分建之初純爲封建制度札薩克如古諸
侯其各貴族如古大夫各旗之中有官地有私產官
地及其本部箭丁永爲世襲札薩克所管理如古諸
侯之公家然私產及私奴才則各自管理有札薩克
之私產可以分不襲
爵之眾子及私奴才有各貴族之私產及

私奴才有各喇嘛官廟之私產及私奴才有各喇嘛
私廟之私產及私奴才除札薩克所管之官地及自
有之私產以外皆非札薩克所統治如古大夫之私
家然因是上行下效推之各箭丁亦各自爲計蓋枝
柯盤結根本已傷所謂君國子民者早亾其實而僅
存其名則內蒙各札薩克之失其統治力也久矣其
致此之由大半由于土地之墾闢蒙漢之雜處蒙古
各旗所以分裂者以此國家所以得設置郡縣者以
此將來得徐收其土地人民之權者亦以此然則國

家處置蒙古之方當以推擴墾植爲第一機括

經理蒙古自以優存其王公台吉塔布囊固有之富貴竝俾以格外希冀之富貴卽以收其土地人民繫屬之權力爲一定不易辦法蓋自己設郡縣之蒙古地方蒙漢之交涉受責成于地方長吏其各札薩克久已視爲畏途而其內容之中又分裂已久號令亦不能盡行于部落故其視土地人民之權也甚輕則國家之收回也甚易自不待言惟其所護持者見有之利權所希冀者格外之富貴誠如其所願以償之

則阻力自消而推行極易茲舉其節目如下

故有之利權有二一爲隨札薩克之官產一爲每歲攤派其蒙丁之公費希冀之富貴有二一爲蒙地礦產之利一爲朝官仕進之榮

隨札薩克之官產已不啻其世襲之私產應無論官產私產凡向爲札薩克所掌者應一律給與管業並准其任便典售蒙漢或分給子孫惟不准典售外國犯者革爵罪之其閒散之王公台吉塔布囊所有私產辦法亦同

至每歲攤派其旗下蒙丁公費原爲班兵放卡巡哨
竝例貢年班使費及府內辦公一切經費頃練兵旣
由國家主持則蒙古班兵自應停廢蒙丁統歸地方
官管轄則府中辦公經費亦可省罷土地之權旣歸
國家則例貢亦可奏請蠲免而年班則奏請延展期
限改訂輪次屆班仍由所在地方酌給津貼而寬免
其一切使用如是則歲攤其旗下蒙丁公費自可全
行免除立爲定制

蒙古礦產爲絕大利源乃爲成例所限制且爲官吏

所把持既絕其人股之階復隱有奪地之實而官吏
經辦又本絀弊叢莫覩成效蒙地諸礦無法開辦者
以此蒙人所觖望者亦在此今若官爲提倡而准蒙
古王公貴族儘數入股則蒙地無不開之礦山而王
公有可貪之巨產則繫戀之心多斯旁鶩之志少而
稅課所入國家亦實收其益似所亟宜開放以繫其
心

蒙情所向最慕朝官請文自侍郎以上武自總兵以
上可酌用蒙古王公而文職自七品以上武職自五

品以上准參用其協理台吉塔布囊等員此途一開則蒙古上下心志移而全體解而土地之開闢全境之歸流不終日矣

第二 蒙古上流人予以登進之路

蒙古人向祇作其本旗旗官至管旗章京止無登進朝官之路而其傾慕朝官之心有異常熱誠至謂其二三品官階不如一生監誠使將蒙古人一律歸地方官管轄其出身仕途一律與各州縣漢人無異則內向之情如水赴壑

全書卷之三
三
朝廷似亟宜因勢利導吸收無量數之蒙民直隸于
國家統治之下同化之力似無過于此

第三 須裕蒙丁之生計

蒙丁生計之窘厥有四端一本旗徭役之煩重一地
方境域之荒涼一宗教迷信之耗費一喇嘛重利之
盤剝

蒙旗徭役厥有兩端一班兵輪值箭丁任之一府主
役使奴才任之皆無薪饗工資卽其旗下官員亦無
俸給既占其有用之身遂絕其資生之路此數百年

來所以蒙戶日凋而逃亾日告也

凡民間生計皆以交換而得孟子所以言通工易事也蒙地限于成例墾闢不多人迹荒涼不成市廛工商不興無從交換耕牧餘暇安坐以嬉貧困之由亦半出此

秋成以後比戶嗥經僧衆之權且可勒派見款銷糜莫此爲甚平日又無工可做不見一錢禾稼未收資生之謀惟仗利債而喇嘛實爲蒙戶債主通計月息約合三分五分或至加一加二以上不等秋收所入

除還債擘經抵用以外贏餘無幾不待來春又須恃借貸度日矣

誠使治以郡縣易以練兵則無所謂輪值之班兵亦自無府主之役使斯徭役去而此身皆可奮力之身矣墾闢日多農業日講人戶日聚工作日多則無時非可奮力之時矣蒙漢雜居學堂漸立徐濬其智以藥其愚宗教之迷信不攻自破則擘經之資重利之債亦日輕減而消耗節矣似此則有害于蒙民之生計者日以除而有裨于蒙民之生計者日以廣矣

徵兵之新令行而入伍者有饒生計一漢民之赴墾
多而蒙民習于農業者計二工業之大利興而生產
日富生計三礦山之寶藏闢而工價日翔生計四交
通之經途便而營生易謀生計五則不必言蒙民之
生計而生計自饒固無疑義

或謂蒙民之生計在畜牧不在耕桑今多致漢民易
水草之饒爲隴畝之用是奪蒙民之生計何謂裕蒙
民之生計不知見在萬國交通游牧生涯斷無持久
幸存之理西伯利亞墾種之速率其明徵也恐不出

五十年游牧之風將絕景于地球之上何如早自爲計而蒙古生計尚可曲爲謀也且游牧之俗慄悍轉徙植根不深乃蕃落之豪斷不足言立國之道試觀此方數萬里之區自漢以來種族攘據更代起滅歷二千餘年而境地荒涼絕少進步則游牧之不足恃爲生計已可概見然則言經營蒙古者自以開通爲生計斷不以閉塞爲生計固較然明也

第四 准蒙古與漢民典賣田土

土地人民國家所恃以成立也有土地無人民與無

土地等有人民而轉徙無定居去就無恆性亙古榛
萊不可以聲名文物治者仍與無人民等卽與無土
地等然則國家之所利一言以蔽之曰土闢民聚而
已土闢民聚入手之方莫急于農業必有農業之基
礎乃可圖工商之進步而後國家政治乃可施其條
理而後國防區畫乃可有所編成此自然不易之理
而此皆爲蒙古性質之所短時局遷移古今異勢爲
北徼立不拔之基作固圉之計非化行國爲居國不
可欲化行國爲居國非利用內地農民不可利用內

地農民非准蒙漢得典賣田地不可

或謂蒙漢得典賣田地恐蒙民盡失其根據是將大害于蒙古則又不然人類之生活智識以互換而成能力以交用而盡蒙古割其部分之地半以予漢民卽不啻漢民售其耕種之長隱以貢蒙古而蒙古徐以其荒涼寂寞之區化爲邨社桑麻之境而蒙古土滿之患與漢民人滿之患皆潛消于不覺而

國家澎漲之力亦自周匝于邊陲是則蒙古利漢民利而國家之大利亦自在其中所不待言

至開放之法祇須宣布法令任漢蒙自行典賣自行交易而不必官爲放荒事乃簡而易行聞東省之放牧場西邊之放河套皆取民間已經開墾成熟之地勒收押荒銀兩實未放出荒地一畝徒使未墾之地人轉視爲畏途而莫利耕種致生無限阻力蓋押荒銀兩者一時之微利而土闢民聚藉以實邊者經國之遠圖誠使寬其銜勒操縱有力使向日不任租稅之土地不供徭役之人民而榛蕪日薙土質日良氣候日新穡事日廣出產日滋人戶日益籌邊之策何

利如之豈區區押荒銀兩所可比擬似至計深謀斷不以彼易此

國家不取押荒不收地價而明布法令任蒙漢自行典賣則人必爭趨而蒙情亦順就中于地價內准其提取二成以一成歸旗主以一成歸喇嘛廟定爲成數而令其自報墾之日起扣足五年乃行清丈升科復寬限三年乃令稅契似此辦法殆不過十年將內蒙古一帶苟非沙磧不毛之地斷無不耕之田卽推之外蒙古亦何不可一律辦理

再于蒙漢典賣以外復有分地一策蒙人出地漢民出力期以五年爲成熟程限墾孰之地業主墾戶各分其半皆爲永業官給執照照例升科亦一辦法

又如有大資本家或以獨立或集公司願購大段土地至十百千頃試用美國大農辦法者則尤利于國家應准稟明官爲料理蒙人得價貨主興農特官爲主持除屆時升科納稅以外不取豪末則開闢尤易自宜縣格以待

照以上辦法則蒙古旗主及喇嘛廟得地價提成之

益蒙民得地價之益或孰地之益竝諳習耕種之益漢民得墾地之益而邊防充實患氣不生理財治兵皆有所措手其無疆利賴之益則

國家收之亟宜迎機利導以擴宏圖

第五 不論蒙民漢民同受治于地方官

同立于一土地之上而區別兩種人民受治于兩種官吏非特五洲萬國無論本國屬地無此辦法且畛域區分勢必猜嫌互起訟獄繁興迭起憤恨茲蒙古各部已開作府廳州縣之處應無論蒙民漢民皆受

治于地方官此于政治上關係乃有畫一之方于社會上關係方于同化之力

無論爲蒙爲漢概以其見住爲斷一律編入戶籍日

後設立市會推舉村正

法具後

亦不分蒙漢一律選任

其戶婚田土錢財債負一切詞訟句提訊質以及田畝過割錢糧徵收無分蒙漢均惟地方官主之則事有統宗治法乃無紛錯

蒙戶向分隸于本旗各佐領之下是各佐領卽各蒙戶之地方官今則歲月久遠各蒙戶之遷徙逃亾多

已不可究詰且每一佐領下蒙戶率分散于數百里
內各佐領下地段有事傳喚力且不逮何論管轄是
各佐領下冊籍空存久已無法統治固已窮而必變
則一律受治于地方官而以見住爲斷自爲一定不
易之法

以上五條皆言安置蒙古方法務使上而王公中而貴
族下而丁壯罔不各得其所求而使其土地人民收回
于不覺夫

國家豈利其土地人民而設方法爲巧取之策哉蓋東

北兩邊疆鄰逼處非合散而無紀之蒙古總集其勢力
以人爲形勝建此無形之長城不能鞏固

皇畿奠我疆圉卽蒙古亦實式賴之乃能以息以生長
承覆育是爲

國家計勢有必然卽爲蒙古計亦理無或二也日本不
收回諸藩土地不能啟維新之業我今不收回蒙古土
地人民不能爲鎖鑰之謀究之日本諸藩迄今與國同
休長享爵祿于諸藩亦何嘗不利我之蒙古何以異此
矧出柔和之方持以積漸之法使其蒙歸還土地人民

書家多言
之福而不失尊榮安富之恆所以爲蒙古謀者亦至矣
制貴因時法難泥古

國初利在封建故不嫌任其自治今日利在合併故勢
必收其主權利害所形無所用其顧慮使

列聖而處今日窮變通久之方恐亦不外此已

議三 內政區畫

管子治齊作內政寄軍令伊古以來無內政不修而能言
疆兵者東蒙諸部當北魏及遼金元數朝曾建立陪都分
設郡縣特疏節閼目綱紀不完治法與內地迥異故亦無

成績可言我

朝龍興建爲藩衛設理事丞倅以綏蒙漢嗣以漢民出關
佃種者多乃分立州縣以理訟獄然有治僑厲漢民之權
而無治各旗蒙古之權亦無轄蒙古土地之權是以休養
生息垂三百年國家率以寬大處之從未著意區畫頃時
艱日棘經營蒙古勢不可緩自無因仍故轍長與終古之
理此內政之所以不可不講也茲專就東四盟蒙古言有
已開墾旗分有未開墾旗分有已設州縣地方有未設州
縣地方其卓索圖盟兩部五旗及烏昭達盟之翁牛特部

兩旗教漢奈曼喀爾喀各一旗凡四部五旗是皆已經開墾旗分而亦爲已設州縣地方其哲里木全盟科爾沁郭爾羅斯杜爾伯特札賚特共四部十旗亦皆已開墾旗分且地極肥饒而全境錯入奉吉黑州縣中者約十之三其伸出奉吉黑州縣外者約十之七又烏昭達盟之克什克騰部一旗亦伸出熱河全道州縣北面以外是又皆已經開墾旗分而爲未設州縣地方至烏昭達盟之巴林札魯特阿魯科爾沁凡三部五旗錫林郭勒全盟凡五部十旗則皆未開墾旗分而爲未設州縣地方茲言經營之法其

素經開墾旗分亦未設州縣地方祇有提倡農業獎勵墾
務俟土地闢而人民聚有設立州縣地步乃有下手方法
此已于第二策內准蒙漢典賣田地條詳細言之所貴切
實施行舍此以外斷不能別有捷法若已經開墾旗分尚
未設州縣地方亟應畫出地段設立州縣與見在已設州
縣各旗分照後擬各條受同等之治其已經開墾旗分且
已設州縣地方自應以爲經營蒙古根據之所其內治辦
法即爲日後新開各地榜樣一切條段由此類推茲釐爲
行政綱領財政機關巡警設施賦稅收納訟獄句提地方

徵兵番召教育設施八大綱備臚其略如左

一 行政綱領

內地行政之權集于州縣凡詞訟錢糧緝捕巡徼郵驛建造修治教育諸政皆萃于有司之一身此斷非一人之精力所能周匝且以州縣孑然之身孤寄于向未習履之地是非利病率多隔膜勢不得不假手書差以爲臂指百弊之生率由此起而不肖長吏因緣爲奸更無論矣今蒙古地方百端肇造自應將歷來之州縣積弊一掃而空宿垢旣去新機乃生其道

在減輕州縣之責成而行政之權分設機關參用東西各國州郡村町之法俾之相維相制斯州縣既無叢脞之憂亦無作惡之地則書差之弊不去而自除蒙地州縣地方遼闊應將全境分作若干鄉每鄉之中有若干市鎮若干村莊每鄉設鄉長一人鄉副二人或三人有公所一區每市之中設市長一人市董無定員亦有公所一區大市鎮分兩區城市亦如之每大村設村正一人村副一人就近小村附之約以百家爲準凡編查戶籍分別年齡

年齡與徵兵入學皆有關繫

協

催田賦掌管過割升降賦則籌備公款料理徵兵管
編治安巡警皆其所有事責任綦重必給薪水以資
養贍每職三年更換即使連續亦祇以六年爲度

鄉長鄉副市長村正村副雖給薪水而仍爲名譽員
地方官所當優禮與向來地保社首等人迥不相同
每屆更易鄉職之時先三個月傳知該鄉該村令有
田一頃以上或商業資本值三百金以上及曾由中
學堂以上畢業者定期會集投票公舉地方官親臨
監視取其票數多者由地方官具詳上司其鄉長鄉

副市長市董由本府給札委用村正副卽由本州縣給札委用均須冊報大吏

凡選舉鄉職不分蒙漢一律選用惟以投票多者爲準

如選舉之人實有劣迹不堪任用地方官可駁使另舉惟所駁之人必有劣迹可指方得另選而地方官却不得示意公眾令舉屬意之人

地方鄉職旣舉巡警成立以後而徵收錢糧訟獄句提又另擬辦法

另見賦稅收納訟獄句提條

則州縣除供本署服

役外一概差役可以全裁著爲令甲

其署內句當文書別延品端而能辦公牘之佐貳並
參用地方之士人有品行學問者以充文案則一應
辦公家丁及各科書吏皆可裁撤狐兔既去方可言
治

地方官所延用文案却不隨地方官爲去留定以六
年爲期限每屆三年更易其半苟非屆滿之年並無
過失無論換官與否不得無故更易

有過犯或不任
公事者不在此

例如勤慎從公有功可錄者准地方官詳送上司致

驗得實本省佐貳官得超補拔署士人得拔委局差俱定爲例

凡州縣一切陋規旣須革除而又不經徵錢糧無平餘浮收可以賄補自應除廉俸外寬給衙門經費以資公用竝加津貼以贍私計公費仍須核實詳銷津

貼則無庸具報

衙門經費各國所謂官廳費

或謂選用鄉職延用士人得無啟地方把持之漸且開內外句結之門不知非也見在州縣除一身及賓客以外所用紳董書差何一非本籍人紳董有事權

而無責成書差則直把持而又跋扈何如選自公論
限以年分領薪資則有擔承惜名譽則有顧忌卽有
不肖者錯出其間固可以法繩之非特較用書差不
可以道里計卽視用紳董亦較受驅策而易令守法
也

二 財政機關

全體財政以鹽業銀行爲機關近而勸業儲蓄悉屬
其中遠而鐵路開鑛亦由之起其大概規模條件業
具前牘茲不具述

鹽銀兩業爲人生日用所必需而布于全境城市集鎮爲官私出入所利賴是卽官私之各總分銀庫而全局皆處活潑之地則地方一切內治之振興與實業之提倡皆有所措手矣

三巡警設施

巡警自行政司法及軍事巡警外其地方巡警則曰保安巡警凡都會及府州縣治應用司法巡警行政巡警專以官款舉辦其鄉市村鎮應用保安巡警則專以地方公款舉辦其警弁由鄉長市長村正延用

惟仍必聽官巡警總局分局號令受巡警官攷查

城鄉巡警設立周匝則一切官民交涉傳呼句提諸事均任于巡警斯差役自不須下鄉而四班官役可以省撤

其在兇徒地棍凡已犯案未犯案或有重要案件皆由官設之司法警察購捕其保安巡警亦應協同密拏

四賦稅收納

賦稅收入以土地稅爲大宗辦理向無善法內地辦

法係由州縣簽差催徵設櫃收納于是有值路糧差分鄉櫃書等名目官之平餘多則數萬金少亦數千金出其中書差數百人卽數百家之糜費出其中加以糧差下鄉之滋擾糧戶入城之旅費民間直已焦頭爛額而

國家所入較民間所費能及二分之一已屬多數今經營蒙古徵收賦稅斷不能再蹈覆轍則改絃更張自不待言

口外州縣向無錢糧今定則徵收自應埽除內地積

弊應以稽徵造券之權屬于州縣送單

即易知由單糧戶應完錢

糧詳載其上

催徵之役屬于村正副收納之處屬于各鄉

就近銀行支店句提欠戶之役屬于巡警則事輕易舉而糧差櫃書之煩擾乃可破除

其法于收錢糧時州縣先期造成易知由單並收銀券票將各鄉易知由單連同印簿發交各鄉長即將是鄉券票並存根亦連印簿移送附近是鄉官銀行支店于時鄉長以各村易知由單並印簿轉發各村村正村副乃將易知由單分送各糧戶各糧戶乃照

由單所開本戶應完銀數從官定平色赴附近銀行
投納銀行乃將券票掣交糧戶收執

口外秋收約在七月之杪遲亦不出八月初旬州縣
應將易知由單及券票印簿等于七月初十以前造
成以七月二十日爲限由單須發交各鄉長券票須
移交各鄉附近銀行支店以七月底爲限鄉長須將
由單發交村正以八月初十爲限村正副須于三日
以內將由單送交各糧戶以十月底爲限各糧戶須
將應完錢糧埽數投交附近銀行掣領券票

村正副于送給由單後每十日赴銀行查對已完未完各戶開單具報州縣卽一面赴各糧戶家催徵一次凡具報八次催徵八次至十月底仍有未完各戶卽由村正一面開單具報一面送交本村巡警嚴催仍每十日開單具報再由本村巡警嚴催三次已至十一月底如仍有未完糧戶則州縣據報開送駐城巡警局按戶勾提押繳

每至歲杪各銀行支店將代收錢糧共銀總數連同票根竝注明已收未收印簿移還州縣竝一面將代

收總數若干已完若干未完若干具報總行匯報大吏聽候撥用大吏將銀行報收數目及各州縣具報完欠數目竝調各鄉田畝錢糧完欠徵信冊三面比對則民間完欠收存之實數一目瞭然矣

照此辦法州縣雖失錢糧平餘然凡署內錢糧幕友錢糧家丁之耗費傾鎔解納上司衙門書吏之需索以及糧差櫃書戶吏之蒙蔽把持失察之處分竝上官擇肥之噬同寅抽豐之苦皆可銷除心地清明騰出此有用之身以盡心民事而公費津貼又如量以

予竝不使無米爲炊似亦于州縣無所不利

五訟獄句提

州縣訟獄之弊在傳喚句提收管審斷總其成于一人于是積壓羈禁凌虐枉縱諸病皆由此起茲擬傳喚句提專屬之于在地巡警收管之權專屬之于管

獄官

典史吏目宜優加津貼並宜慎選其人

惟審斷之權專屬于州縣

凡州縣有應傳喚應句提之人送其案于巡警今傳提人證到案應禁押者由管獄官收管人證既齊由管獄官帶人證到署請州縣審訊巡警官有傳喚句

提之權而無收管審訊之權管獄官有收管之權而無句提審訊之權州縣有審訊之權而無傳喚句提收管之權互相監制互相攷查同一案件而每月由巡警官管獄官州縣三面冊報則凡已結未結各案與各等案情無所諱匿矣

凡有關罪名之犯應行解勘者州縣最畏爲大累茲凡應解省解司各案均由在地巡警副長押送則州縣解送之費寄省之費自然銷免命盜案件州縣尤所畏憚茲凡密探偵察捕拏諸事皆責成于巡警則

州縣一切購綫縣賞諸費亦自銷除

視此凡足累州縣者旣一概豁除則恃爲爪牙之差捕自應一概撤除而後吏治澄清可言政理

六地方治法

一國之中海陸軍隊外交政策軍事警察錢幣權衡財政統計此全國主權所在非一州一邑所能爲更非一鄉一里所得問矣若夫地方教育地方保安地方修築地方實業其中經營區畫則任地方自爲之不過官董其成而已此東西各國所謂地方自治然

此實爲全國之內容于治亂安危關係極大此地方辦法所以不可不講也

我國內地公益諸事如各善堂之類何嘗非紳董經管而統屬于官然其事體段既不完全法律又不美備所以一經干豫于官而必遭侵蝕苟使委託于董亦必見把持雖若于國事無關係政治上實受絕大影響今日欲修明內政必自地方辦法始

地方之治胥賴有治地方之人每一村擇有資財田產或中學堂畢業者爲舉主公舉村董十人或六人

再于村董中舉村正村副各一人每一邑分若干鄉

就一鄉各村董中

村正副亦在內

又公舉鄉董十六人或十

二人再于鄉董中公舉鄉長一人鄉副二人或三人

以治各鄉各村之事凡事評議于鄉董村董取決于

鄉長村正鄉長村正責成甚大故必給薪水期任三

年卽必更舉其鄉長副村正副力有不逮者鄉董村

董助之

城市辦法同

每大村連附近小村約以及百戶上下爲一村

地方之治須有治地方之財其應用公費約取給于

兩種捐爲的款一曰田畝捐照其地畝所納稅課加收十分之二隨正課一律交納竝載入由單此項不繳者不給正課券票此款卽存其本鄉銀行支店以待支用一曰進款捐其進款所入歲在百金以內者不抽餘統抽百分之五以爲地方公用于每年正月下旬由鄉長村正會同警察官收取亦統存銀行待撥

每村分田畝之墾廢地質之腴瘠糧戶之過割以造作田糧冊視戶籍之遷徙去留丁口之生死增耗以

造作戶丁冊及學齡兵年之是否及歲與夫實業工
廠開場歇業皆由各村正報告各鄉長層遞上達以
爲百事根據

凡建設學堂保安警察勸勵農工修理道路疏濬溪
流保護森林皆蒙古地方刻不容緩之事亦爲官家
日後稅課所自出其一切用度皆取給于地方公費
如力有不及由公家酌給補助而責成地方自辦
每歲十二月由鄉長主席凡鄉副鄉董村正副村董
皆會地方官親臨監督集議本鄉各村來年應辦之

事應抽之款公同決定經地方官允許詳報大吏立案訂定之後其有阻撓以害公益者罪之

每一歲終各鄉將其地方官收之款田畝稅則糧戶完欠列爲上册鄉用之款入款若干支款若干存欠若干列爲下冊刊爲徵信錄以報告本鄉歲計

七教育設施

蒙古地方生計極絀所以啟智慧而療愚蒙者自以學堂爲急惟五洲萬國官立學堂與私立學堂皆居少數其所恃以教育普及者則專賴公立學堂然必

有地方自治之法而後有地方公費的款有地方公費的款而後有公立學堂此自然不易之理故以列地方辦法專條之內

東西各國凡公立學堂用款約居其地方經費十分之七所以文明日進也茲應將地方公費畫二分之一爲地方教育經費而于官設鹽務銀行周年所得贏餘內提出百分之五專以補助教育經費俟民間實力充足再行截止

蒙古新開地方其教育步驟以多立師範學堂廣儲

小學堂之師爲第一步

師範生不分蒙漢

以全力普設小學

堂爲第二步皆由地方官監督責成鄉長督率村正

合力普設

于師範學堂小學堂以外別設淺近農業學堂淺近實業學堂蒙漢學生參互收入以爲蒙古生計特開先路

淺近農業學堂尤以開通赤峯迤北未經墾放之蒙古爲急此學堂應卽立于赤峯縣附近而嚴令錫林郭勒全盟各部蒙古及巴林等部蒙古竝推及外蒙

古車臣汗部一律備具學資遣送學生來堂入學責
每旗至少須送四人

此學堂切須官款多爲補助

頃查蒙古物產有可資實業者數事境產葡萄可釀
葡萄酒而牛羊原蒙古土產則牛羊肉黃油牛奶一
切罐倉物以及洋燭洋胰子織絨製皮各等廠與製
骨角等器具各種工藝皆蒙境所利賴而喀喇沁右
翼東南隅俗稱東川至土默特部境內皆出有紫衣棉花
可織紫花布皆應設學堂工廠指授造作化天生物
爲人工物運出銷售則蒙古地方必增絕大生計此

等學堂可糾合數州縣力量設爲公立學堂其隨附
工廠亦可爲公立工廠卽作數州縣之公立產業

八徵兵番召

徵召兵役無不與內政相表裏而鄉長村正實爲徵
召機關徵兵令行則一鎮管之中某地屬某標區皆
有定分此一標區凡跨有幾州縣境共有若干鄉則
每一鄉之中派簽若干兵役屆時畫有定數檄下鄉
長

每鄉公所所在卽定爲徵兵簽驗所每屆徵召新兵

之時卽由鄉長傳知各村由村長先將所轄及歲壯
丁冊報屆點驗之時乃由村長率領赴簽驗所診驗
其合格而當簽者卽爲入伍新兵此皆恃鄉長村正
以爲樞紐

國家有大軍旅有所徵發傳呼點集亦由本標區長
官下其區內各鄉長按所應點集者居址轉行各村
自其村正副追召刻期集赴若事起倉猝期限迫促
鄉長副村正副獨力不支則鄉董村董應公同傳達
不失期會以補鄉長村正副力之所不及

內治方法乃繭絲牛毛事最細密亦極繁重以上所舉八端特其綱領若節目所在則須逐條紬繹期無遺義方得詳盡

以上所言方法專爲治理已墾闢之蒙古業經設立州縣者而言其未經墾闢未設州縣之蒙古地方以東四盟言尚有全境十分之三應于其扼要地方設立農政局極力提倡多方獎勵約亦不過五年則規模必有可觀而內治之方亦無難推行一致矣

議四

洪南北通籌

方今謀國之道首重國防國防者對外而言也視敵之所
在與我之所急不得不謀自固之道于是籌邊之道生焉
國家宅都燕薊逼近邊牆恃內外蒙古爲我藩衛形勢所
在本所必爭今者俄人全力東注極意經營西伯利亞鐵
道縱貫東西軍鎮相望伺隙南牧日本懼俄之逼投袂而
起交關于我境內頃以驟勝之威恐未必以東三省主權
完全歸我而松花江以北俄人又未必甘心棄置束甲歸
巢具此兩端則東北兩邊局勢俱急假有蹉跌爲禍之烈
非特疆場之間一彼一此已也然則對於東三省言則東

面爲急而東部內蒙古適爲之障對於西伯利亞言則北面爲急而外蒙古土謝圖一部又最當其衝然則國防之所在其形勢蓋可知也特是以局勢言則外蒙古之防維尚急于內蒙古以步驟言則必先經營內蒙古以爲根本乃能推及于外蒙古而其扼要所在則非易遊牧爲耕種國家不能守其土地有其人民其設施之方則以民墾樹之基以兵屯補其缺內蒙之地專用民墾外蒙之地參用兵屯而後畫井分疆設兵置戍乃有措手之地而國力始不虞不給茲將先後緩急之序臚其大略如左

一疆理之區域

內外蒙古區域遼闊東起東三省西抵伊犁南起邊
牆北抵俄羅斯境周回凡數萬里皆分旗置翼設札
薩克統馭之地其幅員幾埒于腹地十八行省具若
大土壤而草昧經綸似幾無著手之處不知疆宇雖
廣而因天然形勢區分界別則人事之條理因之而
因革緩急之道見焉此疆理之法當爲首務

漠南諸部爲內蒙古六盟及察哈爾蒙古西土默特
蒙古阿拉善厄魯特蒙古分布于直隸山西陝西甘

肅邊外北界外蒙古宜姑分爲東西兩省以直隸邊外承德朝陽兩府共六州縣及口北三廳爲東省從三廳西界畫一直綫北抵外蒙古凡東四盟蒙古察哈爾左半皆隸焉是爲東省直綫以西以山西陝西甘肅邊外諸部凡察哈爾都統所轄之察哈爾右半綏遠城將軍所轄之土默特蒙古西二盟蒙古新設口外各廳甯夏將軍所轄之阿拉善厄魯特蒙古皆屬焉是爲西省

漠北諸部東起車臣部西抵札薩克圖部北極唐努

烏梁海宜暫區為東西北三省車臣土謝圖兩部為
東省賽音諾顏札薩克圖兩部為西省科布多唐努
烏梁海為北省

漠南東西兩省凡已墾闢之地盡設州縣一如內地
其未墾闢之地設農政司仿照日本北海道之拓殖
使辦法漠北三省設屯墾司參用日本第七師團
海屯田辦法

一經營之次序

漠南北各部雖擬畫分五省然幅員周數萬里草昧

經營勢難同時並舉自須分別衝僻緩急以定後先
次序盈科後進步驟井然則國力乃無坐困之虞而
措施始有順應之勢

以地勢論則內蒙古之圖維自應先于外蒙古以人
事論則墾闢之布置自應先于練兵

內蒙古之中扼要在東部外蒙古之中孔道在土謝
圖而內蒙古西部又爲土謝圖之孔道則擬設之漠
南東西兩省自應同時並舉以赴事機

漠南諸部蒙古見在業經開墾者已及十之七蓋東

四盟壤境除西北錫林郭勒一盟外其餘三盟幾已全數放墾西二盟已墾鄂爾多斯全盟而察哈爾蒙古西土默特蒙古阿拉善厄魯特蒙古亦均已全數放墾其未墾者不過東之錫林郭勒一盟五部烏昭達一盟之巴林札魯特阿魯科爾沁三部西之烏蘭察布一盟五部而已風氣已開推行甚易誠使國家獎勵有法提倡得人不出五年漠南諸部凡可耕之地可全數放墾土地既闢人民自聚則理財練兵俱有所藉手可舉以郡縣之法治之其滂渤橫溢可計

日以待而漠北之經營亦卽此爲基礎矣

漠南擬設兩省開辦之始非有財力之憑藉必不能
有爲應皆以鹽業爲立定腳跟之地東部藉烏珠穆
沁鹽池之專賣而銀行卽附于鹽業之中斯魄力愈
厚于是礦業工廠之利亦因以孳生則東部之財政
固有資藉西部應藉花馬池鹽新地之銷場爲入手
地步將新開蒙地之銷售場與河東道舊引地畫分
界限河東舊引地仍聽商銷蒙地新銷場概歸官賣
益以土默特之土藥地畝稅

土默特土藥
出產甚旺

察哈爾大

道之商賈徵收稅則以西部之財濟西部之用而建
立省分固自有餘不至如新疆之仰協濟于東南諸
省始能成立若是則漠南之設立兩省苟善自經營
固不憂無米爲炊致虞顛蹶矣

東部大吏宜駐赤峯東控奉吉北監放墾兼行鹽運
西部大吏宜駐色爾貝山之右錫喇木倫河之陽值
喀爾喀右翼旗之東迤南四子部落迤西以扼赴庫
倫大道左馭察哈爾右半右俯郭爾多斯內抱西土
默特外控烏蘭察布全盟四部且爲將來張庫鐵道

所必經特去阿拉善旗較遠可仿照江蘇徐海道安徽皖北道例設要缺道員以資控制

照以上各節漠南之經營布置地基早立塗徑可循改絃更張尚不至無策若地處極邊而荒寒未闢令人智勇俱困者其漠北各部乎漠北各部以土謝圖最居重要地步實爲全國北門鎖鑰則經營布置自當從土謝圖部始

土謝圖一部向爲漠北會宗之地北匈奴單于庭在其境內而色楞格河左近爲唐回紇建牙之所元和

林故都亦即在今色楞格河南蓋有元之嶺北行省

一大都會今庫倫值元和林南北去和林約七百里上下羣山之

中開一大平原河流縈帶地脈溫和北去恰克圖凡

十二站而哲布尊丹巴呼土克圖駐焉其站道直走

漠南察哈爾人張家口然則經營漠北各部次第自

以土謝圖部稱首土謝圖部內自以從汗山而北一

太平原稱首庫倫南枕汗山北麓

汗山以北太平原地水道交縈土稱上腴最利興墾

誠使布置有方獎勵有法耕者得利勢必爭趨則溢

而東可推至車臣部界擴而西可推入賽音諾顏界折而北可入唐努烏梁海界不拔之基此爲先務而設官置吏理財練兵乃可著手

一屯墾之方法

兵屯民墾各有所宜漠南諸部自宜民墾漠北諸部兼用兵屯自是一定不易之法

漠南諸部凡附近邊牆六七百里以內與東接奉吉三四百里以內應全用民墾辦法以歸一律惟漠北諸部寸土未闢而距口太遠卽在關外居民恐亦難

有此力量隻身前往自應以兵屯關其先兵屯既興
人煙日聚草萊之地已成隴畝則附近諸處民墾爭
趨乃畫出段落使兵屯民墾兩不淆雜除留備兵屯
以外任蒙古人自行租與漢民或竟典賣或蒙地漢
力孰地均分各自管業俱任其便再由官爲多方提
倡風氣既開蒙漢皆有利可圖且知

國家宗旨所在則十年之間必有成效可觀矣

土謝圖一部最居重要自應以全力經營屯墾並舉
而東西各部苟事機順應亦應因利乘便任其墾佃

竊攷雍正三年土謝圖汗札勒多爾濟等經理額爾德尼昭等處屯田因乏相宜穀種遣人購之俄羅斯國得

旨嘉獎又攷雍正年間北路大兵由科布多移駐烏里雅蘇台屯田積穀垂三十年此可爲漠北屯田有效之證又近年新疆客民于阿爾泰山墾種庫倫蒙民于庫倫後山墾種收穫頗豐此可爲漠北民墾有效之證矧加以

國家之獎勵俄人西伯利亞墾佃之榜樣而我國內

地原患人滿以耕求食之民祇得有地可耕不遠萬里推輓而至則漠北諸部不難革氈廬轉徙之俗爲阡陌交錯之鄉矣

庫倫向駐班兵更番值戍請變通成法易班戍爲屯兵每年挑壯兵五百名竝其家屬一竝資遣抵戍以後分爲五屯

每百人一屯每屯相去百里每人給田百畝

以十年爲期可

區分五十屯其延長及五千里每一兵屯四圍任民墾佃其法蓋以兵屯爲中心點以民墾爲旁暈每歲附益暈而愈大期以十年每一兵屯將成都邑則屯

與屯之距離遂歷久愈短終至相連則五千里之疆
圻鳴吠相聞胥成樂土具此基礎愈推愈廣年復一
年而萬里長邊可同內地衽席過師無以易此

照此以上辦法兵民雜處蒙漢相依則蒙亦知耕民
知尚武將無論爲兵爲民爲蒙爲漢胥融洽渾化則
兵區之法可行徵兵之令可布豈惟土闢自致兵疆
屯墾之效乃以大著

一 交通之圖謀

我國疆宇之大遠出東西諸國之上而西北一邊錯

入俄境尤爲遼闊不有鐵路則于邊防商業墾務礦
產舉極艱阻費十分之力收得半之效已屬過望欲
便交通須籌鐵路以見在

國家物力而倡議北徼鐵路不待智者已嗤其妄夫
何待言然頃者京張鐵路已定議開辦自必須接續
出關至小通至庫倫方能收束且方能抵制俄人絕
其覬覦竊以爲西北鐵路費重道長固極艱巨然苟
有經畫之方亦自可漸推漸進其法在以鐵路之利
築未修之路是爲滾進法見在京張鐵路之資本卽

津榆鐵路之餘利是已著有成法竊查張家口至庫

倫並達恰克圖乃華商俄商通入通道以運行商貨

較津榆爲多

東三省出入貨物運由營口輪船者多
運由津榆鐵路者少西北無水運可通

故勝于
津榆

而自天津由張家口出庫倫入俄境亦較由

營口經哈爾濱入俄境路亦較短則運費必較輕誠

使由京張鐵路接續出邊不患不奪俄築東方鐵路

之利權而收厚利且築成一段卽收有一段之利是

以滾進法陸續接修固有確實把握特勢緩期曠非

別籌資本相與兼行並進難收捷效則惟以蒙古之

財修蒙古之路一法參伍互用以期于成

以蒙古之財產蒙古之路之法奈何查東西各國鐵路修建之始無不官私合力以收眾擎易舉之效而限定年分歸路國家或由國家屆時購回或官私分管辦法不一而以全國之力辦全國之路則同其中股本則以貴族爲多今統計內外蒙古各部共一百九十九旗王公世爵不下四百餘家其中饒有資財者約有全數之半誠使

國家就中擇最殷富而曉事理者數人派充西北鐵

路會辦以

錫之寵且堅其信令其專集內外蒙王公股本且此段鐵路已有京張鐵路以爲根本又係商業通道將來收得厚利亦眾所共覩本非鑿空自非不足取信則以漸而入前者得利後者爭趨取信日堅則自各旗台吉塔布囊以下殷實之蒙戶與久居蒙地有大營業或爲大地主之漢民皆相觀入股公私合辦得有贏餘照股均分按年支拆其應得之利願否仍入接修鐵路股本各聽其便與滾進法相輔而行以官

私合本之路並力經營則數千里長途可刻期進築矣

從京張鐵路接造至庫倫而比直達恰克圖是爲幹路告成以後乃計畫支路支路須分南北兩道北道由庫倫接造而西入賽音諾顏部達烏里雅蘇台再分兩支從烏里雅蘇台折而西北入唐努烏梁海爲一支從烏里雅蘇台西接至科布多折經塔城抵伊犁爲一支南道由察哈爾西北繞賀蘭山東南折入邊牆抵涼州出肅州經哈密抵迪化再西過庫爾哈

喇烏蘇廳會于伊犁則西北之氣大通雄藩重鎮星
羅棋布而東西貨物轉輸灌溉且收百倍之利
國家歲入數亦相埒更何患土地之不闢征調之不
靈支路之支路不能苟通四達哉

籌蒙芻議下

丹徒姚錫光

呈覆經畫東四盟蒙古條議

光緒三十二年丙午六月上練兵處王大臣

竊錫光

前于三月十九日隨同

肅親王自京起程迄五

月二十一日回京時歷三月經行之地除古北口外熱河之南山海關外新民府之西以外餘皆東部內蒙古地面凡歷哲里木卓索圖烏昭達錫林郭勒四盟之地錫光所

經行者爲喀喇沁翁牛特巴林烏珠穆沁浩齊特等旗及科爾沁左右翼兩中旗其派員前往查攷者爲東土默特

敖漢奈曼克什克騰喀爾喀左翼等旗及科爾沁之右翼
前後旗左翼前後旗其以地偏西北去東道差遠爲經行
所未至且查攷所未及者僅錫林郭勒盟內之蘇尼特阿
巴噶阿巴哈納爾三部計方域所至南抵邊牆北盡內蒙
古邊境東至東三省西境西歷察哈爾及阿巴噶阿巴哈
納爾兩部東境周回及五千餘里茲由錫光經行所體察
竝委員攷查所報告分東部內蒙古地面以潢河下游卽西遼河
爲界綫區作南北兩大界畫潢河以南爲已墾之地潢河
以北悉未墾之地已墾之地利在升科而其要當從吏治

入手未墾之地急在實邊而其要當從開放入手而墾務
釐政實爲理財從入之方近效遠圖皆基于此茲分已墾
未墾兩大界爲經以墾務釐政爲緯謹分條臚列如下
一潢河以南已墾地方州縣蒙旗情形

潢河以南南抵邊牆除熱河之承德一府豐甯灤平兩
縣及口北三廳以外爲卓索圖盟五旗烏昭達盟南五
旗之地其旗分則喀喇沁中旗及左右翼兩旗土默特
左右翼兩旗以上五旗屬卓索圖盟翁牛特左右翼兩旗敖漢旗
奈曼旗喀爾喀左翼旗以上爲烏昭達盟之南五旗凡十旗爲已墾

之地中惟十默特左翼旗及敖漢奈曼二旗內尚多未墾之地皆隸于熱河都統久

經設置州縣

熱河都統轄境凡一道兩府承德朝陽除承德府專治及豐

甯灤平兩縣以外凡平泉一州建昌建平新設兩縣上三州縣

仍屬承德朝陽阜新新設兩縣此兩縣皆屬朝陽府共五州縣皆設于蒙

旗境內以理蒙漢民戶事務此五州縣皆以理事同知通判兼管故蒙漢民戶皆

受統平泉州設于喀喇沁右翼及中旗境建昌縣設于

喀喇沁左翼境建平縣設于喀喇沁右翼東北隅及敖

漢旗境朝陽縣設于土默特左翼境阜新縣設于土默

特右翼及奈曼喀爾喀左翼等旗境漢民則無論土著
行商蒙人則無論官員箭戶皆受地方官轄治

以上蒙境租放墾闢歷百餘年設官分治垂四五十年
其成熟之地理應按則升科以濟地方治理經費乃

國家竝無絲粟之徵求而民戶實受敲剝之痛苦蓋州
縣所苛斂于平民者既數倍于應納之正供而王府所
勒派于蒙人者更甚于官吏之于民戶此應嚴爲限制
若使于官衙王府誅求以外再定官租俾納正課是則
無異重徵則民力有所不堪恐無以濟

國家之用茲先將州縣之例規王府之勒派撮舉大概如下

州縣之例規

熱河境內例規之弊各州縣不必盡同然所稱平

平泉

朝朝陽建建昌赤赤峯四大缺其非法誅求亦大略相仿茲

類舉其名目如下

每年有常數之各鄉例規

各州縣每一中鄉後皆以中鄉例規計每年春秋

大鄉則加小鄉則減

兩卯每卯卯規津錢後皆以津錢計算九十千文鄉約應卯赴城

率支旅費三十千文
上下亦向鄉戶攤算每卯房規十千文鄉約充當

年初卜卯費十千文年終退卯費三十千文攤派

秋審費二十八千五百文兵米車差費二十三千

五百文罪囚過境遞解費土稱紅差一百千文歲科試

費歲攤十九千文
攷試雖停費仍如故後同攤修攷棚費十七

千六百文續攤攷棚費九千二百五十文再增攤

攷棚費十二千三百二十文送諭帖告示零星等

差費一百千文以上皆有常數之各鄉例規每年

每一中鄉在津錢四五百千文上下大鄉倍之至

一千餘千文小鄉遞減州縣分鄉愈多歛費愈重
每一州縣約分四五十鄉至五六十鄉不等全境
每年例規視分鄉若干及大鄉多寡自四五萬千
文至五六萬千文不等

每年無常數之各鄉例規竝雜項例規

州縣下鄉凡驗命案每起公館等費四五百千文
不等凡驗盜案每起公館等費一二百千文不等
每一州縣攤派兵米約二千石上下每石須賠貼
二十千文上下

此款專由商人
賠貼不以鄉論

近城攤交號草有

號草規費

此款亦不以鄉論

每年當規約四五千文不

等由當行總交此外若遇特別大差或派夫或派

錢則臨時從各鄉攤派

每年有常數之燒鍋例規

每一燒鍋每年春季卯規五十八千五百文秋季

卯規一十八千七百五十文每次雙壽規三十千

文

每年有至做壽七次者

門房隨封十五千文正捐羨餘九

百四十餘千文

燒鍋正捐每勛津錢三十二文每年認釀酒八萬斤名曰一牌合津

錢二千五百六十千文是爲正捐州縣令其每錢三千文繳銀一兩折成銀數八百五十四兩再令

其每銀一兩伸繳津錢四千一百文照見今赤峯
銀價每兩正捐一兩可得羨餘錢一千一百餘文則
正捐一牌八百五十四兩可
得羨餘錢九百四十餘千文

州判縣丞典史巡檢

等衙門每署每卯八千五百文都統衙門科房每

年規費銀二十兩作錢八十二千文州縣房書規

費每卯十千文春秋季查酒池戶房規費十一千

文又需用四千文又結費四千文又領票費八千

文每卯送諭帖差費二千文以上皆有常數之燒

鍋例規每年每一燒鍋除正捐以外須納例規在

津錢一千四五百千文上下每一州縣境約有燒

鍋四五十家不等率斂費至六七萬千文不等
每年無常數之燒鍋例規

每一燒鍋新官到任規三十千文門房隨封十五
千文新開燒鍋領照費自一百餘千文起至銀三
百兩或四五百兩不等以上皆在常年例規以外
以上各項例規尚屬有名之款每一州縣每年
約收十萬千文至十二三萬千文不等除由商
繳各規外其餘率以鄉派由書差責令鄉約牌
頭包繳而鄉約牌頭則任意斂諸花戶又倍于

繳官之數故人率謂口外每一州縣全境有名
例規直二三十萬緡不等良不誣也其無名例
規則在尋常詞訟尤爲民蠹茲陳其大略如下
尋常詞訟無名之陋規

每堂期收民詞一張需費五六千文不等每一堂
期大州縣收詞約及百張則收費至五六百千文
每月六次堂期周年七十次堂期不足卽此一項
已及四萬千文上下至收詞批准以後則有原被
兩造之抄批費差傳費堂費結費息訟則有利息

費種種名目隨事高下以索價值又十倍數十倍于遞詞費至少周年亦及三四十萬千文而格外之需索因事之敲詐與民間之奔走官衙羈留待質一切費用尚不在此數

以上皆地方官之陋規苛斂漢民其王府之勒派蒙人更甚于州縣茲陳其略如下

二王府之勒派

蒙戶自詞訟以外與州縣無交涉之事州縣所苛斂者專在漢民而蒙戶所受之勒派則在王府王府之

需索蒙人則較州縣之橫斂漢民爲尤酷

有蒙民與漢民之詞訟有蒙民與蒙民之詞訟蒙民與蒙民有互控于王府而翻控于州縣者有互控于州縣而翻控于王府者特自詞訟以外蒙民與州縣無交涉之事而王府之勒派蒙民有每年有常數之勒派有每年無常數之勒派

每年有常數之勒派

蒙古部屬有箭丁有奴才凡班兵更番箭丁任之王府差使奴才任之其不值班兵不充差使者須

出歲費其歲費按戶攤派卽如喀喇沁右翼戶分

三等上戶十千中戶八千下戶六千或四千

以津錢計

後同西土默特差費最輕每戶收東錢八千文

約合銀一

兩其餘各旗以此類推而蒙戶除供王府差費以

外則每蒙戶數家又須貼輪值班兵一家經費此

外則旗主年班赴京之攤派每次自銀五六千兩

起至銀一二萬兩止爲數不等其餘每年例貢三

次之攤派需用牛乳之攤派官倉儲備之攤派喇

嘛津貼之攤派名目種種不一由管旗章京分派

各佐領各佐領分派各蒙戶以上諸費皆繳納王府其一切應徵召供使令諸役則皆自行齎糧以從事官無俸廉役無工食然此尚爲有名之差費其無名之差費尚不在此數

每年無常數之勒派

蒙部凡王府一切用費無一不派諸蒙戶如府有大喪則治喪之經費府有婚嫁則婚嫁之經費無不隨時攤派以至猝遭大差過境及貴賓來臨與夫本府演劇開筵及采辦食物玩物諸價值

甚至府中訟事

如爭爵爭
差等事

一切訟費無非派諸蒙

戶其法王府責成管旗章京管旗章京責成佐領
佐領勒派各戶其猝不能繳錢者則驅其所牧牛
羊而去以抵見錢若蒙人有訟事互控王府則府
員之私押凌虐顛倒譎張非賄不成尤較地方官
爲甚故蒙人動輒棄產逃亾率以此故

觀以上州縣苛斂王府勒派之弊自非澄清吏治優卹
蒙民不能培蒙漢之元氣俾得留其有餘之力以供
國家之租賦澄清吏治自在慎選廉明之吏俾之司牧

凡一切門丁書差擇其著名爲民害者置諸重典則積風庶幾可戢尤在寬籌津貼不令廉吏有捉襟見肘之慮而後可定爲常法至優卹蒙民尤當爲王府代籌財政以爲先步潢河以南放墾已久理應清丈升科升科以後寬提成數以給王府務使其不匱于用而將其旗下歲定差費及隨時攤派之費永遠革除且練兵之權旣屬

國家則蒙古之班兵自可停截裁判之權悉歸有司則府員之措索自盡捐除如是則蒙民自可騰出有用之

身以圖生計蒙漢俱安皆能寬留其力而

國家之賦稅乃有徵取之地不然州縣之婪入王府之橫攤既已竭澤而漁此外若再加課賦勢不至弱者逃
亾彊者抗令不止此事如治亂絲宜寬以時日徐求條
理此爲潢河以南已墾旗分察視情形以區畫辦法者
也

一潢河以北未墾地方蒙旗情形

潢河以北亦分兩界南爲烏昭達盟之巴林克什克騰
阿嚕科爾沁札嚕特等旗北爲錫林郭勒盟之烏珠穆

沁浩齊特等旗其東則爲哲里木盟之左右翼兩中旗

卽達爾罕土旗
與土謝圖土旗

皆爲未墾之地卽黑龍江將軍程德全

所奏稱索岳爾濟山左近荒蕪寥曠人迹罕見迅宜速
派大員專司墾闢者也查是處蒙旗東北兩面皆扼俄
人內向之衝茲陳其形勢如下

東扼俄人西上之路

俄人于我東三省界內以哈爾濱爲都會正值松花
江嫩江合流之東嫩江合松花江東下經流之南南
由伯都訥渡松花江而西則直入達爾罕王旗

科爾沁左

翼中 旗 徑趨札嚕特阿嚕科爾沁而至巴林或由札嚕

特南折而至奈曼敖漢等旗可出建平平泉而趨熱

河北繞黑龍江省度嫩江而西踰大賚廳洮南府以

直趨土謝圖王旗

科爾沁右翼中旗

再踰達爾罕王旗西北

境入烏珠穆沁浩齊特等旗可循東北大道以趨多

倫諾爾廳或由達爾罕王旗南折入札嚕特則西至

巴林南向熱河與前道同上年日俄之鬩俄人即由

伯都訥渡松花江而南從達爾罕王旗界內軼入遼

西境即以遼源州

即鄭家屯

爲根據地于時日軍以法庫

門爲根據地而我遼源州法庫門之間遂日有戰事
迄今此二百四十里中瘡痍滿目蓋其明證此我利
害所關最爲迫切正宜經營此東北各部蒙旗以固
東道

北扼俄人南牧之路

自西烏珠穆沁東浩齊特之交有通行大道一條西
南經克什克騰而至喇嘛廟卽多倫諾爾直達獨石口及

張家口東北出內蒙古界入喀爾喀車臣汗部而至

呼倫貝爾

俗稱海諾爾

是爲口北商路東大道俄人見擬

從滿州里車站

中俄交界第一車站

接造西伯利亞支路即循

此東大道經車臣汗部西南行入烏珠穆沁浩齊特之交穿克什克騰達喇嘛廟以趨張家口此道業經測量見于各俄圖歷歷可證此項支路若果敷設則橫截我東部內蒙古之腰而近畿長城以北無安枕之日矣上策伐謀我于潢水以北銳意經營以斷其支路南下之道則北徼安而畿甸乃安

見在西遼河

即潢河下游

以北東面最居重要其重要所在

須南扼遼源州

即鄭家屯正值東西兩遼河會流西岸

北扼洮南府

即科爾沁

右翼前旗正值索岳爾濟山之南

此皆地當孔道特遼源州洮南府南

北相距六百餘里聲援不能相接查該府州距離之間

有新河一道

在達爾罕王旗境內上游從潢河分流向東北行下游折而東南併入遼河

新

河之北與吉林之伯都訥城東西相值而適處洮南府

遼源州之中此處宜擇地控扼以通洮南遼源之氣則

東面之藩籬乃固特此東面之後路爲札嚕特阿嚕科

爾沁巴林烏珠穆沁等蒙旗千里空曠人煙寥落若不

亟謀實邊即使洮南府遼源州及新河以北布置得有

規模而後路空虛則前路孤懸萬一有事其勢亦將坐

困則潢河以北實邊之計尤爲先著茲將潢北各旗分
方域人戶畧陳梗概如左以備籌策

各旗方域之廣袤

索岳爾濟山以南而西平原千里成大陸地東西札
嚕特東西縱長百二十五里南北橫闊四百六十里
凡五萬七千五百方里阿嚕科爾沁縱百三十里橫
四百二十里凡五萬四千六百方里巴林左右翼縱
二百五十一里橫二百三十三里凡五萬八千四百
八十三方里克什克騰縱三百三十四里橫三百五

十七里凡十一萬九千二百三十八方里西烏珠穆

沁縱三百六十里橫二百一十里凡七萬五千六百

方里東烏珠穆沁縱百七十六里橫二百一十五里

凡三萬七千八百四十方里東浩齊特縱九十五里

橫三百一十里凡二萬九千四百五十方里西浩齊

特縱七十五里橫三百七十五里凡二萬八千一百

二十五方里達爾罕王旗科爾沁左翼中旗縱百八十里橫

五百里凡九萬方里土謝圖王旗科爾沁右翼中旗縱百三

十五里橫四百五十里凡六萬零七百五十方里計

凡十二旗總凡六十一萬一千五百八十六方里

各旗蒙戶之見數

各旗地闊人稀恆行百里不見一人見除克什克騰

業經放墾闢爲田疇漸成村落外其未經放墾之巴

林左右翼兩旗

同游牧

見僅蒙民二千五百餘戶阿魯

科爾沁一旗見僅蒙民二千餘戶東西札嚕特兩旗

同游牧

見僅蒙民二千餘戶西烏珠穆沁一旗見僅蒙

民二千三百餘戶東烏珠穆沁一旗見僅蒙民一千

餘戶東浩齊特一旗見僅蒙民七百餘戶西浩齊特

一旗見僅蒙民六百餘戶科爾沁左翼中旗達爾罕王旗

見僅蒙民五千餘戶科爾沁右翼中旗土謝圖王旗見僅

蒙民四千餘戶計共未墾之十一旗總凡見有二萬

零一百餘戶

蒙部方域人戶之比較

潢河以北索岳爾濟山以南而西各蒙部方域除克

什克騰一旗業經放墾不計外其巴林烏珠穆沁等

部凡十一旗共有面積四十九萬一千三百四十八

方里凡有蒙民二萬零一百餘戶兩相比較約在二

十四方里有奇方占有蒙民一戶無怪日行百里不見居人若恃此二萬零一百餘戶不農不工不商不兵之蒙民以守此泱泱周回五千餘里之疆土恐爲事理所必無疆鄰逼處深入堂奧眈眈然環我東北隅內蒙古周遭虎視此東北隅內蒙古向爲腹內安樂之鄉今成邊垂重要之地萬有不虞敵之乘我如入無人之境戶闔之憂莫此爲甚蒙人生計以駝馬牛羊爲四大宗各部銜接竝無間土理應牧羣相望乃稱富庶頃馳行終日間見羊羣數起牛羣已少于

羊羣馬羣除烏珠穆沁以外已不多見若駝羣尤爲罕觀周行三月僅見小羣數起且馬駝殊極疲瘦較以芻秣喂養者不逮遠甚引重致遠率賴牛車而載重不及內地大車六分之一不獨窮邊無禦侮之方抑且臨事無徵發之備苟非亟思變計急謀實邊則患氣之本恐將乘虛而入茲略陳辦法如左

東北內蒙實邊之計畫

實邊之策莫善于放墾放墾之計遠過興屯屯則以兵墾則以民兵墾之費如屋宇農具牛種初耕倉糧

一切經費皆須出自官所費不貲民墾則一切經費皆民自備且可薄收墾價以濟急用照見在

國家物力斷無以舉此兵屯繁費則放墾爲救時良法自不待言

查順治七年定例每蒙丁十五名應給牧地二十方里合地一百零八頃則每丁應受地六頃又二十畝今放墾辦法仍應恪循此例每旗凡有蒙丁一名留地六頃又二十畝給作恆產爲耕爲牧悉聽其便其餘地段儘數放領則蒙人生計旣予寬籌而地力所

嬴不虞牽利將千里長邊榛莽之區悉成沃壤無形
之長城莫過于此所有放墾大致計畫謹舉其略如
下

一放墾之區畫

黃河南北兩界以巴林橋爲孔道巴林以北寸土未闢
當務之急自在耕墾則天時土質水源俱關農政攷察
所經請言其略

天時之變易

北徼以外風高寒早人所稔知特稼穡之期尚及四

月故雍乾之時西北用兵外蒙古尚藉屯田以充軍
會矧在內蒙古地方去寒帶尚遠其節氣在巴林一
帶清明亦卽解凍烏珠穆沁北境則穀雨解凍巴林
一帶至白露秋分之交方始見霜至烏珠穆沁北境
則處暑白露之交便卽見霜自解凍以後至見霜以
前皆爲耕種收穫之期巴林一帶凡有耕種之期百
四五十日烏珠穆沁一帶凡有耕種之期百二三十
日此一季正稼之期已綽有餘裕正稼收穫以後尚
可薄種園蔬以收餘利則天時之宜已可概見

北徼以西北風爲常令特芒種以後亦常有西南風
東南風應時而至南風一至卽溽熱如蒸甚雨立至
故東北邊外大雨時行卽在五六月間農田得之如
沃熱湯禾稼怒長故邊地播種雖較遲于內地而收
穫之期則亦不甚相遠蓋由播種至成熟不過六七
十日滋長速力甚大故亦不虞霜早也

邊地早晚氣候較午刻相差遠甚早間視寒暑表最
低時降至四十度高亦間有升至七十八度者晚間
最低時亦降至四十度高則間有升至八十度者平

度恆在五、十度。上下午刻則最高時升至九十二度，低亦不下于六十度。平度恆在八十六度。上下正午與旦夕時，恆相差至四十餘度。太陽高弧熱力極大，空氣皆爲所蒸，故午間甚熱，耕稼成熟之速亦由于此。

土質之腴瘠

巴林橋以北土質約分三種：曰黑土，曰沙土，曰純沙。黑土最腴，是爲上等土；多沙少者，次之，是爲中等沙；多土少者，又次之，是爲下等純沙之地。

並非沙漠

是爲漏

土直不可耕

巴林一部地多黑土殆居七成此爲上腴餘亦中等
阿嚕科爾沁一旗沙土各半地居中等黑土上地僅
及三成下等地質亦居一二札嚕特一部土質腴美
比于巴林西烏珠穆沁一旗東南兩面黑土之腴居
其大半餘亦中等西北較寒中下等差亦相錯雜東
烏珠穆沁一旗勝于西部上中參半約及八成下等
質品祇居其二東西浩齊特兩旗地質差同土少沙
多類多下等苟及中資已稱腴美科爾沁左右翼兩

中旗上壤之區居十之五中等三成下居其二歷覽各旗墳塹所分雖區三品農功所播無不可耕腴瘠較然此其大略

巴林左右翼阿魯科爾沁東西扎魯特科爾沁左右翼兩中旗此七旗凡種大小麥高粱小米等稼皆宜東西烏珠穆沁東西浩齊特四旗則種小米油麥蕎麥等稼爲宜

水源之贏縮

耕種所資尤在灌溉人工收洩以利農工則水源重

焉因地制宜蒙地言耕尤居重要

潢河以南各蒙部水源宜分三大部自克什克騰南
界有山脈綿亙而下連山東趨因勢北轉直至東北
與索岳爾濟山支麓相聯屬此山脈以南爲克什克
騰巴林阿魯科爾沁東西扎魯特等旗爲一大部是
爲南部此山脈以東爲科爾沁左右翼兩中旗爲一
大部是爲東部此山脈以北爲東西烏珠穆沁東西
浩齊特等旗爲一大部是爲北部南部諸水皆南流
入潢河及下游西遼河此宜開濬水道多作堰壩俾

山泉下注及冬雪春融夏潦時漲有所歸宿隨時節
宣以收水利東部諸水則東入嫩江及松花江與遼
河其節宣之法應與南部同惟北部地既高仰山皆
土阜間有沙嶺山澤之氣不通以是絕少源泉而水
皆伏流故掘土及丈每得甘泉水泉不深是宜取法
日本開井汲泉令水上升鑿池其旁引入溝澮則收
水之利不啻山泉蓋東南兩部以開濬水道爲利北
部一隅以開汲井泉爲利此其大端因勢變通以求

完備

天時地質水源皆無不宜則放墾斯可決行而開放之次第招徠之方法蒙古王公官民之優給皆非可鹵莽從事茲陳其略如下

開放之次第

東北蒙部東腴于西南腴于北東以科爾沁左右翼兩中旗爲腴南以巴林阿魯科爾沁東西扎魯特爲腴故開放之序以自東而西自南而北于勢爲順東南兩面開放旣竣而求墾者方麇集不已則推而至西北較瘠之區亦所甘任故放開之始當從東南兩

面入手

東南以鄭家屯

即遼源州

爲根據以放達爾罕王旗

科爾沁左

翼中

之地東北以洮南府爲根據以放土謝圖王旗

科爾沁右翼中旗

之地則造屋材料及籽種農具牛隻之購

買與夫銀錢之兌換食物用物之備置乃有取求之

所以闢此新地若不循序以進則阻礙難成其機必

窒巴林開放其倚赤峯縣也亦然如是則不出二年

而達爾罕王旗土謝圖王旗巴林左右翼

同游牧

凡四

旗可以全數開闢迨村市麤有規模乃從達爾罕王

旗以西上扎嚕特從巴林以東下阿嚕科爾沁則不出一年亦必全數放墾則成熟之地成折矩形已包圍于東西烏珠穆沁之外再從達爾罕王旗阿嚕科爾沁巴林分途入烏珠穆沁以西上浩齊特則共不出五年南抵黃河北至車臣汗部東迄東三省邊境西盡克什克騰浩齊特西隅可邑聚相望鳴吠相聞內力既充外憂自泯已

招徠之方法

新地墾闢以資本家爲重而勞力家次之美洲及澳

州開闢之速立臻富庶其源蓋出于此我長城以外
墾闢業垂百年而地方繁盛之機滋長甚緩蓋勞力
者多率山東無業流民侵灌而入有如滿地散錢無
從提挈根柢不堅華實曷茂茲擬仿美州大農辦法
派員赴長江一帶及廣東竝南洋各島招有資本之
家集合公司則開茲新土期以巨萬見金吸入東蒙
則不數年間蕪穢之區將成都會實力既充以禦外
侮乃有憑藉

查熱河都統所訂放荒辦法每人領地不准有踰三

頃以爲限制如是則所招皆勞力者輩資本之家斷不闖入此于地方發達實生無窮阻力又查奉天新設洮南一府市廛繁盛而府治以外彌望荒蕪蓋皆東三省流民聞風而至而資本家轉裹足不前洮南墾務之艱阻正坐此病新地放墾正宜別開生面以賜新機

蒙古扎薩克官民之優給

蒙地開放自以優給蒙人爲首務特開放之始有酌提荒價之優給升科以後有畫分租銀之優給宜分

兩截辦理其辦法亦迥不相同

蒙古土地有扎薩克管領之官地

官地必授襲爵之扎薩克

有扎

薩克管業之私地

私地可以分眾子

有本旗共有之公地有

蒙員領受之官地

有同世業管領者有隨官缺轉移者

有蒙丁領受之

牧地領地之人既不相同則荒價優給自應分別給

予

應行提給之荒價扎薩克所有官地私地自應以給

扎薩克本旗共有之公地自應以給該旗以存備該

旗公益之用蒙員世業之領地自應以給該員蒙員

隨缺之領地則應半給見職人員半歸該旗公款蒙

丁管理之領地自應以給蒙丁

如該蒙丁所有之地仍以給該丁則荒價

自無庸給予

隨其人之所有而給以應提之荒價則事理

乃得其平而無所偏頗至升科以後給以應分之租價則不拘此例

蒙丁既恪循順治七年定例每丁給地六頃又二十

畝則所給已優自可任其自食耕牧之地升科以後自無庸再有給予其租銀酌提成數可以專給扎薩

克蒙員以作公費俸薪

王公世爵與扎薩克原兩截事王公原有定俸而
扎薩克乃真正旗主其所領旗分原隸于所襲之
扎薩克並非隸于其所襲之王公故給分租銀祇
可謂以給扎薩克不可謂以給王府公府則名目
始正且分給租銀原係從實言之而普天之下莫
非王土升科之租銀以官家而下輸蒙旗旗主于
名亦爲不順當爲該扎薩克所不敢受故祇可謂
爲給扎薩克之公費賞蒙員之俸薪不可謂分給
地租如是則

限制無論旗分大小凡扎薩克公費至多不過銀三萬兩協理台吉俸薪其單缺者不過銀二千兩雙缺者不過銀一千兩其餘以此類推而大小蒙員應得俸薪卽經由該管衙門支發無庸移交扎薩克轉發以上各條皆放墾要務乃專指潢河以北索岳爾濟山以南而西東部各蒙旗而言惟潢河以南卽西遼河以南直抵邊牆雖已全數放墾設立州縣而熱河之敖漢奈曼東土默特喀爾喀左翼四旗及小庫倫一喇嘛旗與奉天之科爾沁左翼前旗冰圖王旗左翼後旗見稱伯王旗凡六旗未

墾之地尚居大半

土默特左翼旗未墾地祇三分之一

應由將軍都統迅

籌開放不令奉熱之間有甌脫地留此罅隙再擇明幹

疆武之員聯絡鎮守則奉省西疆即熱河東道亦即畿

輔北門設險守國之道以人為形勝之方其在斯乎其

在斯乎

一蒙鹽之措置

蒙部經營自應從財政入手蒙鹽色味俱佳實為天然

美富向不隸于鹽政非鹽運司所管轄亦非商人引地

所在自可仿各國見行鹽政之例收為國家專賣品以

植財政之基茲將池產銷場釐稅三大宗臚陳如左而辦法卽在其中鹽業旣成而銀行卽因以成立操蒙部之財權卽握治蒙之要領命脈所在似所必爭

鹽池出產之衰旺

鹽池在烏珠穆沁右翼之西北浩齊特左翼之東北地名哈那希拉池名達爾遜諾爾作長圓形以步弓丈量計周三十五里有似大頭魚形首西北而尾東南西北一隅池面較寬水亦甚深而出鹽皆在東南東南水淺淤灘甚多泥色深黑轉從淺處結成鹽粒

其淤灘凸處又皆結成片鹽蓋該池夾在高阜之間
鹵質甚旺其中必有鹵泉而四圍淡泉亦隨處皆有
均流入池內全憑日光熱力曬結成鹽故淺處出鹽
最旺實與淮北鹽灘曬鹽無異特以鹹泉所匯鹽灘
出自天然無庸人力若遇霖潦盛大之年水氣過多
日力不能穿透則出鹽較少每年出鹽時期自清明
起至霜降上約八閱月而以秋初結塊最厚蓋是時
日光最烈也

蒙人撈鹽有二十餘戶倚爲專業每于鹽車到時由

撈戶引入池灘撈鹽者著皮袴以木斗入池中淘之
鹽粒滿斗卽裝入車內今日撈出鹽若干車明日結
成如故如終歲不撈亦不見溢

蒙人撈鹽隨撈隨裝必待鹽車來池始往撈取此非
善法若歸官專賣應就池建多數鹽倉鹽車到池就
倉兌運撈鹽者不論有無鹽車到池日須撈鹽若干
石收入倉內蓋旣結成鹽一日不經撈出反阻日光
射入之路卽一日不能續結鹽粒其不撈不溢之故
實由于此故應就池建倉收鹽令鹽戶每日撈出結

成之鹽以開日光下射之路熱力所蒸則續結之鹽
日出不窮愈撈愈結隨結隨撈則出產可增數倍苟
銷路能日推廣而池產不虞匱竭矣

該池由西烏珠穆沁東浩齊特兩旗主各派蒙員駐
池管理除該兩旗蒙民赴池運鹽不繳官費外其他
旗蒙民或漢民赴池運鹽者每車須交官費銀三錢

此銀係繳旗主每車一聯

約十車爲一聯蓋一人執鞭所管也

須納車

軸一根折作價銀一錢此銀係管池蒙員所得又每
車須納布四尺此布係撈鹽戶所得

錫光

到池查察

面詢該委員等每年運出之鹽若干車旗主收銀若干兩該委員等諱莫如深不能得其確數嗣從沿途探知該委員等歲收車軸銀至二千兩以車每聯十車繳銀一元計之則運出之鹽歲至二萬聯凡二十萬車以每車八石百斤爲一石計之當得一百萬石是爲見在從池運出鹽數

銷路幅員之廣狹

鹽產之銷路卽內地鹽法之所謂引岸也銷路不清則產出之鹽殆成棄物茲先臚舉蒙鹽從來之銷路

以徵固育之大利

西南之銷場

蒙鹽西南銷路係從東浩齊特東北隅引而西南
循商行東大道出克什克騰抵喇嘛廟從內地包
釐商民收運分銷口北三廳竝入張家口銷宣化
一府土境其販路且灌入熱河西境而蒙人鹽車
所至則以喇嘛廟即多倫諾爾廳爲總匯以鹽易布而歸

東南之銷場

從鹽池東南出經棚土城子石巴爾台皆在烏珠

穆沁及巴林境過巴林橋抵烏丹城

屬赤峯縣

入市場

否則再南抵赤峯縣由販戶分運至平泉建昌建平朝陽及熱河等處銷售蒙人鹽車所至則以赤峯爲總匯以鹽易小米而歸其交易則約以小米三平斗易鹽二尖斗而販戶運入南路其售價則鹽每斤約在津錢一百文至一百三四十文不等

東路之銷場

由鹽池出東西烏珠穆沁南經達爾罕王旗北穿土謝圖王旗分抵八家子鄭家屯

即遼源州

洮南府等

處經蒙漢販戶接售分銷科爾沁郭爾羅斯杜爾伯特等蒙旗及東三省西路銷地甚大銷數亦多以上銷路爲向來蒙鹽所運售

錫光

上年五月出關

見古北口喜峯口冷口等口外如熱河及灣平建昌平泉朝陽等州縣尚全倉蒙鹽竝無他鹽灌入今年三月出古北口歷經附邊各州縣則熱河及建昌平泉等州縣海鹽已滔滔灌入直占銷路六成而朝陽境內竟全銷海鹽蒙鹽已絕迹不至似此海鹽漲力之速一二年間蒙鹽東南路銷場將全奪于海鹽而

莫能禦制

本年五月東往科爾沁調查知八家子鄭家屯洮南府向爲蒙鹽銷場總匯見已全數奪于海鹽凡哲里木盟各蒙旗及東三省西界殆已無顆粒蒙鹽入境北路至車臣汗部南界向由蒙人自運自倉竝無市場而其運路則西抵庫倫皆爲蒙鹽所至特不能知其運銷確數

西南銷路則向由口北三廳且運入察哈爾左右翼八旗東境而見在亦爲花馬池鹽所侵灌則蒙鹽銷

售範圍勢將日蹙

官收釐稅之成數

蒙鹽南運向祇由察哈爾都統收納鹽稅數亦甚寡

嗣于光緒二十九年三十年間商人包售口北三廳

及宣化一府全境所食蒙鹽于是北洋始收蒙鹽鹽

釐與察哈爾都統衙門應收鹽稅一併由商人包繳

熱河自都統錫良設求治局定四項稅辦法土藥及煤

鹽燒鍋口四項稅 于是始有鹽捐此蒙鹽稅釐捐三宗所自

始見在稅釐捐三項北洋收釐最巨察哈爾鹽稅次

之熱河鹽捐又次之自光緒三十年間商人包銷口北三廳及宣化全府所食之蒙鹽包繳北洋鹽釐銀五萬兩察哈爾都統衙門鹽稅銀二萬兩共七萬兩今年換高接充包繳鹽釐銀八萬兩鹽稅銀三萬兩共十一萬兩鹽釐繳直隸鹽運司衙門鹽稅繳察哈爾都統衙門

熱河鹽捐每斤抽制錢五文以赤峯爲總匯卽由赤峯縣抽收解交求治局而販戶販運南來所至地方各州縣仍須抽收五文亦解求治局實不啻重徵然

地既散漫且假手州縣百弊所叢錫光本年行抵熱

河面詢都統鹽捐收數據謂每年祇萬餘金收數之

微實以熱河爲最

綜觀以上池產銷路稅釐三項則蒙鹽專賣乃有辦法

鹽業之利在銷場不在鹽池切須照原有銷場如內地

鹽法之引岸畫清界限不令海鹽侵灌而北花馬池鹽

侵灌而東是爲第一要義至烏珠穆沁浩齊特兩旗上

而旗主下而蒙民向收鹽池之利自應從優貼補以慰

其心旗主向取販戶每車鹽費三錢須詢明該兩旗從

來歲收若干銀兩不妨如數豫行賞給

前一年冬卽將
下一年應給銀

兩豫行
給予

則較其派員零星自收爲勝該旗主自無不願

之理若該兩旗蒙民向有販賣之利然須行千數百里
以易小米大布利亦甚微茲以運價之利加數償還凡
起運所用車牛儘數從該兩旗蒙戶價僱務令其所得
之價較其自販之利所差不遠則蒙戶當必樂從竝先
行以蒙文出示曉諭且豫從鹽池先給以運價之半尤
不妨變通卽給以小米大布從廉作價以抵運費則蒙
人上下之心胥安斯事乃輕而易舉已其直隸歲入之

鹽釐察哈爾歲入之鹽稅熱河歲入之鹽捐共銀十二萬兩亦應加數解還則四面兼權專賣一節殆必無窒礙難行之處鹽業既立則銀行之成立自在其中鹽銀兩業相輔而行斯財政操縱之權全局咸歸條理

再圓法之弊見錢見銀之缺殆無踰蒙古地方口北通行錢四種曰二混曰三路曰鵝眼曰魚眼四種皆屬私錢特二分三路尚略具錢形而鵝眼魚眼則投水不沈脆薄如紙蒙人有終身未見制錢者有終身未見寶銀者卽此四種私錢且不能多得民間所用大率村落小

鋪所出錢票名曰給帖互相抵換稍一轉移便須折扣
是以百物騰貴商賈不通不亟爲謀將日俄紙幣勢將
乘虛而入銀以光至鄭家屯即遼源州已見日本銀行之一圓

紙幣一兩銀票通行街市而俄人之羅布票流衍于江
吉各城已西抵洮南府此卽爲內蒙古東路門戶我若
不急爲抵制不數年間恐日俄紙幣通行于內蒙古東
境不可阻遏日本之傾覆朝鮮也大半藉紙幣之力是
事爲禍至烈竝非細故特蒙地遼闊商業零星我尚無
從設立銀行是以擬于鹽業之中卽附以銀行基礎凡

鹽業總店分店支店設立所至不必另籌資本卽以鹽業爲擔保皆就中附櫃出票並兌換見銀銀圓銅角而擇繁盛市面數處設立總店以爲樞紐且爲兌外埠會款以通脈絡此不居銀行之名而操發行紙幣之實以豫爲抵制此等時機稍縱卽逝務期早定成謀勿失事會至此等大小銀行成立以後百脈旣靈而勸業銀行卽厲于其中此于墾務之進步亦大有關係而道路之開通工廠之布置路鑛一切要政之招股集資皆可以銀行爲保任擔承之地財政旣通百務具舉則銀行者

蒙部經營之母也而業鹽者又銀行成立之母也行遠
自邇登高自卑發軔之圖端在鹽業

竊錫光

此次隨同調查以東事最急故率爲國防起見而
以上所陳各節俱從內政言非爲國防言蓋內政實與國
防相爲表裏潢河以南已設州縣之地從吏治著手以期
政成人和之效潢河以北未設州縣之地從開放入手以
收地闢民聚之觀不有人焉有兵墾務者人所萃也不有
財焉有人鹽業者財所歸也能理土地固有之財而後可
以致人善用人民生財之力而後可以守土此東部內蒙

必言內政而後可言國防者也今觀東方局勢異日有事

南而遼河西岸北而松花江嫩江西岸皆為喫重之地則

我國防第一綫南起新民屯

新設新民府

迤東而北至鄭家屯

即遼源州以上皆遼河西岸

再迤西而北至新河北岸

達爾罕王旗境內此值松花江

西岸

再迤東而北至大賚廳

北值嫩江西岸

再迤西而北至洮南府

此值索岳爾濟山南麓

五千餘里此第一綫者西蔽東蒙外臨遼瀋

攻守皆宜最為扼要而非有第二綫以為之援則第一綫

遂有孤露之憂國防第二綫南起朝陽迤東而北至小庫

倫再迤東而北至奈曼東境

今新設阜新縣境以上皆潢河以南

再迤東而

北至扎嚕特東境再迤東而北至土謝圖王旗大廟

以上皆潢

河下游卽西遼河以北

是爲第二綫特非再有後勁之援則第二綫

仍覺單薄而不可恃其後勁之援南則熱河所屬之平泉
建昌建平赤峯諸州縣北則東西扎嚕特阿嚕科爾沁巴
林烏珠穆沁諸蒙旗也故南則澄清吏治以伸民氣卽以
壯遼西之聲援北則亟圖開放以代移民卽以厚松花江
嫩江以西之實力則節節爲防我有棋布星羅之勢敵無
乘瑕蹈隙之能一旦有事則潢南可循平朝建赤諸邑潢
北可從巴林阿嚕科爾沁烏珠穆沁諸部分道建瓴東下

飛輓有資芻秣有備番休更代士氣常新組練徵呼後援不匱西至浩齊特克什克騰等部落咸有警備以塞東大道南下之衝而後國防可言根本可固所以經營東部卽以爲瞰視全遼拱衛畿疆之本也見在渡巴林橋而北壤地東西千數百里未設一官以資統攝似亟宜如黑龍江將軍程德全所請

派駐大員督辦放墾鹽業諸事並管理外交無任外人任意出入如人無人之境事有專司而後諸務可舉至于要塞之防維兵區之布置別有規畫再容續陳所有隨同調

查東部蒙古情形謹舉大端上呈臺鑒敬乞鈞裁

私售大段重要蒙地情形說帖

光緒三十二年丙午
六月上練兵處王大

臣

一密探得三喇嘛售地情形

三喇嘛者係內蒙古敖漢扎薩克郡王之弟向與馬賊往來且屢梗開放蒙地之議積爲豪棍哲里木盟蒙古各部咸畏之日俄戰事起俄人嗾使招徠馬賊遂日與俄狎適是時黑龍江開放郭爾羅斯前旗蒙地自該旗指出應放地段中有不毛地畝百頃而胸佃民呈請黑省知會該旗換給上地已指定地段撥換矣而三喇嘛

以是時適至該旗遂夥嗾該旗持議抗阻因私將該旗膏腴上地約長四十里寬不及十里袤長之地售與俄羅斯聞得價數十萬羅布

竊查郭爾羅斯前旗蒙地北枕嫩江南拊柳條邊東扼長春伯都訥各城西控東盟蒙古各部爲金黃龍府地實扼奉天吉林黑龍江咽喉故俄羅斯以重價購此四十里延長之地而藏三喇嘛于哈爾濱儘力保護此爲見在蒙地交涉重件應無論如何爲難必須責成該旗自行向俄人贖回此項地段而密濟該

旗力之所不及俟地案了結以後三喇嘛再作另案
懲辦方免棘手

一密探得已革郡王烏泰售地情形

烏泰者前承襲科爾沁右翼前旗之扎薩克多羅扎薩克圖郡王以重案奪爵庚子事變以後乘黑龍江將軍交替之際捏造將軍行知開復印文復營求俄羅斯東方總督主持干豫以圖開復且領俄人槍械爲招蒙兵圖走遼西幸以俄人屢敗無暇兼顧事皆未成而烏泰遂將興安嶺地南要隘重地自立合同售與俄人此項

售出地段尚不能知其寬長界限所至聞地甚長大得價亦屬不貲見正遣其死黨來京坐探消息俟三喇嘛售地一案了結以後所得便宜

聞三喇嘛售地一案俄人已用彊梗手段出頭

理伊卽援照辦理見尚伏而未動

查三喇嘛及烏泰兩人皆東蒙巨蠹此患不除東事將不可問聞上年夏秋之交該兩人宣言達賴喇嘛將至哈爾濱竝向俄人鐵路借用其東方總督坐車俄官已通飭鐵路旅館照親王禮加等接待而我附近各蒙旗各派蒙官及附近各寺喇嘛皆雲集哈爾

濱一時至爲喧動是此兩人務必設法擒治特必俟地案了結俄人脫手不視爲奇貨爾時不過一差役力量便可拘捕見祇宜不動聲色以慰其心

竊惟哲里木一盟爲科爾沁

六旗

郭爾羅斯

二旗

杜爾伯特

二旗

等部共十旗定制隸于奉天將軍而去奉天寫遠實有鞭長莫及之勢見在日俄戰事以後俄人計圖西向蠶食該一盟三部十旗正當其衝乃爲我將軍都統四不管之地莫任其患恐隱憂之切將深入腰腹上年冬間署黑龍江將軍程德全奏請于索岳爾濟山左近專設大臣管轄放

墾以通東西之氣等語卽指此地言之最爲翔實似宜卽于索岳爾濟山之南科爾沁右翼前旗地方姑設副都統衙門別加崇銜以隆體制使之經理放墾兼管交涉以爲實邊地步徐圖理財練兵等事專遏俄人西展之路則吉黑兩省乃有輔車之依而畿輔北門方有重關之固其錫林郭勒一盟卻值索岳爾濟山之西亦去察哈爾都統駐所絕遠向幾視爲棄地似應一併隸屬以期一氣呵成則腰營之間方免空虛患氣不生實爲無疆之益而事尚簡而易行是爲大概辦法謹承垂問所及臚陳崇鑒以備

蒙古教育條議

光緒三十二年丙午八月復學部

查蒙古地方遼闊風氣不同欲興教育自應由近及遠逐漸推廣方有著手之處就直隸山西邊外言之須分爲已開墾旗分未開墾旗分已開墾旗分之中又當分爲二段近邊牆各旗開闢最早蒙漢雜處蒙民習俗已與漢民不甚相遠漢語固無不通而讀漢書識漢字者亦間有其人是爲蒙漢雜居之旗分至離邊牆稍遠各旗蒙漢自成團體各住一區每歲除租穀交涉以外不相往來其中通漢語者尚不乏人而識漢字者已千不得一矣是爲蒙漢不

雜居之旗分以上概指已開墾旗分而言其間雖人戶疏密不同貧富各異如認真勸導集款興學尚易藉手若未開墾旗分東自潢河以北西自十一廳以外廣漠萬里人煙甚稀無論內外蒙古恆行百里不見一人除喇嘛廟宇以外絕無廬舍居則氈幕倉僅羊肉逐水草而居以游牧爲生雖有貴賤之分而無智愚之別上自王公下至箭丁專事誦經不知生產非特無款項可籌抑且無聚落可依照此情形自須分別辦理以取因地制宜之效茲姑言內蒙古已墾旗分如下

一近邊蒙古概略

直隸山西邊牆以外爲察哈爾左右翼八旗蒙古西土

默特左右翼八旗蒙古

此兩部蒙古在內六盟蒙古以外分隸于察哈爾都統歸化城

將軍不置
扎薩克

及內六盟四十九旗蒙古而承德一府

該府有專

轄境土如
直隸州

灤平豐富兩縣及圍場一廳又在各蒙古旗

分以外計其壤境約及內地五六省疆宇

圍場及承德一府專轄境土與灤平豐富兩縣原係

喀喇沁翁牛特察哈爾等蒙部壤地後經分畫而出

專屬流官不屬蒙古

見在直隸邊外已墾旗分爲察哈爾左翼四旗及卓索
圖盟之喀喇沁中左右三旗土默特左右兩旗烏昭達
盟之翁牛特左右兩旗克什克騰奈曼敖漢喀爾喀左
翼各一旗共十五旗皆已分設府廳州縣與扎薩克同
域而治扎薩克專治蒙民府廳州縣專治漢民竝治蒙
民之訟獄

邊外州縣原係以理事同知通判兼管故竝治蒙民
訟獄

口北張家口獨石口多倫諾爾三廳設于察哈爾左

翼四旗境而多倫諾爾廳東境則跨有克什克騰旗
承德府屬之平泉州設于喀喇沁右翼及中旗境建
昌縣設于喀喇沁左翼境建平縣設于喀喇沁右翼
東北隅及敖漢旗境朝陽府屬之朝陽縣設于土默
特左翼境阜新縣設于土默特右翼及奈曼喀爾喀
左翼等旗境共凡三廳一州四縣加以承德府專轄地
圍場廳灤平豐甯兩縣此一府一廳兩縣境不在蒙古境內分隸于熱
河口北兩道而內轄于直隸總督外轄于熱河察哈

爾兩都統

其山西邊外已墾旗分爲西土默特左右翼八旗察哈

爾右翼四旗烏蘭察布盟之烏喇特中前後三旗四子

部茂明安喀爾喀右翼各一旗伊克昭盟

卽河套內之鄂爾多斯全

部七旗

之杭錦達拉特兩旗共十八旗凡分爲十一廳與

扎薩克同域而治以分理蒙民漢民與蒙漢之訟獄

山西邊外原設之西五廳曰歸化廳曰薩拉齊廳曰

托克托城廳曰和林格爾廳曰清水河廳分設于西

土默特左右翼八旗蒙古境內新設之西二廳曰五

原廳設于烏拉特一部杭錦達拉特兩旗境內曰武

川廳設于四子部茂明安喀爾喀右翼三旗境內原設之東二廳曰甯遠廳曰豐鎮廳新設之東二廳曰興和廳曰陶林廳是爲東四廳分設于察哈爾右翼四旗境內是爲十一廳皆隸于歸綏道而內轄于山西巡撫外轄于歸化城將軍而東四廳者又兼受轄于察哈爾都統

直隸山西邊牆以外已墾旗分南北橫闊七八百里東西縱長二千五六百里約及內地兩省面積而有餘至東三省迤西之哲里木一盟爲科爾沁左右翼六旗

各中

前後三旗郭爾羅斯前後兩旗杜爾伯特扎賚特各一旗凡十旗此一盟者東西橫闊五六百里至七八百里不等南北縱長至二千里上下約及內地一省面積而有餘而地極膏腴與東三省相伯仲見經奉天吉林黑龍江次第放墾設置州縣大概東南兩面墾闢者已及八成西北兩面荒蕪者尚居大半是以地等插花有極繁盛之區有至穢僻之域參差錯雜不能齊一此則于直隸邊外山西邊外又別一區域

以上專言漠南內蒙古已墾旗分大概居內蒙全境

十分之七蒙境教育自當于此植立基礎再圖推廣
一教育宗旨

教育宗旨所在視國家利害方向所在以爲轉移此五
洲萬國前古後今興學設教一定不易之公理也蓋視
此等人民受此等教育之後是否爲我用抑反不爲我
用而別自爲用則國家利害分焉而教育宗旨判焉

蒙古部族原世界至彊之部族也我

朝

列聖相承撫綏懷輯柔而育之以有今日北徼之宴安

此蓋得聖人之權然蒙古部落雖分戶口亦寡而其各旗之扎薩克仍隱然有君國子民之資格則今日之興學設教其爲各部扎薩克代教其部民乎抑爲我

國家養成國民同任賦稅同執干戈相與渾化于無迹乎此一至大之問題也論者每以蒙古愚弱爲病夫教育者所以具愚弱爲明疆也試問其明疆以後是否足資其力以限帶我疆宇乎抑轉使我肘腋之下增無量之隱憂乎此又一至大之問題也有此兩大問題利害相形而思慮生焉思慮所積而宗旨在焉

竊謂今日定蒙古教育莫良于蒙漢同化之一法此于國家有利無害于蒙古有利無害于漢民亦有利無害似蒙漢同化之教育定而教育之宗旨卽定

蒙漢同化則互相攜手同爲國民以禦外侮卽使其中有一二梟獍之材蓄非常之志然有兩種人互相牽掣則其氣自消轉足收爲

國家之用是以于

國家有利而無害蒙古之貧弱由于不知自營生計今有蒙漢同化之力則漢民之耕種工藝經商各等生活

之法皆蒙民之所取資試觀喀喇沁等蒙漢雜居諸蒙旗較巴林等未經開放諸蒙旗其蒙民之衣裝飲食居處優裕數倍況受同等之教育則蒙民生業之發達更可想見是以于蒙古有利而無害前者光緒十六七年間熱河境內金丹匪亂之役實由蒙漢積憤而起而互相嫌怨至今未泯宿根不除隨時可以暴發若具同化之力則主客之嫌亦自與之俱化是以于漢民亦有利而無害

上年及今歲春間兩次出邊查攷蒙古見州縣與蒙古

王府各立學堂

蒙古王府亦僅喀喇沁辦有蒙小州縣學堂武備學堂女學堂各一所

學堂中無蒙民蒙古學堂中無漢民既無同化之望而州縣主意專以藉名科斂掩飾耳目爲事然非有心教育其腐敗情形自不待言至蒙古學堂則率以提倡兵操爲主而共授課所引譬暇日所演說則時以恢復成吉思汗之事業牖其三百萬同胞以相鼓舞而我

朝聖武神功闖未一聞則其心蓋可想見若外國教習之別有主意乘隙而來更不足論矣是非設有專官爲之主持一切則學堂愈增而流弊益不可勝言矣

一 籌款計畫

蒙古地方痛苦籌款最難然經營教育勢不得不需經費則籌款自難或緩大概未開墾旗分直無款可籌茲不具論其已開墾旗分則有應從漢民籌集之款有應就蒙旗籌集之款其應從漢民籌集之款則分先經籌定之款與有待續籌之款

先經籌定之款首需清查特其中亦分二項有一次躉捐之款有常年額捐之款一次躉捐之款曰紳富捐曰鄉戶捐紳富捐率以鄉計每一州縣約分數十鄉有大

中小鄉之不同大鄉有認繳捐銀至千餘兩者以次遞

減至小鄉繳捐銀四百兩止

每鄉或照畝派或照戶攤總總不同惟繳官則以鄉

論鄉戶捐則按戶認捐除極貧外則自每戶一兩起至

五兩止

以戶繳不以鄉論

此皆一次躉捐爲早經呈繳在官之

款其常年額捐之款有在市之鋪捐有在鄉之畝捐亦有收取學費令每生每年繳米三石二斗每月繳菜錢六百文者其籌款種種不同要皆爲先經籌定之款此須清查每一州縣見存之款尚有若干用去之款共及若干歲入之款可收若干凡有官吏浮支侵蝕者則應

追繳

如平泉一州前歲蕙捐之款至四萬餘金而僅于州署設小學堂一所學生不及二十人卽以書辦王姓之子管理若此之類似皆應澈底清查以求實際

其有待續籌之款則煙土畝捐與燒鍋捐尚可加抽煙土畝捐係由州縣收繳熱河之求治局

係四項捐內之一項煙土

種植原係害人之物多取之而不爲虐每畝可加抽津錢二百文業戶租戶各任其半燒鍋捐卽係酒捐蒙地銷酒極多加熱河境內凡有大燒鍋至二百餘家小燒

鍋尚不在內西境稱是苟能爲稍減州縣之陋規每家
加收津錢一二百千文亦各燒鍋所至願集此加收之
煙土畝捐與燒鍋捐歲入可成巨款此外之糧倉雜貨
牲畜皮張一切稅捐與木捐車捐斗捐可照常徵以外
酌加一二成專指爲學堂款目與先經籌定各款相輔
而行則經費當不憂不給

以上各項皆係從漢民籌集之款見擬無論蒙漢受同
等之教育則學堂所收學生自應不分蒙漢斯蒙古亦
應一律籌捐以免偏重

蒙古學堂向係其王府隨時酌籌經費原無所謂的款
茲擬概由官辦非有的款可指則教育基礎不固查蒙
古可籌之款約有兩項曰蒙租捐曰倉穀捐蒙租捐者
無論其王府蒙官箭丁凡其已墾之地歲收之租項抽
其租入百分之三如每千文抽三十文或每穀一石抽穀三升每年扣自租
戶令隨畝捐同繳倉穀捐者每一蒙旗有從其部下歲
捐之倉穀每年可抽其捐入三分之一以爲教育經費
著爲永例此在已墾之旗分于蒙古上下尚無大損而
蒙民就學之資有所藉手矣

以上所籌款項以辦學堂皆係官捐官辦之法若謂教育普及則鄉村學堂應由紳民自行經理而官督其成則可將鋪捐畝捐兩項給還民間以爲經費令于鄉村自辦蒙小學堂而官收之加抽煙土畝捐燒鍋捐及加抽之糧倉捐雜貨捐牲畜捐皮張捐木捐車捐斗捐與蒙租捐倉穀捐等項則由官管理以爲官辦中學堂及各種學堂用度竝爲民間自辦學堂之補助金則官民之間所資辦學經費各有專屬似于事亦較省便此應臨時酌量辦理

一 教育行政機關

邊牆以外蒙古界域行政機關本極複雜下則州縣與扎薩克同有地方之責各具出奴人主之嫌上則督撫與將軍都統皆膺疆寄之司尤有二君一民之懼互相牽掣卽互相隱忍是以官民之間蒙漢之際紛歧錯出狀如散沙百務不興正坐此弊蓋其行政機關之不能統一也久矣今于蒙古地方提倡教育其成立與否尤視能統一與不能統一爲斷苟統一而不複雜將爲有宗旨之教育則學校之成立卽厲于城作育之基如複

雜而不統一必爲無宗旨之教育則風氣之開通正爲他人入室之地特是教育統一之意必藉行政機關之統一以行之乃有以赴其程而不歧于中道茲將蒙古教育機關區爲三級一爲最上級之行政機關一爲次上級之行政機關一爲中級之行政機關下級行政機關卽統于中級之機關既靈而精神始振茲舉其略如下

蒙古教育上級行政機關必身握地方政治全權而作教育之總機關乃能提挈全綱大開生面蓋教育行政特地方行政中之一端如無地方行政之全權而僅以

教育行政分權獨立即使官秩階資並崇大吏而有位無民則呼應不靈枝節橫生勢將坐困故非操地方行政之權必不能作獨立教育之計是于蒙古欲定教育行政最上機關非先定地方行政最上機關不可頃者蒙古地方行政機關至爲複雜已具前條欲圖統一之法非另行編制不可而蒙古地方行政機關若何另行編制此乃方今政界中最大問題見在尚未能懸擬茲姑因陋就簡權卽目前成法擬訂辦法則凡已經開放蒙地所隸之省分去督撫治所相距既遠自應姑以所

隸之將軍部統爲最上級教育行政機關而各于將軍都統治所設學務長官如內地各行省提學使爲次上級教育行政機關

學務長官其一切權限應與各省提學使同外受轄于將軍都統內受成于學部凡教育行政諸事除詳報將軍都統以外可徑達學部其各州縣官立私立學堂之一切支用應均受稽核而教育行政及官立學堂各種經費所籌捐款及附加之稅捐等一切款目可徑下州縣及稅捐委員收集報繳訂立攷成與夫所屬一切學

堂之學規課程用行政無不總其大成是爲次上級
行政機關之樞紐

學務長官以下應于各府

指有轄土之府分言

廳州縣設監學官

一員此項監學官與內地提學使所屬之視學官不同

蓋蒙古地方州縣吏治弊壞已極而蒙漢人民程度亦

低既與內地風氣迥殊故內地各省所派之視學官祇

爲所屬官私學堂之督察而于經費度支興學捐款學

堂管理聘用教習歷任官紳之自爲竝不干涉而此項

監學官則須將府廳州縣所有教育之籌款權財政權

嚴切攷查並將編成法管理法以及聘用教習權切實主持而州縣官凡關於教育經費所經徵稅務委員凡關於教育款目所收取皆須與附近之監學官會同管理則理財用人諸節目乃得一氣呵成下分掌于監學官上受成于學務長官斯教育宗旨乃得一承學務長官之指授而不虞他歧至學務長官本屬應設之幕職及監學員以下應設之屬官蒙古地方既與內地情形不能盡同自應視學部編定之規制變通辦理是爲中級教育行政機關之樞紐而下級行政機關亦卽包括

于上中兩級所屬僚吏之中

一 蒙古教育豫備

以上行政機關已具大略惟蒙古地方遼闊將來監學各員及各學堂之管理員教員仔肩甚重而需材極多此非培養于平時難資取求于臨事自應專設蒙古師範學堂以爲蒙古地方教育基礎是尤爲機關中之機關此項師範學堂應設于熱河或赤峯而分設于歸化城俱直隸于學部卽由學部奏派大員前往管理姑訂學額三百名將來推廣至六百名及九百名止以專供

內外蒙古漸次開設學堂之用其中恆以學額三分之一從大學堂師範館內選擇優等學生前往學習不足則從外省師範學堂或中學堂內選送名曰學員此項學員須有志外界熱心教育誠篤不變者方充斯選其在大學堂及外省師範學堂中學堂內所學程度已高一切科學當已足用至選人蒙古師範學堂以後則以補習蒙古語言文字及蒙古地誌爲主並就近爲蒙古旅行作實驗研究地步尤須確知蒙古教育宗旨期以二年至三年畢業或一年速成以濟急用

速成者須隨時補習蒙文

將來專備監學員及管理員並各學堂教長及教員之
用其餘學額三分之二則就蒙地攷選不分蒙漢祇須
操履端方漢人取文理優長學有根抵者蒙人取精于
蒙文麤通漢文者入堂肄習三年或四年畢業如須豫
備者年
限不在
此內以備將來各科分教之用而聽指揮于管理員
及教長教員視此則教育人員成就以後自一氣相銜
將來可收臂指之效如是儲材不三五年則蒙地教育
名家自翹然傑出已

此項師範學堂經費須察度情形由學部及蒙古地方

兼籌方克成立

一教育行政區域

內蒙古區域應分爲五大段第一區爲直隸邊外各旗境第二區爲山西邊外各旗境第三區爲東三省西界各旗境第四區爲內蒙迤北而東各旗境第五區爲陝甘邊外厄魯特蒙古各旗境第一二三區爲見在擬設教育行政區域第四五區爲尚未擬設教育行政區域第一區域值畿輔北門地居重要以府廳州縣言則熱河道屬之承德一府圍場一廳轄于承德府之平泉灤

平豐甯建昌建平赤峯六州縣轄于朝陽府之朝陽阜

新兩縣口北道屬之口北三廳

三廳名見前條茲不復具

以蒙旗言

則熱河道所屬境卽卓索圖盟之喀喇沁中左右三旗

土默特左右翼兩旗烏昭達盟之翁牛特左右翼兩旗

克什克騰敖漢奈曼喀爾喀左翼四旗凡十一旗皆隸

于熱河都統其口北道所屬境卽察哈爾之左翼四旗

蒙古皆隸于察哈爾都統此兩都統所屬流官蒙旗同

治之境土應爲一教育行政區域而設一學務長官于

熱河以分承熱河察哈爾兩都統教育行政之機關而

內受成于學部

熱河察哈爾雖分兩都統特祇能爲一教習行政區域故祇能設一學務長官以總挈兩都統教育樞紐

第二區域值畿輔之西迤北與第一區地相毗連故亦

居重要以府廳州縣言則歸綏道屬之口北十一廳名廳

俱見前條以蒙旗言卽西土默特之左右翼八旗蒙古茲不復具

察哈爾之右翼四旗蒙古及烏蘭察布盟之四部六旗

伊克昭盟之一部七旗凡二十五旗中惟十八旗見在可施教育說見前

條皆隸于歸化城將軍而察哈爾右翼四旗旗務仍受

轄于察哈爾都統此一將軍一都統所屬流官蒙旗同治之境土應爲一教育行政區域而設一學務長官于歸化城以分承將軍都統行政之機關而內受成于學部

至第三區域則值畿輔之東迤北與第一區尤唇齒相依故亦居重要特其地形與東三省相出入實別一區域與第一區第二區情形迥不相同以目前論尚不能具獨立教育機關祇能分隸于奉吉江三省教育行政以內而其中情勢尤極複雜蓋黑龍江之新設大賚安

達肇州三廳卽杜爾伯特札賚特兩旗及郭爾羅斯後旗境皆逼近黑龍江省城自應與黑龍江同一教育機關吉林舊設之長春一府卽郭爾羅斯後旗境亦錯入吉林西界以內自應與吉林同一教育機關奉天舊設之昌圖一府新設之遼源一直隸州卽科爾沁左翼三旗東面地亦近附奉天西界自應與奉天同一教育機關以上流宮蒙旗同治之境土皆應分隸于奉吉江三省教育行政以內者也惟奉天新設之洮南一府卽科爾沁右翼前後兩旗境南去奉省旣極寫遠實有鞭長

莫及之勢應于奉天別設提學副使分駐該府境內以

資管理抑或割隸黑龍江

洮南府距黑龍江近于奉天

較易統轄否

則俟科爾沁右翼中旗及科爾沁左翼西北境全行放

墾以後別畫疆界

奉天新墾科爾沁地斜伸東北地極寫遠原應別畫疆域方便行政

與

地方一切行政另立機關以資統攝均應詳核辦理方

于東方學界可期畫一此則第三區教育行政機關以

區域情勢之殊應與第一區第二區辦法不同者也

以上第一第二第三蒙古教育區域率爲已墾之地若

第四區則尚爲寸土未墾之地其情形與前三區又迥

不相侔教育自無從措手第四區南抵潢河即西遼河上游北抵喀爾喀外蒙古南境東抵索岳爾濟山西麓西抵西二盟東境皆未經放墾自未設立州縣其蒙旗則爲錫林郭勒盟之烏珠穆沁左右翼浩齊特左右翼蘇尼特左右翼阿巴噶左右翼阿巴哈納爾左右翼各二旗烏昭達盟迤北之巴林左右翼扎嚕特左右翼各二旗阿嚕科爾沁一旗凡十五旗錫林郭勒全盟烏昭達盟半部千里荒涼恆行終日不目一人須俟放墾以後農業稍興蒙漢雜居漸成聚落乃可徐圖教育此爲內蒙迤東最北之區乃

教育行政暫所不及之地

至第五區爲近邊極西境域值陝甘邊外乃厄魯特蒙古阿拉善部此在內蒙古四十九旗之外而地屬漠南且附邊牆轄于甯夏將軍故亦當與內蒙古例論是區東至甯夏邊外南抵甘涼北接外蒙古喀爾喀扎薩克圖部西至古爾鼐及額濟納土爾扈特部蓋自古用兵之地以賀蘭山爲塞是部自爲一旗見其全境已多墾闢且有吉蘭泰鹽池出產極旺販運甘陝獨擅大利是宜別派專員前往查察與內蒙古各旗境統一教育

以上五區除承德府圍場廳灤平縣豐甯縣四屬以外

皆漠南各部蒙古雖有內蒙古厄魯特蒙古及設扎薩

克

四十九旗內蒙古阿拉善厄魯特蒙古皆設扎薩克以爲旗主

不設扎薩克

察哈爾西土默

特皆編爲八旗轄于將軍都統無扎薩克

之不同然同屬近邊棋布直隸山

西陝甘邊牆及奉天西界以外若絕漠而北或踰巴里

坤而西則爲喀爾喀四部外蒙古及厄魯特蒙古各部

地方遼闊土曠人稀綿邈晦蒙遠甚于內蒙古然庫倫

烏里雅蘇臺科布多塔爾巴哈臺等城鎮爲我將軍大

臣駐節之地換防兵丁所集商賈所趨已間成繁盛之

區似已足經營教育特該城鎮除蒙古外其漢人率山西商民更代往還不挈眷屬殆無及歲學童蒙古仍行廬氈帳轉徙無常似舉辦學堂尚非易事應俟近邊蒙地教育辦有端倪再行派員前往各城鎮察視情形相機辦理見尚未能擬議

以上六條祇舉大綱至條目所在則因地因時隨方布措若經營有法數載以後地闢民聚邊宇漸充則教育之方又將隨地方行政機關與爲轉移此特始基繼長增高以待異日再行訂定

丙午秋仲學部李右丞

家駒

銜尚書榮相國

慶命來

諷蒙古教育蓋時有條陳學部請設提學大臣于庫倫掌內外蒙古教育者相國疑之以

錫光

方從肅邸

自東四盟諸部旋故遣右丞諮以決焉夫蒙古行國也性如金類中之流質必待凝成定質乃可製爲器皿蓋行國人民非與他種人民化合而成居國不可以言教育理至明也

此說于上年實邊條議中已詳言之

以居無廬舍

會不梁亞廣漠萬里之部族而設官置吏遽命提學

大臣孤立萬里以外謂以大興教育天壤之間詎有

是事特水有導源之地木有植根之方而科盈條達
可立以俟蒙古教育固非不可爲也知其腠理所在
自迎刃而解已右爲條議六則納諸右丞藉覆相國
自記

上練兵處王大臣牋

光緒三十二年丙午三月

十八日謁辭十九日下午一點鐘從肅邸出都是夕住孫

河二十二日抵古北口二十五日抵熱河白石匣城

去密雲縣

五十里

至古北口兩住站皆馬軍門

玉崑

供帳出口至熱河

兩尖兩住皆有灤平縣供帳

熱河都統發銀四百兩交灤平縣領辦

抵熱河

住試院仍都統備辦供應均固辭不獲馬軍門候見肅邸

于熱河而都統有會商墾放蒙地諸事在熱河約須住五

六日乃得行即前赴喀喇沁王府矣頃擬查攷之法分三

大段第一段自熱河起至赤峯縣北之烏丹城止以清丈

升科爲主

都統意見亦同

蓋是段大半放墾孰地可輕定科則薄

收課賦以充軍實擬派員分查田土腴瘠歲收豐歉蒙租收數官吏科斂四面比較爲將來科賦張本第二段自烏丹城起北至烏珠穆沁折而東至圖什業圖王府止以開闢車行大道分設尖住官局爲主蓋是段皆未開草地莽無居民行人無會宿之所牲畜無芻豆之備不假力蒙古勢卽坐困擬先開官大道一條以烏珠穆沁爲中心點卽爲運鹽官道官設尖宿局舍爲鹽車人畜棲止之所而售鹽放墾兌易銀貨皆屬于此官局之中一氣呵成其商車

經過亦准投息造飯喂秣不數年間大道兩旁將成無數市鎮村落田野開闢嗚吠相聞南北之氣大通地價且將日漲見先從測量路綫入手爲路工張本第三段自圖什業圖王府起至黑龍江邊境止是段大半墾放應如第一段變通辦理且力扼東北孔道以爲邊防根本以上所擬以三大段情形不同故查攷之法亦異大概則分已墾之地未墾之地以爲歸宿將來辦法卽據爲綱領其第二段地最袤長卽上年程將軍奏稱索岳爾濟山左右地落也此次蒙古之行各國均極注目而某兩國尤甚聞已各派

秘密偵探前來蹤迹以是嚴防究尚未得要領又前在京
于瀕行時探聞某國使館派有九員竝帶有中國人分途
前往蒙古且各挾有多金作運動費此事由英國
銀行人漏洩不知是
否運動蒙部抑此次密探查辦蹤迹抑或別有宗旨沿途
檢察亦皆未有見聞至鹽業銀行乃此間大利所在尤爲
財政入手地步見正分途詳細攷察俟抵喀喇沁王府再
行續陳先此密聞敬叩臺安祇乞垂鑒

再上練兵處王大臣牋

光緒三十二年丙午四月

前謁辭出京二十一日抵古北口二十五日抵熱河曾將
擬分三大段查攷辦法馳陳大概在熱凡住六日四月初
一日行初四日抵喀喇沁王府肅邸卽此候晤卓索圖盟
王公錫光仍切查蒙租墾放等事以備將來升科計畫此
間約須住十日上下乃得北行前在熱河與廷用賓都統
接晤數次觀都統意主張升科志在急辦且謂業經出奏
矣錫光以其意甚銳未與有所可否竊謂蒙古已墾之地
自應升科此見一定不易之理特同是升科而其中辦法

則迥不相同

錦光

意在求安蒙部各旗主蒙丁及租客佃

戶之心俾之溥然相忘咸有得所之樂不以

國家訂課田賦爲苦則蒙人無喪其樂生之心漢戶亦各收耕鑿相安之益斯事乃有濟蓋蒙境王公所畏者在失富貴土地失而富貴去矣蒙丁所畏者在失生計蒙租去而生計窒矣漢戶所畏者在吸膏血私斂不能除而公賦且加迫則膏血盡矣必去其所畏而升科乃有辦法要而言之不使蒙人有失產之懼漢戶有加賦之虞則非特升科可行從此經營蒙古斯無棘手之處其辦法在一面履

丈清查

熱河台界中尚無此種相宜之人
若任意派員必大爲民間擾累

一面嚴汰科派

總爲民間省虛擲之錢留有餘之脂膏以上供課賦似爲
一定不易之理至田畝之過割蒙民與蒙民蒙民與漢戶
漢戶與漢戶一任其自爲典賣而受稅契于官事乃簡而
易行而人情亦順總之此等事任可詳審紆徐切勿操切
造次頃者熱河所擬升科奏牘蓋以蒙人自願報效爲名
實與收回蒙古土地無異其收回之法又非用和緩手段
使之遷移于不覺而直率從事恐于蒙古事件將生絕大
障礙卽放墾一端

蒙古未墾之地尚多卽以內蒙
論其已墾者不過三分之二

亦逐節

胥成阻力此于邊事甚有關繫特陳大略以備鈞裁竊謂
辦理蒙地約分兩端于已墾之地勿以奪產爲升科于未
墾之地勿指放荒爲大利則蒙境將無不放之荒卽蒙地
將無不稅之士矣此中情形一俟回京再行詳陳以備籌
策此間啟行後過巴林橋便入草地卽所謂未墾之地沿
途察視情形再呈大略手上藉叩鈞安

再上練兵處王大臣牋

光緒三十二年丙午四月

前于熱河及初抵喀喇沁王府曾兩次上牋想早達鈞覽見正查攷蒙租輕重王府差徭竝蒙丁生計俟有端緒再行續陳惟自出京以來于鹽業錢幣兩事尤所注意誠以此爲經營蒙古財政人手之地且近利所在乃開通北圍慎固邊防之絕大關鍵竊查日本之覆朝鮮卽以設立銀行發行紙幣爲第一步而購買民地給發築造鐵路工價皆取給于此是不啻以朝鮮之財築朝鮮之路而日本因以握朝鮮全國之脈絡其計固至巧也

國家不經營蒙古則已苟經營蒙古正宜握財政權爲立

足地步特日本之在朝鮮係全用不換紙幣

不換紙幣亦准爲會兌見

銀出境特在境內不能以換見銀

此蓋全用對待屬地辦法

國家之于蒙古視日本之于朝鮮固迥不相同自不能用不換紙幣惟既不用不換紙幣自必先籌見貨爲備換金欲籌見貨爲備換金自以專賣蒙鹽爲第一著手之法指鹽業爲無形之保人以發行兌換之紙幣民間無不信從之理則鹽局設立所至卽紙幣推行所至不出二年將大小銀行可遍設于蒙古地面卽使鹽業無餘利可資而銀

行存兌紙幣發行其爲利固已大矣將來經營蒙古路礦之成卽恃此銀行爲根據蓋銀行者乃路礦之起點而鹽業者又銀行之靠山也然則欲經營蒙古不能不爭此鹽業固較然明矣竊錫光前于上年五月出關見口北皆食青鹽卽蒙此次北行見永平鹽業經灌入其灤平縣出口卽是承德府境內永平鹽銷路已占青鹽十分之六則平泉建昌朝陽近邊州縣可想而知青鹽售價最貴之處至制錢實數一百五十文上下最賤之處在制錢實數五十文上下而永平鹽恆跌價五六文至十餘文不等且青鹽近日

來路亦乏故貨少價騰是以永平鹽浸灌而入速力甚大
特民間尚喜食青鹽誠能售價不高于永平鹽而來路足
資民食尚可規復銷路夫理財猶治水也隄而匯之涓流
細水可成江河決而放之則巨浸洪流將成溝澮青鹽大
利若棄而不收其銷路一任爲永平鹽奉天鹽花馬池鹽
分道侵奪此中大利將各爲其官私上下所分而

國家之一大宗利權將銷歸烏有而銀行亦無憑藉可辦
此事于經營蒙古關係甚大至圖法一端口外直無官錢
茲寄呈此間通用錢數十文以備鈞覽其換價每兩半蘇

半廣平

比京平幾至加一

松江銀換鵝眼錢實數二千二百文上

下至一千八九百文上下不等是以百物騰貴支兌艱阻莫與倫比上年出口尚未有銅圓此次灤平承德一帶已間見銅圓使用每一銅圓可作通用小錢十五文至二十文不等民間亦頗樂用特來數甚少不敷發行似可飭知造幣局加鑄儘發並行熱河都統籌款周流兌領以先吸收此宗大利大小銀行將來如果成立再以紙幣銀圓銅圓相與轉換乃定價收銷私用小錢則官收巨利民間尚不喫大虧方是通法然銅圓發行不過一時暫利而經常

之利則在銀行利入大宗尤在紙幣而存兌次之此須鹽業有所歸宿以後乃有辦法至升科一節孰審利弊徐辦則可行急辦則必不可行詳慎則可行操切則必不可行其中節目前函已陳大概此間卽日起程過巴林橋郵寄更難而蒙古驛站恐稽遲愈甚一切函牘屆時再設法馳寄專此密陳敬叩鈞安

附牋 同日

再累日在途詳詢姚令煜見在朝鮮情形而知日本設謀

固厚積其力于朝鮮其不逞之心蓋待時而發也見值日

俄和局既定之後而日本駐兵朝鮮有見役兵四師團日本

最諱言在朝鮮兵數作久駐計而于龍山及仁川平壤廣建倉庫屯

糧儲械以待徵發從其對馬島對岸之釜山過韓京直達

我安東縣對岸之新義州鐵道既成以爲兵站經綫自其

東京至我安東縣不過六日程耳其間以去韓京十里之

龍山爲中心點龍山平原坦曠外包羣山凡周四十里上

下日人竭力經營倉庫林立復從仁川海口伸築海岸亦多建倉庫其上修造支路匯于龍山復從元山甌南浦兩海口敷設支路均達平壤而龍巖浦與我大孤山隔江相望尤爲逼近一旦有事其陸軍既可由釜山兵站經綫直

趨安東

聞于新義州將作鐵橋渡鴨綠江抵安東縣

而于仁川元山甌南浦龍

巖浦分道濟師皆有鐵道支綫皆有倉庫儲備悉從枕席上過師無稍阻滯可作臨時百矢俱發迅雷不及掩耳之勢夫日本僅爲鎮服朝鮮計斷無庸費此絕大力量是其意固必有所在可揣而知且其尤可惡者其海軍省起朝

鮮之元山浦而釜山而仁川而甌南浦而龍巖浦折入租我之大連灣旅順口更繞抵我之山海關大沽口燕臺直名爲其海軍之北清防備綫且其在朝鮮陸軍駐所趨重西北而于仁川甌南浦龍巖浦倚爲海陸兩軍聯絡之所以備分道運兵濟饗之用百計圖維不遺餘力夫日本如此布置其統監府既歲費一百八十萬金圓而四師團久駐尚不在內加以建築諸款計其歲費不貲斷無能取諸朝鮮之理亦無能作持久不發之計是其必有最優之後望以作取償之地其取償所在恐不能不處心積慮于我

所幸者其實力尚未充滿數年之間不能遽發是以其政
界兵界各官猶時以甘言狐媚蔽我耳目我正宜及此暇
隙之時迅籌布置彼厚積其力于朝鮮我厚積其力于東
隅蒙古以相抵制尤應力籌海軍爭此活著我力自圖疆
彼尚或有所忌憚而不敢遽發建威銷萌似宜圖之于早
每念及此中夜不寐竝以上聞以備籌策姚令煜說帖一
扣一併呈覽又此肅陳再叩鈞安

再上練兵處王大臣牋

光緒三十二年丙午閏四月

前抵熱河及喀喇沁王府疊上牋言諒均蒙臺鑒續于四月十八日隨肅邸起程二十日抵赤峯縣住三日北行二十六日抵烏丹城是處地勢奧衍土脈膏腴勝于赤峯乃有元魯王建可之所甚據形勝留一日乃行二十八日過巴林橋橋跨潢河即西遼河石工堅緻略似蘆溝橋亦爲塞北孔道過此卽入巴林旗境閏四月初一日抵巴林坂亦名大坂住大喇嘛廟巴林原遼之上京臨潢府地土脈之腴遠勝喀喇沁翁牛特諸部惜寸土未墾除喇嘛廟外無房舍肅

邸于此候晤烏昭達盟各王公

錫光

即此與肅邸分道兼

程赴鹽池約會于科爾沁部之圖什業圖旗自分道以後

凡所僱蒙古牛車或馬車皆日給工食護送蒙員亦量給

品物蒙人甚歡忭閏四月初三日自巴林坂西北行初七

日過巴林北之大山隘

有東西山脈大幹亦要塞地

遂入西烏珠穆沁

旗境土脈亦腴美可耕過此遂遇風雨且牛車遲鈍住甌

帳中煩悶欲絕至閏四月十三日始抵鹽池住二日乃折

回行二十日抵鄂博圖地方之大喇嘛廟

去烏珠穆沁王府約六十里

聞肅邸即于此廟會晤錫林郭勒盟各王公東行尚不過

三日錫光擬卽此住二日稍整行裝竝換車輛牛疲已不可行卽

二十三日兼程東行追從肅邸于圖什業圖王旗

查鹽池跨西烏珠穆沁東浩齊特兩旗界蒙名巴達遜諾

爾窮日之力循岸丈量池周三十餘里

水漲時至五六十里

水面結

成鹽冰水底率成鹽粒隨取隨結取之無盡而鹽色明潔有若水晶味至鮮美遠勝海鹽稍加製鍊可裝瓶作洋鹽銷售運行通商各埠竝銷俄境實爲無窮美利

是池在兩山間四面皆高水無下口蘊釀鬱積遂成斤鹵

池之西面有泉數泓

係淡池

引而東流以澤鹵地積鹵得水

蒸以日光遂結爲鹽日光愈烈出鹽愈多故產鹽之期夏
起四月秋迄八月而五六月間產鹽尤旺應于池邊建設
鹽屯夏秋兩季爲取鹽期隨取隨結隨結隨取屯積待時
分起輸運

查銷鹽之數原無總匯之所故確數無從稽攷特銷鹽地
方東迄吉黑邊境西抵口北三廳南抵邊牆益以宣化一
府北盡車臣汗南境周圍及萬里以外若歸官業專賣成
孰以後除去一切經費每年歲入總在百萬兩以外經營
蒙古之方必從財政人手舍鹽業專賣一法殆亦別無憑

藉之處

查巴林一部兩旗烏珠穆沁一部兩旗地頗膏腴氣候雖寒而計每年耕稼之期尚及一百二三十日小米大麥皆及成熟而日本俄羅斯人歲來調查似亟宜放墾尤急須設官以免外人窺伺蓋此兩部四旗之地面積約及十六萬方里上下斷非此區區五六千戶蒙古所能爲國家據守而外人之來直如入無人之境其凡未墾各部皆可以此類推至開放次第升科方法容回京續陳茲不贅瀆此次至鹽池北去外蒙古車臣汗部不及百里已踰東大

道而西約三十里上下東大道者乃由張家口北出多倫諾爾廳東北經克什克騰部又東北出入于浩齊特東界烏珠穆沁西界直抵外蒙古車臣部界折而東稍北至黑龍江之卜魁城直北行稍東卽出車臣汗北界直抵俄羅斯西伯里亞鐵道聞此綫道早經俄人測量擬作支路直趨張家口此路測綫于俄人所繪地圖斑斑可攷而見在俄人由此東大道經行查攷者歲繁有徒卽此鹽池亦均有日本俄羅斯人前來看視似亟宜經畫布置以防未然而固京畿肩臂此行外人最爲注意一路均有外人偵察前行及赤峯有

外人二十餘名先後而至蓋俄德英三國人因多方探訪其英德兩國人亦俄人僱來以作耳目而日本人尤屬狡捷其來者率改作中國裝服以是無從辨識至烏丹城尚有一美國人先後偕行至過巴林橋以後乃不見外人蹤跡或別僱中國人偵伺亦未可知其間可疑之端容回京再陳一切

此函係由烏珠穆沁之鄂博圖地方僱蒙古人專送喀喇沁由其旗下郵局遞京過此東行道路愈遠無從郵送約在一月上下可抵黑龍江省城然已附近鐵路不出兩旬

當可回京擬再函後均容回京面陳肅此馳上敬叩臺安

再上練兵處王大臣牋

光緒三十二年丙午閏四月

前于閏四月二十日抵鄂博圖地方肅上一牋諒蒙鈞鑒

休息二日擬即東馳見正東裝明日晨發通計一月上下

可借肅邸抵齊齊哈爾省城矣此次經行以來見塞北東

蒙地方應以巴林橋為大界畫橋橫潢河即西遼河上流為南北

孔道潢河以南大較為已放墾之地間有未墾之地潢河

以北則為全部未墾之地是以一渡潢河而北倉則羊肉

宿則棚帳乘則牛車駱駝並不多見且極疲瘦馬則齧草牛羊皆然無麩豆以

是馬有馳力而無常力馳半日即須換馬日須牧放不可調練非

蒙古人導引無從詢問路徑

非但言語不通且行數十非里恆不見一人無從問路

特行旅艱難日人食料馬喂料及然料竝木料石料均無萬一東北方猝有兵事則兵站部之設置礮馬隊之經過將生絕大阻力

錫光

在途竟百思不得良法是非迅爲設法經營一旦有事勢將束手

竊謂爲東北邊防計

東北邊防實卽京畿肩臂

非爲陸軍豫籌一絕大

倉廩不可蓋滿河以北亟須招徠無限農民以墾此數十百萬方里之地數年以後餘糧棲畝而人有餽糧可購馬有豆料可資而無形之倉廩莫大乎是此趙充國屯田湟

中所謂枕席過師不戰而服先零者也似非從移民實邊
入手別無辦法矧以我領土言之此內蒙古一帶尚是腹
地竝非窮邊且逼近京師

朝廷不糜一錢可坐收租稅之地十百萬方里以爲藩衛
似當務之急莫此爲甚

頃以潢河以北蒙古見戶與地方面積比較約在二十
四五方里始攤有蒙古一戶斷非此區區人數能爲

國家守此巖疆且卽以畜牧言于日行數十里中不過見
牛羣羊羣數起且竝無大羣而馬羣則尤不多觀是其地

之曠廢可知則于酌留畜牧之地以外全數開放自無疑義且交通既便生計自寬此于蒙古有益無損尤可概見
潢河以北爲巴林部兩旗阿魯科爾沁部一旗烏珠穆沁部兩旗凡三部五旗再東則科爾沁右翼三旗卽上年冬間黑龍江將軍程德全所奏之索岳爾濟山左右旗分也此數部者爲冬將軍都統鞭長莫及之地有如間田一任外人往來出入一無覺察似應特派專員內以經理鹺墾之宜外以嚴杜窺覷之隙以爲東北重鎮俟辦有規模其浩濟特以西四部相視機宜再行推廣

若潢河以南口墾之地居十之七八經理升科非從澄清吏治人手不可如所稱平朝建赤四大州縣者其所派民間之差徭及陋規各費每縣每年至津錢五十萬緡上下此尚爲尋常之款而貪黷之吏非法誅求詞訟之費多方索詐尚不在內其蒙古王府取求于蒙丁者與此正不相上下似無論漢民蒙民皆應寬留其力而後

國家之賦稅乃有徵取之地不然州縣之婪入蒙府之橫攤既已竭澤而漁于此之外再加課賦勢不至弱者逃亡彊者抗令不止則地方之吏治蒙府之權限非清釐整飭

無下手地步此事如治亂絲宜寬以時日徐求條理若求速效所損必多

已墾之地以嚴課吏治爲主未墾之地以儘數開放爲主此其大端若一切條目及財政經理之方與國防要塞所在容俟回京再行續陳再塞北兵事關繫以蒙古與東三省之交尤關重要故行抵赤峯吳監督祿貞分路繞行東道察視行軍及國防形勢所在約會于齊齊哈爾亦擬回京再陳一切謹此馳上敬叩鈞安

遵擬設立全甯副都統說帖

光緒三十二年上練兵處王大臣

竊查索岳爾濟山左近各蒙旗東扼吉黑兩省西道之衝

為哈爾濱渡江

江松花

西上所必經北控車臣汗部外蒙古

南牧之隘為滿洲里車站

入俄境首站

支路南來之孔道

俄人擬從

其滿洲里車站接修鐵路穿車臣汗部入內蒙古烏珠穆沁浩齊特兩旗又南穿克什克騰部抵多倫諾爾廳至張家口此道業經丈

量有俄圖可證而其地橫跨哲里木烏昭達錫林郭勒

恆行百里不見一人

去

三盟之交表延數千里彌望荒蕪蒙戶寥落

奉天熱河察哈爾各將軍都統治所極遠有鞭長莫及之勢且值此東方多事之秋一任外人出入窺伺如入無人

之境而我官吏直無從覺察萬一有事凡兵站之轉輸芻糧之購備亦直無從措手上年將軍程德全奏請于其地簡派大員經營墾放俾得南與熱河東與東三省西與歸化城及西二盟聲援相接所請實爲近今局勢當務之急擬請姑設副都統一員將哲里木烏昭達錫林郭勒三盟交界各蒙旗四山川形勢凡未設州縣及未經放墾或雖經奏請放墾尚未有人領種之地畫歸管轄所有應行分疆設立編制各節開呈如左

一名稱

此次新設副都統轄境較廣不得祇以一城一邑之名冠于其上其稱名也應以包括所轄全境爲主謹擬數名以備選擇

全甯副都統 見擬轄境卽元之全甯路北境亦卽前明之全甯衛北境故擬名全甯似最妥切

臨潢副都統 轄境居潢水之北卽遼之上京路臨潢府故地故擬名臨潢然不如全甯之包括

遼西副都統 轄境在漢時爲遼西之西北境然在今時實值松花江嫩江之西竝不值遼河之西矣

稱以遼西名實不甚密合似究不如全甯之妥當
 山北副都統 遼金以來稱燕雲諸州郡為山南以
 潢河以北諸部為山北蓋自長城以北橫抵潢河
 皆陰山東幹山嶺所盤互所稱山南山北即以此
 山為界畫也稱以山北名實似亦甚符合

一轄境

見在東部內蒙古已墾未墾之境大概以潢河即西遼河上游
 為界茲擬新設副都統轄境如左

南循潢河東流即沿西遼河而下為界下游有跨至西遼河南岸

者臨時再與熱

河畫分界限

北至沙漠爲界

北與車臣汗部分界

東南至奉天新設之遼源州爲界

東北至奉天新設之洮南府爲界

東面最爲扼要應臨時與奉天黑龍江新設之府

縣畫分界限

西南至克什克騰旗西界爲界

西北至浩齊特旗西界爲界

再將應分哲里木烏昭達錫林郭勒所轄之蒙旗開明

如左

東分哲里木盟之科爾沁右翼中旗 即圖什業圖王旗 科爾

沁左翼中旗 即達爾罕王旗凡同部兩旗

北分錫林郭勒盟之烏珠穆沁左右兩旗浩齊特左

右兩旗 凡兩部四旗

南分烏昭達盟之巴林左右兩旗 同游牧 克什克騰旗

阿嚕科爾沁旗扎嚕特左右兩旗 同游牧凡四部六旗

右係從哲里木等三盟內畫出七部 科爾沁部祇劃十分三分之一 十

二旗其中巴林左右兩旗業經熱河都統奏請放墾科

爾沁左右兩中旗亦經奉天將軍奏請放墾特此四旗者必須收入新設副都統轄境之內則東南兩面方有著根之地必有著根之地方可措手布置此東南兩面的爲新轄境內著根地步否則東

無以扼東三省形勢之區南無以通熱河州郡之氣則此新設區域將四面陡絕孤立無依聲息不通勢將坐困故東面之科爾沁左右翼兩中旗南面之巴林左右翼兩旗同游牧必須收入轄境

此次所擬轄境從哲里木等三盟畫出之十二蒙旗卽將軍程德全原奏

簡派大臣督辦放墾之旗分特加入浩齊特部兩旗以
鹽池跨入該部境內加入克什克騰部一旗以盡潢河
上游順地勢之自然難以畫出界外加入科爾沁左翼
中旗達爾罕王旗以其與科爾沁右翼中旗圖什業圖王旗犬牙相
錯難以分割也其餘旗分皆從程將軍原奏收列

一駐所

新設副都統駐紮地方應擇交通便利控制得宜之處
以爲首部性設官方始百度權輿事必親臨乃收捷效
應區爲經制常駐之所行署輪駐之所如下

經制常駐之所

巴林旗內之巴林大坂地方 是處南接赤峯烏丹

城等處易與內地脈絡相通轉運較易北控烏珠

穆沁東臨阿魯科爾沁東西扎魯特大道直抵鄭

家屯即遼源州形勢便利是宜為副都統建署常駐之

所

行署輪駐之所

科爾沁左翼中旗達爾罕王旗之新河是河上通潢河下達遼河附近

地方

是處與巴林大坂東西大略相值適扼從哈爾濱西上之路而居洮南府遼源州適中之地勢處東面重要地點應設行署每年巡閱輪駐數月竝設東路銀務總局于此姑設總辦一員將來墾闢告成民居稠密以後應設道員分駐以資控制

烏珠穆沁浩齊特兩旗交界之鹽池地方是處既爲蒙古命脈所關且北去外蒙古喀爾喀車臣汗部尋常馬行祇半日程實邊塞重地池之東面十餘里有大道一支西南至獨石口外之喇嘛廟東

北至黑龍江之呼倫貝爾

俗稱海諾爾

爲通行商路卽

俄人所擬設之鐵道支路近日俄人之攜測量及攝景器具來遊者踵相接也應卽循此大道之旁設行署一所間年巡閱輪駐數月竝設提舉鹽池委員常川駐紮以資覺察

克什克騰西南境附近喇嘛廟地方是處爲蒙鹽銷場最旺處所統計見在蒙鹽銷數其運赴喇嘛廟者幾及全數三分之二實爲鹽利命脈所在應于克什克騰西南境設行署一所間年巡閱輪駐

數月

一責成

一新設副都統應加兼管辦事大臣字樣其職官曰某某副都統兼管辦事大臣事務

副都統爲管轄地方之實官辦事大臣爲辦理蒙事之差職以實官而兼差職者以循蒙人耳目所習貫期于堅其信從之心而辦事較易爲力也惟以副都統實官而兼辦事大臣則可若循常例改作副都統銜某某辦事大臣則不相宜蓋如改作

副都統銜而無實官則管轄地方之權反輕而責成轉虞其不足矣

二凡在轄境以內所有租稅訟獄警察教育及一切政治皆歸該副都統專政其畫分管轄之十二蒙旗向例受轄于奉天將軍熱河察哈爾兩都統之一切事件均應畫出歸此新設衙門管理以專責成

三凡隨駐轄境內之新舊兵隊並無論蒙漢何種兵隊一律皆歸節制調遣

四此番新設副都統本意其應治之事以墾務墾務爲

要圖經營蒙地凡一切財政入手之方實于是乎在此兩項事關重要且與鄰疆多所交涉應請明發諭旨或于本官上加督辦鹺墾字樣方有著手地步茲將墾務鹺務兩事略舉梗概如左

一 墾放之次第

內蒙佃放爲全民墾辦法與兵屯不同兵屯地可斷續興辦民墾則必循近致遠由孰達荒步步踏實如流水然盈科後進故此次放墾擬從東南兩面節節進步茲擬辦法如下

南面須連續赤峯之氣以爲根據故從巴林入手
自南而北巴林爲副都統駐所卽于其地設南路
墾務總局相其地之所宜北向烏珠穆沁東下阿
魯科爾沁再行分設支局

東面須連續遼源州

卽鄭家屯

洮南府

卽科爾沁右翼前旗通稱薩克

圖王旗

之氣以爲根據故從科爾沁左翼中旗

達爾罕王

旗

新河附近入手自東而西卽于新河設東路墾

務總局相其地之所宜北向科爾沁右翼中旗

圖什

業圖王旗

西上東西札魯特再行分設支局

是以東南兩面苟舍南路之巴林左右兩旗東路之科爾沁左右翼兩中旗則氣脈無通入之方將無著根地步故該四旗必須收入轄境

至放墾辦法容查取奉天黑龍江兩省成案比照辦理惟宗旨所在凡墾價所贏餘不妨優給蒙旗示

朝廷竝無利此區區墾價之心以昭大公則百務之興較易著手

一 釐政之範圍

竊興辦邊事當以理財爲第一義見所擬轄境區域

內尚暫無課賦可徵又無貨稅可取理財幾無著手之處頃開辦伊始其稍可資爲憑藉者惟指蒙鹽專賣一項周歲所入可獲巨款見在辦法第一在畫定銷售區域茲將見在蒙鹽銷售區域範圍開列如下

南抵邊牆

西南插入宣化全府

北抵車臣汗南部

東抵吉黑兩省西境

西抵察哈爾八旗東境

照見在蒙鹽銷場周回萬里以上將來放墾日多居民日聚則蒙鹽銷數自必日增苟有專賣之權不患鹽利不匪爲大宗而憂鄰鹽日奪其銷路東路海鹽

西路花馬池鹽苟不嚴定界限則池鹽日灌而東海
鹽日侵而北勢不盡奪蒙鹽銷路不止此須專案釐
定以固利權至銷路大宗擬姑設總局四處各于總
局附近處所分設子店茲將應設總局地方開列如
下

南設巴林總局 設于巴林橋或赤峯境內之烏
丹城臨時酌定凡熱河平泉建昌朝陽等處之
運銷皆于此局匯總

西南設喇嘛廟總局 凡口北三廳內及宣化一

府北至克什克騰等旗西至察哈爾東境等處
之運銷皆于此局匯總

東南設遼源州總局 凡吉林西境奉天西北境
黑龍江西南境及哲里木盟南路各旗境之運
銷皆于此局匯總

東北設洮南府總局 凡黑龍江西北境及哲里
木盟北路各旗境之運銷皆于此局匯總

總局既設各于附近城邑市鎮分設分店支店以暢
銷路卽于鹽店之中加設錢櫃發行鈔票而以鹽業

爲無形之保人民間無不信從之理將來鹽業推行所至卽鈔票推行所至而見銀紙幣及大小銀圓銅圓之兌換皆庸于其中與夫遠近城鎮內至京師南至天津上海東至牛莊營口一切見銀期票之會兌皆爲之轉輸如此推行將大小銀行不出二年可遍設于蒙古地面卽使鹽無餘利可資而鈔票之存兌其爲利固已大矣將來蒙古路鑛之成本卽倚此爲根據而發端之始實以鹽業專賣爲之始基尤以畫清銷路最爲急務

以上言釐政之大略而銀行之成立自在其中至總局及分店支店之一切章程與轉運管理之一應程式容開辦時再行詳擬具報

一 道路之交通

經營之始首在開闢道路以便交通而聯脈絡茲擬轄區域應修官道四大支大率就原有之路而加修焉一由鹽池西南行經浩齊特克什克騰而至喇嘛廟是爲西大道一由鹽池東南行經烏珠穆沁巴林而至赤峯境之烏丹城一由巴林大坂直東行經阿魯科爾沁東

西扎嚕特科爾沁左翼中旗而至遼源州是爲南大道
一由鹽池折而南直東行經東西烏珠穆沁科爾沁左
右翼兩中旗而至洮南府是爲北大道是皆爲經道視
放墾所至有出支路以利周行則運輸便而氣脈乃通
大道之旁種植樹木凡官設之墾局鹽局銀行警局電
局郵局及一切官舍與夫民立之商店旅館以及兵隊
之屯駐皆循此大道擇別要區分段建立則居者獲守
望之助行者有棲止之方更于民力不及之處官設尖
宿局舍爲鹽車人畜棲止之所而售鹽放墾兌易銀貨

亦皆厲于其中一氣呵成其商車經過亦准投宿休息
造飯喂秣則數千里榛莽晦塞之區其氣可以大通地
利旣修而天時人事亦皆順應矣

一官屬之編設

區域以內蒙戶寥落率牽算二十方里至三十方里始
占有蒙民一戶曠土彌望直等無民是必待放墾以後
田疇鱗次鳴吠相聞方有設官分職之事然見當經營
伊始墾務釐務警務兵屯路政訟獄亦在在需人治理
故擬暫不設官姑定差缺以治諸務暫不建署姑設局

所以統庶司

職務所在以鹺墾爲兩大宗墾務設總局二一設于巴林大坂一設于達爾罕王旗之新河左近凡警務裁判就近之路政皆附焉而蒙鹽之分支店銀行之分局亦姑附入其中相與維繫鹺務設總局四一設于赤峯之烏丹城一設于多倫諾爾廳之喇嘛廟一設于奉天新設之遼源州一設于奉天新設之洮南府凡大小銀行及郵政電局皆附焉至墾務兩總局以外應設之分局鹺政四總局以外應設之分店支店則隨時隨地察酌

情形推廣設立難以豫擬

凡總局應設總辦一員中分各股如墾務總局中應分墾務警視訟獄等股每股應設提調一員各股之中隨事繁簡又分各課每課各設委員一員其鹺務總局中分股分設亦如之至分店則設會辦一員支店則設坐辦一員以總其成而每股則設委員每課則設司事以示差等如是則綱舉目張而事有統紀矣

凡墾務諸司應于候補候選之府廳州縣佐貳中遴員辦理鹺務司應于候補候選人員中則其通曉商業

者于銀業鹽業人員中擇其明白大體者遴員辦理蓋墾務諸司與官事爲近齟政諸司于商業爲宜也

副都統本署設總理處以總其成設總理長官一員中分各司每司設司官一員每司之中視事繁簡下設管理數員句稽攷課內承副都統之命令以受墾務齟政各局之成具爲副都統之幕僚

以上爲官屬編設之大略至其中階級層遞職權限制功過攷成資勞升轉一切條目容開辦時再行詳擬以上乃開辦伊始值地大民寡之時爲權宜設置之差

缺至數年以後放墾日多民居日奠村落相銜漸成都
邑自應陸續設有司官以資治理竝應設立長官以相
統攝爾時如何設官之處再行擬定

一 兵隊之屯駐

威令之行非兵不武新壤之闢實藉聲援矧東方馬賊
縱橫尤資鎮壓亂萌克遏乃保治安莠民翦除外侮自
戢擬請混成一標挈以俱往分駐之所略籌如下

新設副都統常駐巴林除自募衛隊百名作爲親兵
以外應于西去百里巴林橋地方屯駐步隊一營中

抽一隊輪駐鹽池每三閱月一更番餘駐之兵不時
梭巡北抵鹽池南至烏丹城西及克什克騰西界以
清西路

轄境以內東西相距略及千里中權所在爲阿魯科
爾沁東烏珠穆沁兩旗之交應由標統自率步隊一
營礮兵兩隊扼要屯紮屹駐中路以爲東西南北策
應之師

馬賊竊發恆從東來應于達爾罕王旗新河附近地
面常駐步隊一營馬隊一營分巡科爾沁左右翼兩

中旗

達爾罕王旗圖
什業圖王旗

東西扎嚕特兩旗之地萬一有

警則抽移中路步礮之師標統率以俱往則千里提
封可期安謐外人見我紀律嚴明戎心自戢

水流不腐兵忌久屯故此防兵利用混成以爲編制
各鎮抽調以成一標每歲更番新舊交替新兵續來
舊兵歸伍則兵氣常新不生莫氣且饗不加籌似爲
善策

事有統繫政忌兩歧此項混成一標到防以後應歸

副都統節制

見在開辦之初以混成一標歲一更代乃一時權宜
俟墾務蹉務辦有成效以後能自行籌餉至少須自
練一協新兵方足鎮撫巖疆若餉力稍充則須以練
至一鎮兵爲度

兵忌散屯雖精必窳此項防兵除分三路屯紮之外
斷難零星分駐致散而無紀兵氣不揚而轄境周回
至數千里將來放墾日廣斷非此一標防兵所能周
匝應于兵力不及之處自練巡警兵以彌其隙欲期
防維周密至少須練馬巡千人

蒙古地方
須用馬巡步巡千人

與防兵互相援應則地方可期又安亂民不虞竊發
應視經費能否克贍徐圖辦理

以上所陳辦法祇具梗概至經營東蒙事體繁重所有詳
細節目或須變通之處應俟開辦之時再行體察當條舉
縷晰別類分明次第興辦見在辦理宗旨誠如將軍程德
全所言不規近利務期邊境貫通一氣者也故著手之初
不事鋪張但求實效謹將管見所及設立副都統編制大
略臚陳臺鑒祗候鈞裁

...

...

...

...

...

...

...